


ليل ٢١



## الطبعة الأولى

١٤٤٤هـ - ٢٠٢٣م

اسم الكتاب:	ليل ٢١
اسم المؤلف:	ريموندا راغب
التدقيق اللغوي:	ملك محمد
تصميم الغلاف:	وحيد محمد
الإخراج الداخلي:	عمر اسامة
رقم الإيداع:	٢٠٢٢ / ١٥٦٧٥
الترقيم الدولي:	٩٧٨-٩٧٧-٦٨٧٤-٩٤-٧



ش - حسن خطاب - قسم يوسف بيك - الزقازيق - الشرقية



01020439639



massar.pub1@gmail.com



مسار  
للنشر والتوزيع  
Massar Publishing & Distribution

جميع الحقوق محفوظة، ولا يسمح بإعادة إصدار هذا الكتاب، أو أي جزء منه، ورقياً أو إلكترونياً، سواء بشكل كامل أو جزئي أو عرضه مجاناً عبر أي وسيلة وبأي شكل من الأشكال من دون الحصول على تصريح خطي من دار مسار للنشر.

# ليل ٢١

ريموندا راغب





إِهْدَاءً

إلى أخي العزيز رحمة الله عليك.



## مقدمة

الحقيقة ده أول كتاب ليا وأتمنى أكرر التجربة دي تاني.

ليل ٢١ مش يعتبره مجرد كتاب؛ لا ده حته مني بحوادثه وتفصيلها سواء الي أنا عيشتها بنفسي أو شخصيات تانية عاشوها، الحوادث دي مش مجرد حكايات من نسج خيالي، لا دي حقيقة بناس حقيقة قابلتها وعاشت معايا، ويمكن أنا أصلاً ويمكن أنت، عشان كدا متخضش لو لقيت نفسك جوا!! متستغربش لو لقيت نفسك في حدوة من حوادث ليل ٢١، أنا كتبت كل كلمة في كل حدوة من دول من قلبي وأنا واثقة إن الي من القلب بيوصل القلب.

شكراً انك اختارت تقرأ كتابي الأول.

(١)

## ليل

«يناير ٢٠٢١ الساعة الواحدة بعد منتصف الليل»

فتحت عيني لقيتي في مكان مش عارفة أحدد هو ايه بالظبط..  
حاسة اني أعرفه كويس وفي نفس الوقت غريب عني، شبه أوضتي بس  
مش أوضتي؛ أوضتي كلها أنوار عن كده؛ أصل أنا مبحبش الضلمة؛  
فأكيد لو دي أوضتي مش هخليها مضلمة كده. فضلت أبص على كل  
ركن في الأوضة حسيت كأني شوفت الأركان دي قبل كده.. المكتبة  
الصغيرة، والكرسي الهزاز، وكاسيت قديم، وجنبه مجموعة شرايط،  
صور ناس مشهورة على الحيطه.. بس الغريبة انهم أكثر الشخصيات  
اللي تعرضت لظروف صعبة وألم في حياتهم!

كنت حاسة بلسعة برد؛ الشباك مفتوح والستارة بتتحرك من الهوا..  
كنت خايفة أوي وأنا شايفة اني لو حدي في مكان معرفهوش. فضلت  
اترعرعش ودموعي تنزل غصب عني، كنت بضم نفسي كأني بحضني،  
فضلت أبص حواليا، كنت بصرخ جامد أوي بس ماكنش فيه صوت  
طالع! قومت من على السرير واتحركت ناحية الشباك وللحظة بدل



ما اقفله لقيت نفسي بحاول أقف عليه عشان ارمي نفسي... لغاية ما سمعت اسمي بيتنده!

- ليل.. ليل.. ليل اوعي يا ليل!

أيوه ده اسمي، ليل، وأنا فعلاً ليل؛ ليل غامق، كاتم، حزين، شايل أوجاع وآلام بالكوم، ليل طويل مليان حكايات، بس كلها حكايات حزينة.

- ليل، اسمعيني، أنا عاوزه أساعدك.

سبت الشباك واتجهت للمكان اللي جاي منه الصوت.. كان الباب، بس كان مقفول ومش راضي يفتح، حاولت أفتحه لكن معرفتش.

- مش هيتفتح، بس لو خلّيتني أساعدك هيتفتح.

= مش هتفرق، ماجتش على الباب دا اللي هيتفتح، ما كل حاجة مقفولة في وشي!

- ليه يا ليل بتقولي كده؟! أنتِ ولا ضعيفة ولا قليلة الحيلة، أنتِ أقوى من إن الأبواب تتقفّل قدامك، اسمعي لقلبك صح، وفكري بيايمانك الأقوى من أي شيء.

= هو أنا فين؟!

- أنتِ شايفة نفسك فين يا ليل؟

= أنا حاسة انها أوضتي، لكن مش عارفة.. حاسه اني أنا غريبة.

\_ وعجباك؟!

= ااا؛ فيها حاجات بحبها.. الكتب، وشرايط الكاسيت، حتى الصور الي على الحيطه بحب الشخصيات دي.

\_ اشمعنا؟

= عشان بحسهم شبيهي.

\_ عشان انتحروا؟!

= كلهم كانوا موجوعين، ولا فلوسهم ولا شهرتهم قدرت تشفي جروحهم، رويين ويليامز الي أسعد العالم كله مقدرش يسعد نفسه.. متحملش الألم ولا فراق زوجته.

مارلين مورلو بكل جمالها ده وشهرتها ماتت منتحرة بأدوية اكتئاب، وداليدا انتحرت سايبه رسالة «ساحوني؛ فالحياة أصبحت مُستحيلة» كلهم تعبوا وعانوا واتألموا ومحدث حس بده، كله كان شايفهم مش ناقصهم حاجة.

- عارفة انك أنت كمان بتعاني، بقالك كتير بتتألّي كل يوم وتنامي وأنت في جرح جواكي كبير مفتوح وعلى أمل تصبحي تلاقيه اتشفى ومبقاش موجود، بس مش كل الي اتألموا كانت نهايتهم انهم ينتحروا وأنت عارفة كده كويس، بدليل انك بتحبي أوبرا ونفري ومعلقة صورتها وأنت عارفة هي عانت في حياتها قد ايه؟!

= أنت ليه بتتكلمي عليها على أنها أوضتي؟!

- عشان هي أوضتك فعلاً يا ليل.

= أنا تعبانة؛ حاسة بتقل في قلبي، واني صغيرة أوووي والأوضة دي كبيرة عليا، أنا مش قادرة أكمل.. مش عايزة أكمل.. ليه ندهيتيني.. ليه؟!

- تفتكري ممكن أسيبك تضيعي نفسك؟ أنتِ غالية أوي يا ليل، أنتِ مش حاسة بده.. انك غالية!

= لو غالية صحيح مكنش حصل معايا كل ده، أنا بيعاملوني اني أقل من أقل حاجة، شايفني رخيصة وعبطة، كلهم شافوا اني مستاهلش.

- أنتِ متأكدة انهم شافوكِ كده؟ ولا أنتِ الي شوفتي ده فتعاملتي على أساسه!

= قصدك ايه؟ عاوزه تقولي اني مجنونة! أنا غلطانة اني اتكلمت معاك، أنتِ مين أصلاً؟!

- شايفة نفسك ازاي يا ليل؟

= بقولك أنتِ مين؟!

\_ شايفها قليلة.

= ردي عليا.. أنتِ مين؟!

\_ مستاهلش، متحبش، شايفة نفسك متحبش يا ليل؟

= همّ الي حسسوني بده، همّ الي قالولي كده بكل تصرفاتهم معايا،

أنا غلطت مش همّ...

\_همّ مين؟

= اللي لسة بحنلهم وبشتاقلهم رغم وجعهم اللي بيأن جوايا، اللي ادبتهم كل حب وكان ردهم عليه بالجرح.. أنا اتعاقبت على كل حاجة، على شكلي و.. لوني، وجنسي، حتي سني! ظروف، وأصلي اللي ماليش دخل فيه.. أمنيأتي اللي رسمتها في مخيلتي!

حتى حبي الشديد ليهم اتعاقبت عليه.. مشاعري الصادقة.. كان البُعد والنفور هو الرد عليها، لغاية ما وصلوني اني أعاقب نفسي على الحلو اللي فيا!!

مش عايزة أحب، مش عايزة أتحب، مش عايزة حد يكون معايا..  
مش عاوزه حتى أتكلم معاك!!.. امشي.. امشي!!!!

\_ تحبي أشغلك حاجة تسمعها؟

= أنتِ مجنونة؟!

\_ في حاجة هتحبها أوووي هتلاقيها عندك، بُصي كده جنب الدولار، في جراما فون.. مش أنتِ بتحبي الأنتيكا؟!

= أيوة بحبها.. عرفتني مين؟!

\_ هتلاقي اسطوانة لأغنية لإسماعيل ياسين بتحبها.

«اتحركت ناحية الجراما فون ولقيت اسطوانات كتير، منها اسطوانة

أغنية (كلنا عايزين سعادة) لاسماعيل ياسين، وشغلتها وبدأت الأغنية  
بكلماتها اللي هي:

شُغلتنا الشاغل في الحياة

كلنا عاوزين سعادة

بس ايه هي السعادة!

و لا ايه معنى السعادة؟

قولي يا صاحب السعادة

قولي.. قولي.

= تفتكري ايه هي السعادة يا ليل؟!

\_ السعادة!! مجرد احساس، شعور بنحسه ييفصلنا شوية عن الواقع  
الحزين، يخلينا طايرين في السما.. بس بعدها عارفين اننا هنرجع على  
الأرض تاني؛ عشان هو احساس مؤقت.

= السعادة مش فاصل زمني ييفصل بين الحزن والحزن.. لكن الحزن  
هو اللي فاصل زمني ييفصل بين السعادة والسعادة، لو شوفتيها كده  
هترتاحي كثير يا ليل.

\_ مش فارقة..!

مش عارفة ايه اللي خلاني أغير الاسطوانة وأشغل (كل ده كان ليه)  
لمحمد عبد الوهاب، وعلى قد ما أنا بعشق الأغنية دي على قد ما صحت

جوايا حنين ووجع كبير.

غاب عني بقاله يومين

معرفش وحشني ليه

احترت أشوفه فين

وإن شوفته أقوله ايه!

كل ده كان ليه؟.. لما شوفت عينيه

حَن قلبي ليه

وانشغلت عليه

كل دا كان ليه.. كان ليه!

= وحشك؟!

\_ أوي.. كنت فاكرة اني مش هفتكره ولا هيوحشني تاني.

= وايه اللي حصل؟

\_ معرفش.. معرفش بيوحشني ليه..! ساعات ببقا مش فاهمة كان

ليه أصلاً أحبه وأنا عارفة انه هيقرب وعارفة برضو انه هيبعد.. مش عارفة ليه!

= عشان كده بعدتي؟

\_ (صمت).

= مالك؟!

\_ مالي؟!

= سكتي مرة واحدة.

\_ عادي..

= حاسة بأيه؟!

\_ خايفة!!

= وده اللي خلاك تبعدي؟

\_ خوفي بقا بيخليني أسيب اللي بحبهم.. قبل ما همّ يسيبوني، بخاف  
القدر يلعب لعبته ويبعدني عن اللي بتمناه وبحبه... بقيت أسيب  
الأماكن اللي بلاقي فيها راحتني عشان متعودش عليها.. بسيب كل  
حاجة روحي فيها عشان أثبت لنفسي اني أقدر استغنى بسهولة.. اني  
قوية كفاية.

= وبقيتي قوية كفاية؟!

\_ بقيت مطفية.. حاسة اني من غير روح.

= ليه مفضلش حاجة؟ مفيش حاجة متمسكة بيهاا؟!

\_ لا فيه.. اتمسكت بالحاجات اللي مش ممكن هيجي وقت ومش  
هتبعد عني...

= اللي هي ايه؟!

\_ شوية كتب.. الموسيقى، الأكل الي بحبه وماحاولتش أغير أصنافه، بس.. عارفة! اكتشفت برضو ان الحاجات دي بتربطني بيهم أكثر؛ بتفكرني بيهم دائماً؛ بأغنية سمعتها سواااا.. أكلة حلوة كلناها مع بعض، حتى الكتب بشوفهم فيها بين السطور.. ريجتهم موجودة.. مش عارفة هو ده طبعي ولا أنا الي ربطتهم بكل حاجة في حياتي..

= غريبة انك بتلاقيهم في كل حاجة كدااا.. برغم انك مسحتي صورك معاهم، بطلتي تروحي الأماكن حتى الي جمعتك بيهم، بعدتي عن كل حاجة ممكن تفكرك بيهم، وبرضو فضلتني فكراهم! مسألتيش نفسك كان لازمته ايه ده كله من الأول! تسيبي وتبعدي وتستغني.. وبرضو تفضل أثرهم فيك؟!

\_ أنتِ عاوزه تقولي ايه؟!

= عاوزه أقولك عيشي.. أصلك هتهربي وتبعدي وتعذبي قلبك على ايه! ما يمكن القدر الي أنتِ خايفة منه وتبعدي بسببه يبقا هو الفرحه المنتظرة! استمتعي بالرحلة؛ المتعة في الرحلة مش الوصول؛ لأن جازي أوي متوصلش.. فعلى الأقل تكوني اتبسطتي في الطريق.. فاكدة وأنتِ صغيرة كنتي بتبسطي ازاى بالطريق أكثر من الرحلة نفسها؟؟!!

\_ هو أنا وحشة؟!

= أنتِ حاسة ايه؟!

\_ مش عارفة.. ساعات بحس اني حلوة أوي ومفيش فيا غلطة،



وساعات تانية بحس اني أوحش واحدة على الأرض.

= تفكري السبب؟!

\_ يمكن قلة ثقة؟!

= يمكن!

\_ أزود ثقتي بنفسي! صح؟

= حلو اعلمي كده.

\_ طب ومشاعري؟!

= مالها؟

\_ بمقدرش عليها.. بحسها أقوى مني، هي اللي سايقاني مش أنا.

= ازاي؟!

\_ بحس اني عبارة عن كتلة مشاعر مُتحركة، ببص للأشياء والأشخاص من مشاعري.. شخصية بتفكر بمشاعرها وده أغبي ما فيا!! بحس بإنسانيتي عن طريق مشاعري، قلبي يفرح واحس انه فيه فراشات فاعرف اني بحب.. أحس بسكاكين بتدبح في قلبي فاعرف أن ده جرح الحب، مش بقولك كتلة مشاعر مُتحركة؟

= بس أنت مشاعرك كلها حلوة اتجاه أي حاجة، حتى الأشخاص.. وبما انك كتلة مشاعر زي ما بتقولي مش ده كفاية أوي انه يخليك على طول حلوة؟!

\_ صح.. أنا ساعات كتير بحس إن مشاعري الحلوة دي هي بر الأمان وطوق النجاة من أي وجع جه أو لسه هيجي!! أو الطريق للفرحة المنتظرة! ويمكن كمان دي هي الي مخلياني مميزة أوي!

= بالظبط.

\_ أنا أتحب صح؟

= جدًا.

\_ هو بس ممكن يكون الأفضل ليا مجاش صح؟!

= ممكن طبعًا.

\_ أنا ساعات بزعل من نفسي أوي؛ اني بضعف واتكسر خصوصًا قدام حد، مش صح اني أبين ضعفي ده، مش صح أبدًا أبان مهزوزة كده وهشة.

= ومين قال انك ضعيفة! أنتِ نسيتي انك كل يوم ليل بتنهارى هنا في الأوضة دي وأنتِ لو حدك مفيش حد سامعك، ولا حاسس بيك، ولا في طبطة ايد تهديك ولا تمسح دموعك، ومع ذلك بتصحى الصُبح وتمارسي يومك عادي، بتضحكي وتهزري مع ده وده، وتشتغلي، وتنجحي، وكماتك تسندي المحتاج، كل ده وشايفة نفسك ضعيفة؟!

\_ أنا عاوزة أشوفك.. حاولي تفتحي معايا الباب ده.

= أنا بحبك.

\_ وأنا كمان بحبك.. ممكن تفتحي الباب؟

= النهار طلع يا ليل.. النور جه ومفיש عتمة تاني خلاص.

«بصيت على الشباك لقيت نور الشمس في عيني؛ غمضت وفتحت  
تاني وعيني جات على المراية شوفتني كأني أول مرة بشوفني.. كُنت  
جميلة.. جميلة أوي».

\_ عشان خاطري حاولي معايا أفتحه.

«ولسة هحاول أفتح الباب لقيته اتفتح بسهولة عادي.. بس مكش  
فيه حد أصلاً».

(٢)

## ورد وشيكولاتة

«أنا مبعرفش أعبر غير بالكتابة؛ لما بحب بكتب، ولما بزعل بكتب، ولما بفرح بكتب، ولما حببت أهاديك كتبلك مشاعري على ورق مع ورد وشيكولاتة».

انهارده يوم مهم جداً بالنسبالي، يوم اتمنيته من زمان، انهارده حفل توقيع أول رواية ليا.. الرواية اللي حلمت سنين اني أعملها، مش مصدقة أصلاً ان بقا ليا رواية في السوق وفي ناس هتقرأ كلامي، كلامي اللي خارج كله من قلبي بجد!

وبرغم ان اليوم مهم واني مبسوفة الا اني كنت حاسة ان في حاجة نقصاني، في احساس بالسعادة ناقصني، مش عارفة أحدد هو ايه، ولا موجود في ايه ناقصني!!

بدأت البس وأجهز، لبست طقم حلو أوي اشتريته مخصوص لليوم ده، وعملت شعري، وميك اب خفيف.. كان شكلي حلو أوي.

نزلت من بيتنا وروحت الحفلة لوحدي، وصحابي كانوا هيجولي على هناك، كان نفسي يكون أهلي معايا، يمكن كان ده اللي ناقصني؟! مش عارفة!

وصلت الحفلة، وطبعاً اتطلب مني أقول كلمة عن الرواية، وفي وسط ما انا باتكلم لقيته داخل من باب القاعة، جه الي كان ناقصني بجد... لا ومش داخل لوحده، داخل وفي ايده بوكيه ورد كبير، معقول؟! نفس المشهد المكتوب في الرواية بيتحقق، ده نفس شكل بوكيه الورد الي وصفته في الرواية بنفس ألوان الورد؛ بوكيه ورد أحمر كبير، وفي النص كام وردة بيضا.

كان ماسكه في ايده وباصصلي ويضحك، غصب عني ارتبكت وعيني بصتله ومنزلتش من عليه، مكتتش عارفة أصلاً أنزلها، كان شكله حلو أوي، أحلى من الصور بكثير.

كان لابس القميص والبنطلون الي بحبهم عليه والجزمة متلمعة وحزام جلد، والساعة طبعاً كانت جلد سودا، وضحكته الي تجنن، سنانه البيض المتساوية كانت منوراها أكثر، وشعره ودقنه السودا مع عيون السود الي تسحر ورموشه الطويلة كانوا مبهدلني، كان شكله فعلاً حلو أوي، واتبسّطت كمان لما افتكرت ان أنا كمان كان شكلي حلو، وده الي شوفته في عينيه.

أحلى احساس بجد ان البنت تشوف نفسها حلوة في عيون الي بتحبه!

بعد ما خلصت كلمتي بدل ما اروح اقعد مكاني لقيت نفسي بروح ناحيته، ولقيته هو كمان بيقدم خطواته، ولما قربت بصيت في عينيه، وخذت نفس، ولقيته بيديني بوكيه الورد ويقولني:

- مبروك الرواية.

= الله يبارك فيك، ميرسي.. الورد ده عشاني أنا؟!

- اه؛ اصلي قرئت الرواية ٣ مرات.

= ايه ده بجد؟

- أيوه، وبالمناسبة دي ممكن نتمشى شوية؟!

= كم ان!

- مش بقولك قريتها ٣ مرات.

سبت حفل التوقيع وروح معاه نتمشى، وفضلت حاضنة بوكيه الورد وساكطة طول ما احنا ماشيين، كنت مكسوفة أوي وبفكر واسأل نفسي هو اللي أنا فيه ده بجد؟!

طب هو معقول حاجة تخيلتها وكتبتها تحصل بالشكل ده؟!  
يعني هو فعلاً فهم ان المشهد المكتوب كان له وكنت أقصده هو بالتحديد؟!

فضلت أفكر لحد ما قطع تفكيري وقال لي:

- طب ينفع بقا نقعد في حتة نشرب حاجة ونتكلم، وأهو بالمرّة أشوف وشك كدا وأبصلك بدل ما أنت ماشية باصة في الأرض؟  
= بس ده مش موجود في الرواية.. أنت كدة بتجود.

لقيته ضحك وقالي:

- معلش يا ستي خليها عليك.

ضحكت ضحكة مكسوفة وقولتله:

= ماشي.

ودخلنا قعدنا في كافيه، كنا قاعدين ساكتين بنص لبعض وبنضحك ومحدش فينا عارف يبدأ كلام منين ولا يقول ايه، وأنا على قد ما كنت هموت وأشوفه واقعد معاه كده إلا ان نزل عليا هطل الدنيا والآخرة، وكنت بطة بلدي أوي، لحد ما هو قطع سكوتنا ده واتكلم:

- أنا مبسوط اني شوفتك واتقابلنا.

= وأنا كمان على فكرة.

- لما كنت بشوف صورتك، كنت بحس احساس غريب أوي، بارتاح كده ولو متضايق بهذا، كنت بتيجي في بالي كثير، وكنت اضحك عشان مش فاهم ليه؟

= ده أكيد عشان أنا كوميدية أوي.

- ده حقيقي، وجميلة أوي، أجمل بكثير من الصور.

= وعلى فكرة باتكسف أوي.

- جميلة كمان وأنت مكسوفة، نور أنا مبسوط أوي! وأنا معاك حاسس اني مرتاح.

= وأنا حاسة اني بحبك.. حُب مُبالغ فيه.. حُب مالوش مبرر!!

سند ضهره وضحك ضحكة ثقة، وقال:

- طب ما تبريره!

= ما ظنش اني محتاج ده.

- ليه؟؟!

= عشان بعد ما شوفتك غالبًا عرفت ان الحب مش محتاج مبررات.

فضل يضحك، وأنا حاسة بالانتصار الشديد اني قدرت أضحكه  
كدة.



(٣)

## وحدني لكن ونسان

كان نفسي ابقا من الناس الي بتخرج لوحدها، وتدخل أي مكان  
تقعد وتاكل وهي لوحدها عادي جدًا، وتكون مبسوفة مش حاسة انها  
حاجه عيب أو غريبة!

طول عمري بخاف من الوحدة، مبحبش ابقا لوحدي، حتى لما  
كنت بختار ده كنت ببقا عاوزه حد يقتحم عليا وحدتي دي وميسبنيش  
ليها. طول الوقت كنت بدور على الونس، مبحبش الليل عشان ببقا فيه  
لوحدي وهو مالوش طعم من غير ونس وكوبايتين شاي بالنعناع مع  
صوت الست.

الحياة مشاركة، لو مفيش حد أشاركه أفراحي، أو أحزاني، أو حتى  
انجازاتي البسيطة هيبقا ايه لازمتها!

ربنا مخلقناش في الدنيا لوحدينا؛ خلقنا نكون مع بعض.

أنا لما بدخل مكان لوحدي بتوتر جدًا وبقا مكسوفة، ولما بتمشى  
وأنا لوحدي ببقا عاملة زي الشاويش عطية ومكشرة، لكن تيجي بقا  
تشوفني وأنا معايا حد؛ سعادة الدنيا كلها بتكون فيا؛ في حد ماشي معايا  
مونسني بناخد وندي ونضحك وننسط.

بس لأول مرة آخذ قرار اني ابقا لوحدي، أنا هقضي اليوم انهارده لوحدي.

وأول حاجة عملتها اني اقفل موييلي، وطبعًا قفلته وأنا عارفة ان مصر كلها هتكلمني انهارده، وهتحصل مشكلة معرفش مين بس لازم تحصل مشكلة ويكون لازم يوصلولي بسرعة، ومش بعيد كمان الكراش يكلمني ااه والله، بس مش مهم أنا واخدة قرارى.. قفلته.

وبدأت أشوف هبدأ يومى بأيه؟! الملاهى! بس أنا بخاف منها، ويوم ما أروحها أكون لوحدي؟!

أول ما وصلت الملاهى فضلت أبص على الألعاب وأنا خايفة، كنت حاسه اني بدوخ من قبل ما اركبها.. بصيت على الناس ملقتش حد لوحده!! هو أنا اختارت المكان الغلط ولا ايه؟!

وبعدين كل الناس بتصوت وخايفة، طب ايه المتعة في كدة؟! ايه المتعة في انك تكون خايف؟! طب ليه الفرهدة دي، طيب والناس اللي بيغمى عليها دي ومش مستحيلة؟ وناس بتعيط، طب طالما هي مش ممتعة وتعبانين بتيجوا ليه؟! أنا والله يا جماعة شايفة انكوا كبرتوا الموضوع، وهما زحلقتين ومُرجيحة كانوا هيقضوا الغرض، والله كبرتوا الموضوع يا شباب!!

وبدأت أفكر أنا هركب أنهي لعبة، وطبعًا كل لعبة من دول كان ليها سيناريو في دماغي هيحصل لي لما اركبها، وسبحان الله افتكرت كل حوادث الملاهى في العالم فجأة ولقيتني بضعف، وبقول لنفسى مش لو

كان معايا حد دلوقتي كان شجعني ومسكت فيه وأنا متطمنة.

بس تراجعبت بسرعة عن الفكرة ولقيتني باخد قرار بأني هركب  
قطر الموت!!

هما ليه صحيح سموه قطر الموت! وايه الاقبال الشديد اللي عليه  
ده؟! للدرجة دي الناس بتروح للموت برجليها؟ ولا هما للدرجة دي  
شايفين الموت طيب ويلاعب معاهم!!

الحقيقة مكذبش اللي سمّاه قطر الموت؛ ما هو قطر فعلاً ومحطات،  
وكل واحد ومحطته بقا، المهم يكون جاهز.

بس أنا بخاف من الموت، أو بصراحة بخاف من أي حاجة مجهولة  
عموماً، بس أنا أكيد مش جبانة، محبش ابقا جبانة، وده اللي خلاني آجي  
الملاهي النهاردة؛ عشان أواجه خوفي.

كانت أول مرة اركب القطر، حسيته كئيب، مش لطيف خالص،  
من أول ما تحط رجلك هتحس بقبضة قلب، أول ما العربية اتقفلت  
عليها قولت بس الحقّي اتشاهدي بقا أنت يا نوجة، الموضوع شكله مش  
هزار وأنت أرق من كدة، وكل لفّة ولفّة وقلبي يقع مني فيها معرفش  
بيروح فين!

ابن الايه! ده مكنتش حاسة بصوتي وأنا بصوت، والثانية بتعدي  
كأنها سنة.. ومفيش على لساني غير اللعبة كبرت منك يا ياسين!

وأخيسيسيرًا القطر وقف، وغالبًا قلبي كمان وقف معاه، فضلت

مبلمة في مكاني والجدع يحركني، لحد ما فوقوني بشوية مائة.. ايه دا هو  
أنا أصلاً اغم عليا!!

ما علينا، بعد ما فوقت فكرت ادخل بيت الرعب، بس بصراحة  
قولت كفاية الي بشوفهم يوم العيد الصبح، واهو العيد قرب كلها  
اسبوعين واطرعب.

طب أركب ايه؟ السلسلة؟! لا أنا داينة لوحدي، طب المنخل؟!  
الدنيا مخضخصاني لما قالت يا بس، السجادة؟! مبقاش فيا حيل والله يا  
عسل.

بس لقيت عربية فشار وجنبها عربية غزل بنات واعتقد عرفت أنا  
هعمل ايه؟!

جبت كل ما يحلوالي، وقعدت أكل واتفرج على الناس شوية، أرحم  
على عيل معدي شوية، لحد ما حسيت اني عايزة ادخل سينما.

طب ما ليه لا؟! أنا أصلاً مكاني السينما، جو الفرهدة ده مش بتاعي؛  
أنا واحدة حُبها الأول والأخير للفن وبما اني لوحدي مفيش ونس أحلى  
من الأفلام والسينما.

ياللا بينا!!!!!!

يا دي الحيرة بتاعة هدخل فيلم ايه؟! رعب! احنا قولنا العيد قرب،  
الأكشن ماليش فيه، رومانسي مش ناقصين احساس بالحرمان أكثر من  
كدة، كوميدي ولا كرتون؟! طب ما تبالا كرتون وماله!

دخلت فيلم اسمه Luca بيتكلم عن فكرة الخوف من المحاولة والخوف من المجازفة، وإن كل مرة يحيلك فيها صوت الخوف دا جواك (الي هو مش حقيقي) قوله Silenzio, Bruno أو بالعربي قول لـخوفك (اخرس)، وارمي نفسك في البحر، وجازف، وجرب، نجحت يبقى انتهزت الفرصة وخذت خطوة لقدام في حياتك في طريق سعادتك وسلامك النفسي وبقيت في مكان أفضل، فشلت يبقى منها اتعلمت علشان لما تحاول تاني تعملها بطريقة مختلفة؛ فتنجح وتوصل.

وهتلاقي طموحك وأحلامك بتكبر بعد كل نجاح بتحقيقه؛ لأنك لو عملتها مرة ده هيديك الثقة في نفسك إنك تقدر تعمل الأكبر من كدة طول ما انت بتقول Silenzio, Bruno.

يعني من الآخر..

- جازف
- جرب
- هتنجح
- هتكسب.

بشرط إنك ما تبطلش محاولة طول ما فيك النفس، بس قبل كل ده ما تحاولش (تغير جلدك)، خليك دايماً محتفظ بمبادئك وأصلك مهما ده كلفك.

ولما تنجح بشرف الناس هتجيبك وتحترمك وهتشجعك.

وكالعادة أفلام الكرتون بتغير مودي للأحسن، وخرجت جعانة  
وعاوزة اكل هامبورجر...!

جبت ساندوتش وفضلت اتمشى وأكله في الشارع، ولأول مرة أكل  
وأنا مش مكسوفة، وايه يعني؟! واحدة جعانة وبتاكل.. أي نعم لقيت  
ناس غريبة جدًا بتبصلي مش عارفة ليه؟! بس كملت.

احنا شعب غريب أوي يا أخي، يعني بنستغرب الناس اللي بتاكل في  
الشارع ومبنستغربش الناس اللي بتفك زنقتها في الشارع!! بلد عجب  
العُجاب!

حطيت الهاند فري بعد ما خلصت أكل وشغلت أغنية قديمة كدة  
لحميد الشاعري، بتقول ايه بقا:

في سكوت زماني يفوت

لا أنا ساقية ولا رحال

ويهون عليا الكون

وأنا مطحون في حب رمال

وفضلت اغني وأنا في الشارع ومش هاممني، مش عارفه جبت كل  
الجرأة دي منين؟!!

ايه هخاف من الناس ليه! طالما مبعملش حاجة غلط، واتكسف ليه  
وأنا بعمل الحلو؟ الغريبة بقا ان الناس افتكرتني مجنونة.. اه زيمبقولك

كدا.

افتكرت أحمد ذكي لما قال في فيلم هيستريا:

«احنا عايشين في مجتمَع ضاغط؛ الي يتصرف فيه بتلقائية يتقال عليه مجنون!!».

فضلت أغني لحد ما وصلت البيت، أخذت دش سخن، وأنا حاسة اني مبسوطة، مبسوطة بجد مش بمثل.

كل مرة كنت بخرج فيها مع صحابي كنت بحس بونسهم في الخروجة بس وبعد ما بروح أحس اني مش مبسوطة ولا حاجة، أوقات بتروح بيتك وتدخل أوضتك وتقع على سريرك وتحس انك عايز تروح.. عايز تروح للي قلبك عندهم. أنا قضيت اليوم لوحدي بجد.. رocht ملاهي وسينما وكلت في الشارع وفضلت أغني؛ دي الحياة طلعت بسيطة أوي، والوحدة طلعت حلوة أوي مش بشعة زي ما كنت بتخيلها.

أوقات كنت بحس اني بحس بالوحدة من كتر ما أنا خايفة منها.. أنا طول الوقت لوحدي أصلاً الوحدة مش بس انك تكون من غير ناس، أنت ممكن يكون حواليك ألف واحد وبرضو حاسس انك لوحدي، اللي مبيحلمش وحيد، واللي مالوش ونيس وحيد، واللي مالوش قلب يحبه بجد ويسمعه وحيد.

الوحدة حلوة لما احنا نختارها.. مش لما تتفرض علينا..

جرب تبقا لوحدك لما تحب ده، خليك جدع عشان تعرف تقف  
 جنبك لما أنت محتاجك.. خليك ونيس روحك، خلي أنسك في حاجات  
 تانية غير البشر؛ عشان لو اعتمدت عليهم هتبقا لوحدك بجد!!  
 فتحت موبيلي، ملقتش حد كلمني عادي!!  
 ظبطت المنبه.. ونمت.



(٤)

## مُرجِحة

كُنْتُ فِي النَادِي مَعَ أَوْلَادِ اخْتِي لَقِيْتَهَا وَاقِفَةً عِنْدَ الْمُرْجِيحَةِ وَسَطَ  
الْأَطْفَالِ وَبَتَكَلَّمَ الْوَلَدُ إِلَيَّ عَلَى الْمُرْجِيحَةِ وَبَتَقُولُ: خَلَاصَ بَقَاا كَفَايَةَ!  
وَبَتَتَخَانِقُ مَعَاهُ، لَمَّا قَرَبْتُ لَقِيْتَهَا بِتَقُولُهُ: أَنْتِ وَقَتُكَ خَلَصَ!

قَرَبْتُ مِنْهَا وَكَلَمْتُهَا:

\_ مِمَّكُنْ بَسْ ابْنُ اخْتِي يَرْكَبُ الْمُرْجِيحَةَ شَوِيَّةً؟

= انا طبعاً بس بعدي عشان ده دوري أنااا.

\_ نَعَمْ؟!

= زِي مَا سَمِعْتُ، دُورِي أَنَا.

وَلَقِيْتَهَا رَكَبَتِ الْمُرْجِيحَةَ وَهِيَ مَبْسُوطَةٌ زِيهَا زِي الْأَطْفَالِ.

\_ مِمَّكُنْ تَزُوقْنِي شَوِيَّةً.

= اِيه؟! اه ماشي.

كَانَتْ جَمِيلَةً، شَعْرُهَا بَنِي مَشْ طَوِيلَ أَوِي، عِنْدَ كَتْفِهَا مَثَلًا، وَعَيْنُهَا  
عَسَلِي ظَهَرَتْ أَكْثَرَ مَعَ ضَوْءِ الشَّمْسِ الَّتِي انْعَكَسَ عَلَيْهَا، كَانَ عِنْدَهَا

سنة معوجة شوية؛ كانت مخلية ضحكتها مميزة، وعندها غمزتين. فضلت مركز معاها وأنا مُبتسم؛ من كتر ما كان شكلها مُبهج، بنت خفيفة زي الفراشة، وفعلاً تشوفها تحسها طفلة.

\_ الساعة كام معاك؟

= ٢ ونص.

\_ خلاص كدة أنا وقتي خلص.. اتفضل اركب.

قالت الجملة وهي بتبص لعلّي ابن اختي.

وبعد كذا بصتلي، ومدتلي ايديها تسلم عليا: أنا ليلي.

\_ أهلاً.. وأنا شريف.

= أنا آسفة اني مخلتوش يركب هو الأول، بس أنا كنت واقفة من بدري أوي.

\_ لا لا عادي، ولا يهكم، أنا بس استغربت عشان ممعكيش أطفال وبعدين لقيتك أنتِ اللي ركبتني.. استغربت بصراحة.

= قصدك يعني عشان كبيرة وبتمرجح! وفيها ايه مفيش حد كبير على الحاجات اللي بيحبها، عموماً فرصة سعيدة.

\_ أنا أسعد بجد.

= باي.

منكرش انها شدتني، كنت حابب أعرفها وأقرب منها، كانت غريبة

في شيءٍ مخليها مميزة عن أي حد ثاني، يمكن خفتها أو المرجيحة؟ مش عارف! بس بقيت أتحجج بعلي على طول وأروح النادي عشان أشوفها، وكانت دايماً بتكون عند المراجيح، ومكتتش بعرف هي بتعمل ايه بعد ما بتخلص، مكتتش بشوفها، لغاية في مرة قررت اعزم عليها اننا نقعد نشرب حاجة.

\_ هو أنتِ بتيجي النادي عشان تتمرجحي بس؟

= لا، بتمشي كمان.

\_ بس كدة؟ مبتعمليش أي حاجة تانية؟

= زي ايه؟!

\_ يعني تقابلي صحابك تتغدي معاهم، تلعبى رياضة معينة.

= أنا معنديش صحاب، ومبحبش ألعب رياضة، بحب اتمرجح بس.

\_ بشتغلي؟!

= اه.. مهندسة ديكور.

\_ حلو جداً، أنا دكتور أسنان.

= حيث كدا بقا، تعالجلي سنتي المعوجة دي.

\_ من عنيا.. بس هي كدة حلوة، ضحككتك حلوة أووي، مش محتاجة تجملها.

= ميرسي، أنا أصلاً بهزر، أنا مابحش دكاترة الأسنان، أنا آسفة مقصدهش؛ بس بخاف.

\_ لا ولا يهملك، بس احنا غلابة أوي على فكرة.

= جدًا... ده انتوا بتلعبوا في أسنان الناس بأدوات نجارة!

\_ ههههههه مش للدرجة دي! بس أنا مبسوط انك قبلتي اننا نتكلم شوية.

= وأنا كمان.. أول مرة اقعد اتكلم مع حد.

\_ بس أنا مش فاهم ايه سر حُبك في المُرجيحة؟

= بتحسني ان ماما موجودة، شايلاني وبتهزني عشان أبطل عياط وأهدا.

\_ أنتِ مامتك؟

= ماشوفتهاش أصلاً.

\_ وبابا؟

= قعد شوية ورحلها.. هو الي عودني على المُرجيحة، وكان عاملي مرجيحة في البيت، وأنا صغيرة لما كنت بركب المُرجيحة الأول كنت بخاف بس بعد كدة بتعود عليها وافضل أغني وأنا بتمرجح.. بحس اني بسافر بلاد، وبحقق أحلام، وبعلى لفوووق أووووي، وبعد كدة بنزل تحت تاني، زي الدنيا يوم تحت ويوم فوق، مش في أغنية بتقول كدة

برضو؟

\_ ااه فيه.

كنت دايمًا بحس ان ليلي مهمّا اتكلمت برضو ساكتة، بحس دايمًا انها شايلة حاجة جواها، ودايمًا بتحاول تخييها، وعمري ما عرفتھا.

بقينا بتتقابل كل اسبوع في النادي، وشوية شوية بقينا بنخرج مع بعض وندخل سينما، ودتني أماكن كثير مروحتھاش قبل كدة، بس كان كل مكان بتكون معايا فيه بيكون مختلف، كانت بتعرف تكون ونس؛ روحھا خفيفة، وتحبيك في الحياة، وبتسمع، بتسمع حلو أوي، وكانت بتتكلم قليل أوي. كنت بستغرب ازاي مالھاش! ولما كنت اسألھا كانت تقولي (مش عاوزة اربط حياتي بناس، الحياة مش ناس بس) ومكنتش فاهم ليه! بس أنا حبيتها؛ ليلي مينفعش ما تتحبش، صعب تعرفھا وما تقعش في حبھا.. كنت بحس انها بتتهرب مني، خايقة نقرب، كانت بتختفي وترجع، وأنا كل مرة بتختفي فيها قلبي كان بيروح معاھا، اتعلقت بيھا غصب عني وهي حبتي أنا كنت متأكد من ده، رغم انها كنت بتحاول تداري ده بس عينيھا معرفتش تداريه؛ لمعتها، وضحكتها لما كنت بشوفھا كانت بتفرشلي طريق لقلبھا!

اشتريت بيت جديد بجاردن وكلمتها عشان تعملي ليه ديكورات على ذوقھا هي، وطبعًا نعمل مُرجيحة في الجاردن، وبعد ما انتهت من شغل البيت كله وبقا جاهز عرضت عليها الجواز، قولتلھا بحبك وعاوز اكمل معاك بقيت عمري مردتش عليا وجريت. بعدت

ومعرفتش أوصلها، بعدها بشهر ونص اتبعنتلي رسالة من تليفونها (أنا  
 كمان حبيتك.. ولو الرسالة دي وصلتك اعرف ان حياتي انتهت؛ عشان  
 أنا قابلتك وأنا كان فاضلي شهور وأموت.. شكرًا على وجودك)!

\_ بتعيطي؟

= بحبها.

\_ بتحبي دُرتك؟!

= بحبك أنت، وبحب حبك ليها، وحبيتها من غير ما اشوفها..  
 قبلت اتجوزك وهي لسة مكانها موجود وروحها في ديكور البيت كله،  
 حتى المرجيحة دي الي على طول قاعد عليها، قبلت دا كله؛ عشان  
 لو أنا موجوعة من مشاعرك ليها فأنت موجوع أكثر مني على حدوتة  
 كانت بدايتها فراق.

\_ أنا حبيتك.. لازم تعرفي اني بحبك.

= عارفة، أنا هرّوح أشوف ليل عشان زمانها صحيت من النوم.

(٥)

## ضحكة من الحلوة نُرد الروح

يا صباح الخير ياللي معنا ياللي معنا

الكروان غنى وصحانا وصحانا

بحب اصحى على أغاني راديو زمان؛ صوتها يبسطني جدًا، بتدي  
طعم لليوم مُختلف.. على عكس طبعًا ما اصحى على صوت حمويكا  
اللي بيشغله طارق ابن طنط سعاد جارتنا وميسمعش الكلام ويوطي  
الصوت (لزوج أوي طارق ده) بس الحمد لله مشغلوش انهارده شكله  
مش موجود!!

مفيش أحلى من أغاني زمان، وراديو زمان، وحكايات أبله فضيلة،  
وزحمة البيت، وتجهيز الفطار، وشنطة المدرسة، والسندوتشات.. وبما  
ان البيت فضي عليا أنا وماما بعد وفاة بابا وسفر اختي وجوزها وطبعًا  
كبرت على المدرسة والسندوتشات فمبقاش فاضل حاجة من زمان  
ينفع أرجعها غير أغاني راديو زمان، وبالمناسبة دي (صباح الخير ياللي  
معانا).

اليوم حلو أوي انهارده؛ الجو جميل، والشمس طالعة، وصوت  
العصافير، وصوت أم كلثوم الجاي من محل عم چورچ، كل ده كان

كافي يخلي اليوم حلو. لبست وشربت كوباية الشاي مع ساندوتش الجبنة البيضاء المتين ونزلت على شغلي، كان مزاجي رايق أوي من بداية اليوم برغم اني قابلت حسام في الأسانسير (الخليل كوميدي بتاع الشركة) بس برضو مآثرش على مزاجي.. دخلت المكتب وقعدت على مكثبي وبعد كدة دخلت سمر.

\_ صباح الخير يا رنا.

= صباح النور يا سمورة.

فتحت اللاب بتاعي وبدأت أشوف اللي ورايا.

\_ هو أنا ضحككتي اتغيرت؟!

كان سؤال مفاجئ ليا من سمر، معرفش ليه رديت عليها بسرعة:

= أنا أصلاً بقالي كتير أوي ماشو فتكيش بتضحكي!

أول ما قولت كدة حسيت من سمر انها اتضايقت:

أنا آسفة يا سمر مش قصدي.

\_ لا أنتِ عندك حق يا رنا، أنا فعلاً بقالي كتير مضحككش بجدة.

= طب ليه؟!

\_ أصلي ارتبطت.

= نعم! طب ما دي حاجة حلوة! أنا أعرف ان اللي بيعحب بيبقا

مبسوط والضحكة على وشه منورة.



\_ ما هو أنا كنت فاكرة زيك كدا.. كان نفسي ارتبط وأحب واتحب؛  
 عشان أحلو أكثر والضحكة على وشي تنور زي ما كنت بشوف صحابي  
 البنات. أنا كنت طول عُمرِي نفسي أعيش قصة حب وابقا مرتاحة  
 وفرحانة بوجوده في حياتي، بس مكنتش متخيلة إنه لما يحصل وأحب..  
 حياتي تتقلب للأسوأ كدة! ياسين من ساعة ما ارتبطت بيه من سنة  
 مفرحتش.. اه بجد، أنا مفيش يوم عدى عليا منمتش فيه معيطة بسببه،  
 بحاول افكر مرة واحدة كان هو سبب في ضحكتي مش لاقية، كل ما  
 افكر مرة ضحكك فيها من قلبي يطلع حد غيره هو الي كان سبب  
 فيها.. أنا وصلت لمرحلة اني بشحت الضحكة.. بسرقتها! ياسين خلاني  
 اقطع علاقتي بكل الناس بحكم انه بيغير عليا وانه عايزني له لوحده،  
 المشكلة مش في كدة، المشكلة انه معوضنيش عن ده كله، ما ملاش  
 الفراغ الي عندي. عارفة! أنا لما كنت اتكلم مع حد من وراه بهدف  
 ارجع لحياتي الأولى؛ كنت بحس بذنب؛ كأني بخونه! بس أنا كنت زي  
 الجعان ويدور على لقمة تسد جوعه، ده لما كنت اضحك مع صحابنا  
 قدامه كان بيدب معايا خناقة؛ بقيت اداري الضحكة واكتمها لحد ما  
 نسيته.. أنا نسييت ضحكتي! نسييت كنت بضحك ازاى! أنا وحشتني  
 ضحكتي، وحشني احساسني بأني مبسوطة!! ياسين سرق فرحتي،  
 وراحتي، وسرق ضحكتي...

مقدرتش تكمل كلام من كتر العياط؛ أخذتها في حضني وحاولت  
 أهديها. سمر كانت منهارة أوي، أول مرة اشوفها في الحالة دي! سمر  
 زميلتي في الشغل، أعرفها بقالي سنتين، عُمرنا ما اتكلمنا في حاجة

شخصية، كل كلامنا كان في حدود الشغل أو هزار مع باقي زميلنا؛ يمكن ده الي كان مخليني ساكتة وبسمعها وأنا مستغربة هي ازاي فتحتلي قلبها كدة واتكلمت! بس سمر كانت عاملة زي البركان الي انفجر؛ كانت شايلة كتير أوي، يمكن الموضوع بيان لأي حد انه تافه بس لا؛ الوجة الي كان باين في صوتها وهي بتتكلم ورعشة ايديها ودموعها الي نازلة منها بيدل على إن الموضوع واجعها أوي، الموضوع فعلاً موجه أوي، خصوصاً إن سمر حد كان عفوي أوي، بتحب الهزار، والضحكة ماكتش بتفارق وشها، كانت شخصية خفيفة!

ازاي يكون الشخص الي المفروض يكون سبب في سعادتك وسبب في ضحككتك يكون هو سبب حزنك وإخفاءها؟! ازاي وجود شخص واحد في حياتك قادر يحولها من حياة مُبهجة لحياة سوداوية كئيبة؟

كلنا محتاجين الفرحة، محتاجين نضحك، كلنا نستاهل نكون مبسوطين.. العلاقات موجودة عشان تريحنا، مش تكون سبب في تعبنا! العلاقات موجودة عشان تكون مصدر للأمان والسعادة والسندة والراحة.. العمر أقصر من اننا نضيعه في علاقة غلط. أنيس منصور بيقول:

«إذا لم تجعلك العلاقة مع من تحب شخصاً أفضل؛ فأنت مع الشخص الخطأ».

كلنا محتاجين الضحكة زي ما بنحتاج لكلمة حلوة واهتمام. زي ما الكلمة الحلوة ليها تأثيرها الضحكة برضو ليها تأثيرها

ومفعولها كبير؛ ممكن تغير مودك وتجدد طاقتك.

يمكن كانت غلطة سمر انها حصرت حياتها في ياسين وبس  
وقطعت علاقتها بالناس، يمكن غلطتها برضو انها وافقت تكمل في  
علاقة استنزفتها!

بس الأكيد انها متستاهلش العقاب القاسي ده.

«يَوْمٌ بِلَا ضَحْكٍ.. هُوَ يَوْمٌ ضَائِعٌ».

تشارلي شابلن.

(٦)

## الوردة الحمراء

كان طول عمري نفسي يجيلي ورد، ومش من أي حد؛ لا ده شخص معين هو اللي يجيبه، كنا بنتمشى في وسط البلد، كنا من الصبح مع بعض، أكثر يوم كان مريح بالنسبالي، كنت حاسة اني قريبة منه أوي كأننا واحد مش اتنين، اه كان فيا شوية كسوف أو خجل، معرفش كان اي سببها، يمكن من الحب مثلاً! كان شكلنا واحنا ماشين زي المراهقين اللي هربانين من الدرس بتاعهم؛ بناكل ايس كريم ونضحك ونهزر، وكان كل ده بالنسبالي اعمم تمام عادي، لحد ما كانت المفاجأة بالنسبالي انه فجأة يقف عند ولد بيع ورد ويجيلي وردة حمرا ويديها لي!

دي لياا أنا دي؟! طب وهو ده بجد؟! يعني طول عمري نفسي حد يجيلي ورد ولما تجيلي وردة تبقا منك أنت.. من أكثر حد حبيته واتطمنت معاه، وأكثر حد متأكدة اني مش هكمل وياه...!!

وبرغم كدة مكنتش عارفة أوصف سعادي وقتها، كأنه أخذ الدنيا دي كلها ولفها لي هدية، كلها حاجات بسيطة بس تبقا بالنسبالي أجمل حاجة اتعملت، اه لو تعرفوا ان كل بسيط جميل، وان السعادة سرها البساطة والحب؛ أصل السعادة ببساطة بحركة صغيرة تطبع زي الوشم

في قلبي.

فضلت أقوله شكرًا ١١١ كثير، وكانت مع كل شكرًا بقوله بحبك، كان مصمم يبقا مميز عندي.

وقتها قالي جملة فاكراها كويس أوي، قالي: (يا رب بس مايحيش يوم وتمسكيها تقطعيها ولا ترميها؛ عشان كرهاني).

وكان ردي وقتها: (لا طبعًا، مهما حصل مش هعمل كدة).

ردت عليه بالكلام ده وأنا عارفة كويس ان ممكن أوي مشاعره الصبح تتغير من ناحيتي وبعد يومين منعرفش بعض تاني؛ كانت علاقة هوائية جوزائية من الدرجة الأولى، ويمكن ده كان سر تميزها، علاقة متفهمهاش برغم خسارتها.. عارف انك في علاقة خسرانة بس مرتاح يا أخي!

ويمر الوقت والحكاية تخلص وهو ميقاش موجود، بس فضلت الوردة معايا وكل ما يوحشني أطلعها من وسط الكتاب؛ عشان أشم ريحته فيها وابتسم واشيلها مكانها تاني.

- هي دي بقا حكاية الوردة الحمرا اللي لقيتها في الرواية يا سي هشام، حاجة تانية!

= في بس ملحوظة صغيرة بالنسبة لوجبة بيعج ماك تشيكن كومبو الي أكلتها لك اليوم ده، فين في الحكاية؟ ولا أنت زي الققط بتاكلي وتنكري! التفاصيل يا ماما، التفاصيل يا حبييتي، بعد اذنك اهتمي

بالتفاصيل شوية، وبعدين ايه حكاية مبقاش موجود دي! امال اللوح  
اللي قدامك ده ايه؟!

\_ مش يمكن بتكلم على واحد تاني!!

= نعمممممم يا ختي!!!!

\_ خلاص يا حبيبي بهزر؛ ده بس عشان الحبكة بتاعة القصة مش  
أكثر، يلا بقا عشريني برا عشان مش عاملة أكل.  
= (صمت).

(٧)

## بخاف عليك وبخاف نئسانى

= أوووف!

\_ مالك بتأفأفى ليه؟!

= تليفونه مقفول من الصبح ومش عارفة أوصله.

\_ بتخافى عليه؟

= أووووى، بخاف عليه أوى، وبخاف نئسانى.

\_ ازاي؟!

= كنت كل مرة بقابله فيهاا ببقا مبسوطه عشان هشوفه، بس برضو كنت ببقا خايفة عشان دي ممكن تبقا آخر مرة أقابله وأشوفه فيهاا.. كل مكان كنا بنروح.. كنت ببقا شايلة.. هم وقت ما هروح تانى وهو مش معايا فيه! كل صورة معاه وأنا بضحك فيها كنت ببقا خايفة برضو منها؛ عشان هترمي فالبوم الذكريات فى الدولاب أو هضطر امسحها من الموبيل عشان أحاول أنساه ومخلوش.. ريحته والموسيقى اللى بيسمعها.. الأفلام اللى اتفرجنا عليها سوااا، كل حاجة حلوة بعيشها معاه بعد كدة هتبقا مُرة وهو مش موجود فيها.. الذكريات مُرة طالما

صُحابها مبقوش موجودين.. كل ألفاظ الوداع مُرة.. والموت مُر.. وأيّ حاجه بتبعد الانسان عن الانسان مُرة..

بس على قد ما أنا كنت ببقا خايفة من الذكريات إلا اني كنت بعمل كل جهدي في العلاقة دي عشان أوثقها؛ كنت بكتب تواريخ الخروجات، بتصور كثير، بحتفظ بالتذاكر بتاعة الأماكن اللي روحناها.. كنت بحب اخده للأماكن الأثرية عشان أقوله بص في حاجات اهي بقالها سنين ومحدث قدر ينساها.. متنسائش! كنت كل مكان باخده فيه بحاول أسيب حته مني فيه عشان لما يروحه تاني يفتكرني، حتى لو مع غيري، بس يفتكرني، المهم ابقا ف باله.. مينسائش...! كان كل همي معاه انه مينسائش؛ مش عاوزة اتنسي عشان كذا حبيت التاريخ؛ عشان عُمره ما اتنسى. كنت عاوزة ابقا تاريخه الي مهمها راح ولا جه هيفضل موجود ويرجعله، الانسان لما بيتنسي بيموت، ومعنى انه ينساني ببقا أنا موت بالنسباله.. حتى الحنين للميتين مش هيبقا موجود.. عشان ناسيني. بس اكتشفت ان أنا الي مبنساش، أنا الي منستهوش.. المشكله فياا أنا اني مبنساش وغيري ينسى عادي.

أنا خايفة امشي ميمسكش فيا.. ولو مسك فيا ببقا مش من قلبه وابقا أنا مش اختياره..!

خايفة ميجيش من القرب غير الوجة..

خايفة احكم عقلي متبسّطش ولا ارتاح..

وخايفة احكم قلبي يوديني في داهية..



أنا خائفة.. خائفة، بس عاوزاه! وخائفة اني عاوزاه!!

= بتحبينه؟!

\_ ولا عُمرِي حبيت غيره.

= بس أنتِ دخلتي علاقات قبله، هو مكنش أول واحد.

\_ بس قلبي اختاره يكون أول واحد يسكنه.. كلهم مروا خدوا شوية مشاعر مني، إلا هو سكن القلب وبقا حته منه. الوحيد الي لما كنت بحس بيه احساسِي بيطلع صح كأننا توأم.

= وتفتكري بقا ايه الي خلاه يُسكن قلبك أوي كدة؟!

\_ كان مُختلف أو يمكن أنا الي شوفته حد مُختلف.

= ايوه يعني ايه الي كان مُختلف فيه خلاك تحبيه أوي كدة؟

\_ ارتاحت.

= ازاي؟.. احكي لي.

\_ كان مُريح بشكل بيخليني أحس اني قاعدة مع نفسي.. أنا حبيته من أول مرة شوفته فيها، أو بمعنى أدق ارتاحتله، ولا عجبني شكله ولا شخصيته ولا حتى اهتمت اعرف هو بيعمل ايه في حياته، الحاجة الوحيدة الي اهتمت بيها.. إن الشخص ده يكون في حياتي، وقد كان، دخل حياتي وكان الوحيد الي وجوده فريد فيها، مش عارفة دي شطارة منه ولا أنا الي اختارت ده!!

= وهو؟!

\_ ماله؟!

= حبك؟؟

(صمت؟)

= سكتي ليه؟!

\_ هو اللي نطقها الأول.

= وأنت؟!

\_ أنا حاولت ميينش اني بحبه، طول الوقت كنت بكذب احساسى بيه؛ بأنه لا مينفعش يكون احساسى ده حب.

= طب ولما قالها! أنتِ كان احساسك ايه؟!

\_ مش هنكمل؛ هو اتعود لكن محبش.

= ليه حسيتي انكوا مش هتكملوا؟ وليه حسيتي انه اتعود لكن محبكيش؟؟

\_ مش عارفة! احساسى بدأ كان قوي أوي برغم إن رغبتى فى اننا نكمل كانت أقوى.. عارفة على قد ما حسيت بفرحة انه قالها على قد ما حزنت؛ عشان حسيت انها كلمة النهاية.

= ليه احساسك بالفراق مسيطر على علاقتك بيه بالشكل ده؟

ده نتيجة علاقاتك السابقة ولا عشان بتخافي من الفراق؟!!

\_ علاقاتي السابقة وأنا معاه كانت بالنسبالي مش موجودة، كان وجوده لوحده سبب كافي في شفائي منها وبداية جديدة ليا.. اه خوفت من الفراق، وخوفت انه يكون جزء من أوجاعي، ويكون زيه زي أي حد دخلت معاه في علاقة ومكملتش.. بس مقدرتش أسيطر على احساسبي بفراقه ليا، مقدرتش، ودي كانت أكبر مشكلة عندي؛ انه احساسبي دايمًا بيطلع صح!

احساسبي بغلاوتي الي بتقل في قلب الي قدامي.. في المشاعر الي اتغيرت، في مكاتي الي اتبدلت، احساسبي بكل ده كان دايمًا بيدفعني للهروب.. الهروب من نفسي قبل الهروب من النهاية، الهروب من احساسبي الي هيطلع صح في الآخر.. طب ما اهرب.. أهرب قبل ما يطلع صح!!

\_ بتبصيلي كدة ليه؟!!

= هربتني منه؟!!

\_ معرفتش، كان نفسي اعمل ده لكن مقدرتش؛ كنت بحس دايمًا اني ضعيفة قدامه، وكنت بحس دايمًا انه أناني في ضمانه لوجودي.

= طب وآخرتها؟

\_ ما املكش غير اني أحبه.. هفضل احبه وأخاف عليه... وأخاف ينساني.

هو أنت مش ملاحظة انك عاملالي فيها دكتوراة نفسية وأنت حيالة  
لسة في تانية أداب علم نفس، ده ناقص تقوليلى مددي هناع الشيزلونج!

= لو ده هيرحك أكثر مددي مفيش مانع.

\_ هههههه مش اختي بس غلسة.

= ماشي يا ستي هعديها.. كملي بقاااا!

\_ مش هكمل حاجة؛ عشان هنزل أرواحه أتطمئن عليه بنفسي.

= أنتِ تعرفي ان علاقتكم دي علاقة حب معذب؟.. بس للذيد.

\_ وهو الحب ايه غير عذاب! باااي.

= باي.

(٨)

## حفلة مسار إجباري

(هذا الرقم مغلق أو غير متاح، يمكنك إرسال رسالة صوتية بصوتك؛ أطلب (\*) ثم رقم الهاتف واترك رسالتك).

- كان تليفون هشام مقفول كالعادة زي كل مرة بحتاجه فيها، ولما أخيراً اتفتح لقيته بيكلمني.  
= ألوو.

- أيوة يا هشام.. تليفونك كان مقفول ليه؟  
= معلش يا مها كنت مشغول شوية والموبيل فصل مني ومكنش في وقت عشان أشحنه.

- تمام.. أنا كنت بكلمك عشان حفلة مسار إجباري انهارده، اوعى تكون نسيت!

= لا لا منستش بس.. مها أنا آسف بجد مش هقدر آجي معاك انهاردة حقك عليا؛ ورايا مشاوير مهمة لازم أخلصها، وناس متفق آقبلها، sorry بجد.

- اعمم.. لا تمام مفيش مشكلة، مع اني متفقة معاك من اسبوع، بس

او كيه.

= مها متر عlish بجد.

- لا خالص مش زعلانة.

\*قفلت معاه وطبعًا كنت بغلي.. مشاوير ايه وناس مين دول اللي متفق معاهم يقابلهم؟! ايه أهم من انه يشوفني؟!

بس للأسف هو أي حاجة عنده أهم مني، أنا عمري ما كنت من اهتماماته؛ هشام دايماً بيعاملني بمزاجه، يهتم وقت ما يحب يهتم، ونتقابل وقت ما هو يحب يشوفني، حتى اشتياقه ليا بمزاجه! كان نفسي هشام يحبني طول الوقت زي ما أنا بحبه طول الوقت.. مش ساعات بيعبني وساعات مش شايفني أصلاً!! دايماً يغيب غيبته ويرجع يلاقيني مستنيه. الغريبة إن كل مرة بيغيب فيها بقول هعمل واسوي واخد موقف وانه لازم يعرف اني مش دايماً متاحة لحضرتة.. بس أول ما بيرجع بنسى كل حاجة، ومع أول ضحكة منه بنسى أصلاً هو زعلني في ايه؟!

غيابه وقلة اهتمامه ساعات بتخليني أشك فيه، مش انه بيخوني لا.. انه بيعبني من أصله، وافضل أسأل نفسي هو لسه بيعبني؟ طب وحشته؟ ييفكر فيا؟ عايزني؟!!!

أوقات كتير بيقا نفسي أمسكه كدة وافضل أسأله كل الأسئلة اللي محيراني ووجعاني دي، حتى لو اجابته هتجرحني بس مش مهم؛ جرح

وهيداوى مع الوقت ارحم من ندبات وجروح طول الوقت من حيرة مبتتهيش .

سحر صاحبتى كانت دايمًا تقولي (نحك الي أنت مشغلاه زي المكنة ده ليل نهار في التفكير في هو يبحبك ولا لا، تفكيرك في الطقم الي أنت هتلبسيه بكرة أهم منه، الي يبحبك مش هيسيبك تفكري لحظة هو يبحبك ولا لا!!!).

وهشام مبيعلمش حاجة غير انه بيخليني اتسحل في التفكير، أكثر حاجة كنت مفقدها معاها مش وجوده على قد ما كنت محتاجة الأمان معاها؛ بأنه بيحبني وعازيني، الأمان بأنه مش هيسيبني وأصحى في يوم ألاقية عايش حياته مع واحدة تانية.

أعتقد أهم حاجة ممكن يقدمها الشخص لحد بيعبه انه يخليه متظمن .. متظمن وبس، وأنا هشام عمره ما طمني!

جات الساعة ٧ مساءً، لبست ونزلت عشان أروح الحفلة، صحابي كانوا مستنيني، وطبعًا كان نفسي هشام يكون معايا خصوصًا في الحفلة دي؛ كانت أمنيته اني اقضي مع الي بحبه حفلة لمسار إجباري واسمع الأغاني الي بحبها وأنا معاها.

روحنا الحفلة وكانت فعلاً حلوة أوي، وأنا من كتر ما كنت مبسوفة كنت بحس اني فعلاً محتاجة هشام.

ومع صوت هاني الدقاق وأغنية (أنا هويت) لقيت دموعي بتنزل

لما افتكرت اني بهجره ليا ارتضيت.. وبفكر غلبي في حبي ليه مع أغنيه  
(والله تستاهل يا قلبي) وانه أسباب كل كربى هو أسباب ما جرائى.

وفي وسط ما أنا بفكر فيه وأنا بسمع الأغاني كان جنبى شلة صحاب،  
كان فيهم ولد مركز مع بنت أوي وكان جنبى والبنت كانت قدامى،  
كل شوية يصورها وهي مش واخدة بالها ومندمجة في الرقص والغنا..  
في مقطع لهاي الدقاق وهو يقول (ضحكة من الحلوة ترد الروح تفتح  
شبابيك وبيان البيت) لقيته بصلها ويضحك أوي وهي مش مركزة،  
كان باين انه عشقان وكاتم جواهر مكنش باين عليهم انهم مع بعض،  
بس واضح انه بيحبها أوي.

للحظة ركزت قد ايه احنا بنسحل نفسنا مع ناس غلط، أو مع ناس  
صح بس وقتهم غلط، أو مسحولين مع ناس مش شايفانا أصلا، أو  
شايفانا مجرد سد خانة. ممكن المعافرة مع الناس دول مبتجش غير وجع  
القلب والتعب، يمكن الصبح إن مع أول رسالة من ربنا إن الناس دول  
غلط انك تجري، اه تجري وتهرب كمان؛ أصل هتعافر ليه في حاجة مش  
ليك، ما بلاها أحسن!

الموقف دا حسسني قد ايه احنا محتاجين نتحب صح، ومش مرغمين  
نقبل بنص ناس، بنص قلب، بناس مش معانا، بناس بتحب نفسها أو  
حطانا علي جنب احتياطي لما محتاجونا.

احنا محتاجين نتحب صح، وعشان نتحب صح لازم نستنى الناس  
الصبح في الوقت الصبح.



بعد ما الحفلة ما خلصت روّحت البيت وأنا واخدة قرار بإني مش هقبل بنص علاقة، أو بنص حب، بنص قلب، بنص شخص.

أنا فعلاً من حقي أتحب الحب الكامل؛ اللي يخليني سعيدة ومتطمنة. لقيت هشام بيرن عليا بليل استغربت انه افكرني أصلاً! مردتش عليه وقفلت الموبيل ونمت، نمت وأنا مقتنعه تماماً إن أنا أستاهل أتحب.

## (٩) حَبَّةُ حُب

أنا لحبيبي وحبيبي إلي  
يا عصفورة بيضا، لا بقى تسألني  
لا يعتب حدا ولا يزعل حدا  
أنا لحبيبي وحبيبي إلي  
حبيبي ندهني قالي الشتا راح  
رجعت اليمامة، زهر التفاح  
وأنا على بابي الندى والصباح  
بعيونك ربيعي نور وحلي  
أنا لحبيبي وحبيبي إلي

صحيت على صوت فيروز؛ اللي ماما بتغني معاها في المطبخ، وهي  
بتجهز لنا أحلى فطار على أنغام فيروز  
\_ سيدي يا سيدي، ده ايه الروقان ده كله! وأنا لحبيبي كمان لفيزوز.

= صباح الخير يا قردة.

\_ صباح الفل يا قلب القردة.. ايه الفطار الجامد ده؟

= أي خدمة.. عشان تعرفي قيمه الدلع دااا بعدين لما تتجوزي.

\_ والله يا ماما أنا حاسة إن جوازي أنا ومازن هيفشل بسبب الفطور  
مش الفتور، مش متخيلة نفسي اصحى من بدري كدة عشان أجهز  
الفطار وأكّله قبل ما ينزل؛ أنا عُمري ما عملتها.

= مش أنت بتحييه...؟! يبقا هتلاقي نفسك بتقومي من أحلى نومة؛  
عشان تحضريله أحلى فطار، وهيكون على قلبك زي العسل عشان  
عملاه من قلبك.

«دايمًا بحس إن حُب الأمهات مُختلف عن أي حُب ثاني؛ دايمًا حُبهم  
مربوط براحتك وسعادتك وكأنهم مهمتهم الأولى انهم يشوفوك  
مبسوط ومرتاح، وتلاقي الأم من دول تعبر عن حُبها بالأكل، اااه  
بجد.. عُمرك بصيت على مامتك وهي واقفة في المطبخ بتطبخلكم؟  
بتبقا بتتوجع من رجليها اه من كتر الوقفة، بس بُص على وشها هتلاقيها  
بُتُبخ وهي مبتسمة، وتعمل الأكل بحب بتوابل مخلوطة بمشاعر حب  
وحنية ودلع وخوف، شوفت ماما لما بتكون مسافر بترجع تلاقيها عاملة  
ايه؟! مجهزالك سُفرة طويلة عريضة فيها كل اللي بتحبه.. ولا لما بترجع  
أجازة من الجيش بتلاقيها مستنياك بالمحمر والمشمري الي أنا مش عارفة  
هو ايه أصلًا المشمر ده!! بس هتلاقيها بتجهز هولك، وتفضل تزغط  
فيك. ماما مثلاً لما بتحب تفاجئني بلاقيها عاملاي آكلة حلوة بحبها،

مثلاً الحلويات.. ماما عندها السُّكر بس على طول تعمل ليا أنا وبابا البسبوسة؟ عشان احنا بنحبها، ولما نزعقلها عشان السُّكر ما يعلاش ونبقا متضايقين انها مش عارفة تاكل منها بترد علينا بجمله واحده (لما انتوا تاكلوها كده وتبسطوا كأني بالظبط أنا اللي كلتها) طب بالذمه في حُب كده؟!..

\_ امم.. زيك كده يا جميل لما بتقوم قبلنا كُلنا عشان تجهز لنا الفطار؟

= طب وهو أنا ليا غيركم؟!

\_ ربنا يخليك لينا يا اا رب، امال فين بابا صحيح؟

= جهزتله الفطار ونزل من بدري، أنتِ الي رايحة فين؟!

\_ ما هو مازن عازمني على الفطار انهارده؛ وعشان مش هيقدر يبجي معايا الحفلة بليل.

= والله مازن ده مدلعك مش عارفة على ايه!

\_ الله! في ايه يا ماما! أنتِ حماتي ولا حماته!

= هههههه ربنا يسعدكم يا حبيتي.

\_ يا رب يا ماما، أنا همشي بقا عشان متأخرش عليه، عايزة حاجة يا بسبوسة؟

= سلامتك يا حبيتي.. خلي بالك من نفسك وسلميلي على مازن.

\_ حاضر.. باي باي.

وأنا نازلة لمحت ورقة على السُفرة؛ كانت جواب من بابا لماما (أنا كنت متضايق امبارح.. لكن انهارده نسيت أنا كنت زعلان من ايه؛ بعد الفطار الجميل دا، تسلم ايدك يا حبيتي.. صباح الورد).

مستغربتش خالص الجواب؛ لأن بابا متعود يكتب لماما جوابات من زمان من قبل ما يتجوزا حتى. قد ايه كان نفسي أكون في زمن الجوابات والبُوسطة! كان كل حاجة ليها طعم المشاعر الصادقة المكتوبة بخط الايد، وعمرك ماتنساها؛ اللي بتشوف صورة الشخص في سطورها، وتسمع صوته في كلماتها، وتشم ريحته في الورقة، كل التفاصيل دي بتخطف القلب وتعلم فيه زي الوشم.. قراءتك للجواب كل يوم وكأنه يقولك بحبك، في كل مرة بتقراه فيها احساسك بالكلام اللي هتلاقيه مبيتغيرش، برغم انك قريته ١٠٠ مرة احساس ثابت.. قد ايه الجوابات بخط الايد والمشاعر المكتوبة بتخطف قلبي! وهفضل الطريقة المفضلة عندي للتعبير عن المشاعر إلى الأبد؛ لأنها الأصدق والأجمل.. يا بختك يا ست ماما بيجيلك جوابات!

نزلت وركبت عربيتي، ورايحة لمكان مازن بعثلي اللوكيشن بتاعه عشان معرفهوش، شغلت الراديو اللي عُمرى ما هبطل أحبه أو اسمعه؛ لاني شايفاه اختراع فريد، ومش مُتخيلة أبداً إن ممكن يبجي يوم وميكونش فيه راديو!!

كانت أغنية عبد الحليم «أول مرة تحب يا قلبي» وفضلت أغنيها معاه..

أول مرة تحب يا قلبي وأول يوم اتهمني ياما على نار الحب قالولي  
ولقيتها من الجنة أول مرة أول مرة

ليه يقولوا الحب قاسية ليه يقولوا شجن ودموع

أول حب يمر عليا قادي الدنيا فرح وشموع

افرح واملا الدنيا أماني

لا أنا ولا أنت حنشق تاني

أول مرة أول مرة

«من وأنا صغيرة نفسي اعرف ايه هو الحب دااا.. ايه الحاجة الي من  
حرفين بس عاملة قلق كبير كدااا؟ حاجة صغيرة أوووي بس تأثيرها  
كبير أوي أوي، حاجة بتيجي كدة تشقلب كيالك.. بس للأحلى

ايه الحب ده الي الكل غناله ووصفه بكل الصفات الي في الدنيا،  
ولسه برضو معروفش يوصفه صح!

ايه الحب دااا الي جامع بين حلاوة الدنيا ومرهاا؟ بين الجرح  
والفرح! والعذاب والراحة، واليأس والأمل!«.

أول فرحة تمر بقلبي وأنا هايم في الدنيا غريب

قُلي احكي والا أخبي والا أوصفها لكل حبيب

وأنا بغني في العربية والإشارة واقفة لقيت ولد صغير في العربية

الي جنبي بيصلي ويضحك أوي.. ضحكته طبعًا؛ مهما كُنت مين  
هتضعف قصاد ضحكة طفل صُغير، لقيته بيعمل باي باي وبيعتلي  
بوسة في الهوا.. في جمال كدة؟!

أهو الحب ده عامل زي الطفل الصغير بيعرف يخطفك ويجذبك له،  
ويقدر من حاجة صغيرة أوي يعملها يهز كيانه، يقدر يخليك تشوف  
حاجات عمرك ما شوفتها، وتفهم حاجات عمرك كله ممكن متعرفش  
تفهمها لو محبتش؛ وهي إن الحياة بسيطة، والحب بسيط، والتعبير عن  
المشاعر بسيط، بس احنا الي بنكلكعها!!

افرح واملا الدنيا أمانى لا أنا ولا أنت حنشق تاني  
أول مرة أول مرة

قلبي يعيد لي كل كلامك بكلمة يعيدها عليا  
لسة شفايفك شايلة سلامك شايلة أماره حبك ليا

وصلت المكان ودخلته، والحقيقة المكان عجبنى أوي من أول ما  
دخلت المكان، هادي وشيك وصوت أم كلثوم في أنت عمري الي  
سرق قلبي وريحة القهوة، كله كله كان عجبنى. مازن دايمًا بيعرف يختار  
الي بيعجبني ويخليني مبسوطة.

اختارت تربيذة في نص المكان بس من ورا؛ وطبعًا عشان أمارس  
هوايتي المفضلة اني أراقب الناس، مش فضول مني؛ ولكن دايمًا  
بيشغلني حكاية الناس الموجودة في المكان، بحب أتأمل وشوشهم.

قعدت وفضلت استمع لاغنيتي المفضله لأم كلثوم (انت عُمرى)  
وسرحت مع كلماتها..

صااحت بك أيامى

سااحت بك الزمن

نستنى بك آلامى

ونسيت معاك الشجن

ودعونى عنىك لأيامى الى راحوا

علمونى أندم على الماضى وجراحه

الى شفته قبل ما تشوفك عنية

عمر ضايح يحسبوه إزاي على

الحب هو الى يخلينى انسى الألم، هو الى يخلينى أبدأ حياة جديدة،  
ويشفي جروح الروح والنفس والقلب، هو ده الحب.. الحب شفا..  
وقبول الحب الى يخليك تبدأ عُمرى من جديد وتعيشه بسعادة حتى لو  
العُمر ده كان يوم واحد، بس بالنسبالك هو ألف عام؛ عشان مع الى  
بتحبه.

وفى وسط سرحانى لاحظت اتنين كُبار فى السن قاعدين على تربيضة  
فى جنب الكافيه، كان شكلهم حلو أوى وهما بيتكلموا مع بعض  
بشغف كأنهم اتنين لسة فى بداية علاقتهم، كل واحد بيسمع التانى



باهتمام والضحكة على وشهم، ومسكت ايديهم لبعض، كلها بتقول انهم اتنين بيحبوا بعض أووي، وطبعاً فضولي خدني ان اسأل الويتز عنهم لما جه يشوفني اشرب ايه، وعرفت منه ان من ساعة ما اشتغل في المكان وهما كل يوم الصبح بييجوا يشربوا قهوة مع بعض هنا وانهم متجوزين من زمان أووي لكن مخلفوش أولاد.

«الحب عامل زي اتنين عواجيز أصدقاء، فضلوا صحاب حتى بعد ما عرفوا بعض كويس، وبقا كل واحد فيهم مألوف للتاني، وفضلوا برضو أصدقاء ويحبوا بعض».

بصيت في ساعتني لقيت مازن متأخر نص ساعة عن ميعاده، بس كنت عارفة ان الي آخره عليا الطريق؛ لأنه دايمًا مواعيده مضبوطة. وأنا مستنياه دخلوا الكافيه ولد وبنت شكلهم يقول انهم مخطوبين أو بيحبوا بعض، مش صحاب خالص، أول ما قعدوا البنت لمست ايديه وكأنها بتواسيه وهو بصلها وابتسم وبدأ يتكلم وهي كانت بتسمعه باهتمام أووي.

أنا مقدرش أوصف الحب وأقول إن هو ده.. هو ده معناه.

بس اقدر أقول الشخص الي بيحب ده بيحس بأيه.. بيحس انه مبسوط طول الوقت حتى لو فيه حاجات كتير تضايقه، الشخص الي بيحب بيتسم حتى وهو جواه تعب الدنيا.. فجأة بيحس إن كل حاجه سهله وبسيطة وممكنه، مش معقدة زي الأول، أمله في بكرة بيزيد، حبه في الحياة بيزيد، يشوف إن الحياة حلوة فعلاً بس احنا الي مكناش

فاهمنها، احنا الي محبناش؛ الي يحب وييتحب بيتطمن، بيحس بأمان؛ كأنه محضون طول الوقت؛ حاسس بدفء الحضن والاحتواء من غير تلامس.

\_ ملك، أنا آسف يا حبييتي اتأخرت عليك.

«لما بتحب شخص بتحس ان نطقه لاسمك مختلف بتحس بأمان بمجرد ما بينطق اسمك بس،

بتشوفه دايماً مبهر في كل حاجة بيعملها حتى لو بسيطة، مش بس في البداية، ده على طول».

= ولا يهملك يا حبيبي أنا عارفة ان الطريق كان زحمة، وبعدين كفاية المكان الحلو ده.

\_ هو مفيش حد حلو غيرك أصلاً، وحشتيني.

= وأنت كمان.. بس حلو الطقم ده؛ شيك.

\_ بجد؟ أصله ذوق خطييتي.

«الحب ممكن يخليك تلبس قميص معين كل يوم؛ لمجرد ان الشخص الي بتحبه قالك انه شكله حلو عليك، الحب هو انك تبقا عاوز تشوف شخص معين في يوم زحمة ومُتعب؛ عشان راحتك في رؤية الشخص ده بس».

= أنا مبسوفة انك اختارت اننا نتقابل في وسط الاسبوع ونفطر

سوا، وكم ان مش في أي مكان وخلاص.. حتى وأنت مشغول.

– اني اشوفك بس دي طاقة لوحدها تخليني اتحمل أي حاجة، أنت متعرفش ازاي الوقت معاك بيفرق ازاي معايا، ربنا يخليك ليا.. يلا بقا نفطر عشان أنا جوعتك، حقك عليا!

فضلنا نتكلم أنا ومازن ومكناش حاسين خالص بالوقت، مش عاوزينه يخلص، دايمًا بحس نفسي وأنا معاه اني خفيفة؛ بتصرف براحتي، باتكلم بتلقائية وأنا عارفة اني مش محتاجة أبرر لأي حاجة بقولها أو بعملها.

حُبك للشخص بيبان في رغيك وكلامك بسرعة الي مش مترتب ومبيخلصش؛ لمجرد انك مبسوط، وبيبان برضو في سكوتك؛ الي يخليك عاوز تسمع الي بتحبه.. تسمعه بقلبك قبل ودنك، وبيان في لمعة عينك لما بتشوفه.. عارف تعرف منين انك بتحب بشكل أقوى وأجمل؟! بانك تحب الشخص الي بتكرهه؛ لما بتحب مش بس هتحب شخص واحد؛ الحب قوى بتفرض نفسها فتخليك تحب كل الي حواليك.

الحب عمره ما كان مرض بيضرب الانسان في أكثر مكان ضعيف فيه.

الحب علاج للأمراض كتير.. بس وارد ناخذ علاج غلط.

أنا ممكن أوصف الحب من هنا لبكرة، وبرضو مش هعرف!

بس الحاجة الي متأكدته منها إن مفيش حد بيبقا متضايق انه بيتحب..

احساس انك محبوب كفاية يحسك بالسعادة.

\_ أنا للأسف لازم امشي؛ عشان اتأخرت على شُغلي.. بس أنا  
مبسوط اني شوفتك متزعليش هعوضك في الويك اند.

= ولا يهملك يا حبيبي.. كفاية انك صممت تشوفني في يوم زحمة  
زي ده.

\_ أنتِ الحُب كله يا ملك.

= وأنتِ عُمرِي.

\_ طب أغدًا ألقاك بقا.. ولا ايه؟!

= ياريت!

\_ خالصين، الفطار عليكِ بكرة.

= موافقة.. كان نفسي تكون معايا انهارده؛ حاسة اني متوترة أوي  
عشان أول مرة.

\_ أنا آسف يا حبيبتِي بجد، كان نفسي أنا كمان أكون معاكِ بس  
غصب عني.. عمومًا أنا عارف انك هتبقي قدها وهتكسري الدنيا أنا  
مُتأكد.

= ان شاء الله.

\_ يلا عشان تلحقي تجهزي.

= يلا.

روحاً و تجهزت كام حاجة قبل ما أروح الحفلة.. كانت حفلة عملاها المؤسسة اللي باشتغل فيها، ومش عارفة اختارت اقدم فيها حاجة للناس. كُنت متوترة أوي أول ما الحفلة بدأت، وأول ما جه وقت طلوعي على المسرح اتوترت أكثر ونبضات قلبي زادت، وأول ما طلعت اتفاجئت بمازن وبابا وماما موجودين وفي أول صف، هُما كدة حبايبك ميعبوش يسيبوك في اللحظات المهمة خصوصاً لو متوتر فيها، بيعحبوا يبقوا جنبك ويساندوك ويفاجئوك عشان تفرح.. لما شوفتهم قلبي هدي واتطمنت وبدأت أتكلم.

\_ احم، معلش متوترة شوية؛ أصل أول مرة اتكلم قدام جمهور.. بس بما اني جاية انهارده اتكلم عن الحب فلازم أكون شجاعة وامتكسفش؛ أصل الحب شجاعة مش مجرد كلام حلو وخلاص، ولا شوية اهتمام، ولا مشاعر بشرية بتتغير وتتحكم فينا، فالحب يزيد وينقص حسب المواقف والأشخاص والحالة اللي احنا فيها، احنا طول ما قلبنا بيدق وبنحب احنا عايشين.

الحُب مش مُجرد علاقة؛ الحُب حياة فيها هات وخذ، بنحب مش عشان اللي قدامنا يستاهل قد ما الحب اللي في قلبنا له بيعرف يقبله زي ما هو، ويفهمه، ويشوفه زي ما هو من غير تزويق أحلي حاجة خلقها ربنا.

الحب ونس؛ الصاحب اللي بجد اللي بيعرف محتويني ويسمع ويطببط بنلاقي معاه الونس، والعيلة ونس، وعلى فكرة مش شرط

الونس يكون شخص .. الكتاب الحلو الي بتقراه ومستمتع بيه ده ونس،  
موهبتك الي بتقضي فيها أسعد لحظات حياتك ونس، نجاحك ونس.

الحب قبول؛ مينفعش احبك من غير ما اقبلك، مينفعش احبك  
واخليك مش حابب ولا قابل نفسك، والحب الحقيقي غير مشروط،  
لو الحب بشروط يبقى مينفعش نقول عليه حب؛ هيقا حاجة تانية.

الحب قوة وأقوى سلاح ممكن الواحد يستخدمه، أنت تعرف تهزم  
العالم كله بالمحبة، متستهونوش بالمحبة؛ دي صابنة معجزات .. المحبة  
هتخليك تواجه، المحبة هتعلمك الشجاعة. والحب بيان في تقديرك للي  
قدامك، واحترام ضعفه، وقبولك له زي ما هو.

الحب حُرّية .. اختيار .. فعل خير ماشي على رجلين، وتحب قريبك  
كنفسك.

أنا طولت عليكم، بس أنا بجد مبسوسة انكم سمعتوني وادتوني  
فرصة أتكلم وأخرج الي جوايا، وعلى فكرة ده حب؛ انك تسمع،  
وتحس، وتفهم.

شكرًا.

(١٠)

## صفحة جديدة

جديدة ابدأها باللي اتعلمته.

دايماً أسمع إن الحب مش سبب كافى إن العلاقة تكمل، اختيار القلب مش دايماً صح، والعقل لما بيختار اختياراته مش بتخليك مبسوط.. يمكن عشان أغلب الوقت بيكون عكس قلبك!

طب والارتياح؟! الراحة اللي بتخليك مبسوط ومتظمن سبب كافى يخليك تكمل؟

أنا وطارق كنا وجهين لعملة واحدة، توأم فى الروح، تشابه شخصياتنا كان دايماً مخلينا مرتاحين.. فهمنا لبعض من غير ما نتكلم بيوفر كثير من جهد شرح احساسنا واحتياجنا.

عمري ما حسيت اني مليت ان فيه حد شبهي بالشكل ده؛ بالعكس التشابه ده كان بيخليني متظمنة إن فى حد فاهمني، حد شايفني من جوا قبل من برا، وقبل ده كله مرتاحة ومش محتاجة أبرر أي حاجة بقولها أو بعملها، وده ميمنعش إن كان فى اختلافات فى الطبع والميول، وده مكش بيزعجنى أبداً، بالعكس كان بيكمل النواقص اللي فى.

كان بقالنا اسبوع مبتكلمش وده بسبب تغيري المفاجئ معاه؛ اللي كان بسبب مشاعري اللي كل مدى في زيادة، مع حزن مستمر، وخوف من فقد الشخص ده، وعدم الارتياح للمنطقة الرمادي، فكرة الباب المتوارب الي خايفة ييجي اليوم الي ازهق فيه وأقفله، وساعتها لو قفلته ممكن أوي مقدرش أفتحه تاني.

قررت أكلمه في التليفون وتتقابل؛ كان نفسي نقعد نتكلم بصراحة في علاقتنا؛ عاوزة أعرف أنا ايه بالظبط عنده، وآخره الي احنا فيه ده.. احنا كنا بالظبط زي ما قال سيد مكاوي في أغنيته «لحد امتى يا عيوني انت نبقا حبايب ومش حبايب».

كان نفسي أقف على أرض ثابتة، ورغم اني كنت عارفة رأييه في الموضوع ده إلا اني كنت عاوزة اسمعه منه؛ أوقات مصارحة الي قدامك وجوده في قولها بيقويك انت في تنفيذ قرارك، وأنا كنت عاوزاه هو الي يقويني.. وفعلاً كلمته.

\_ الو.. عامل ايه؟

= الحمد لله، أنت عامله ايه؟

\_ أنا كويسة.. أنا كنت حابة نتقابل.

= تمام حلو، امتى؟

\_ بعد بكرة كويس؟

= حلو أوي تمام.



\_ تمام.. باي باي.

= باي.

كانت المكالمة صغيرة أوي، وهو كمان كان صوته متغير؛ يمكن كان متضايق مني ومن تغيري معاه في الفتره الأخيرة، بس كان غصب عني، يمكن كانت أكثر فترة محتاجة فيها لحضنه وانه يطمني هي الفترة دي.. أنا كنت محتاجة أتطمّن.

قفلت معاه وبدأت افكر هلبس ايه لما أروح أقابله؛ كالعاده كنت عاوزه شكلي يكون حلو ولبسي يعجبه، لبسي الي بقيت انزل اجيبه على قد ما أقدر على ذوقه هو.

الوقت الي كان قبل مقابلتنا عدى وكأنه سنة، كان وحشني، وحشني أوي، كنت حاسة اني بمجرد ما هشوفه هترمي في حضنه وأعيط.

\_ اتأخرت عليك؟

= العادي بتاعك يعني مش جديد عليك.

\_ هههههه، على فكرة بقا أنت الي جاي بدري.

= أنا! اه أيوة طبعًا، أقولك.. أنا الي كلت الجبنة كمان، بس تتحسدي؛ أول مرة أنت الي تطليبي انك تقابليني.

\_ أولاً عشان أنت واحشني جدًّا، ثانيًا عشان نخط حد للعلاقة دي، نعرف راسنا من رجلينا.

= مفيش فايده! ما قولتلك مش هينفع، مش هينفع تكوني حاجة غير صاحبتني.

حسيت الجملة نزلت على قلبي فلقتة نصين، الجملة خضتني خصوصاً انه قطع بيها كلامي ومسمعنيش للآخر، حسيت فجأة اني اتعريت قدامه، وكنت مكسوفة منه أوي، كنت عاوزة الأرض تشق وتحضني، وحضنه اللي كنت محتجاه وقتها كان حلم مش من حقي، كان هيعريني زيادة لو كنت اترميت فيه.. كنت عاوزة أجري اهرب من عينيه اللي شوفت نفسي فيها قليلة أوي، بس ربنا ألهمني الصبر والقوة، خدت نفس وبكل هدوء رديت عليه:

\_ طب يا عم ما هو في فايده أهو من مقابلتنا، بسيطة خالص احنا كنا بنهاتي وبنقاوح في ايه كل ده! مش عارف تشوفني حاجة تانية غير صاحبتك بغض النظر عن علاقتنا انها مش صحاب، بس تمام ده يأكللي انك محبتنيش أصلاً من الأول وولا هتحنيني، أنت شوفت نفسك اتسرعت لما قولتها وأنا اتشعلقت في حبال دايرة.. عادي خالص مفيش حاجة.

فضلت اتكلم معاه في أي حاجة تانية، وبعدين استأذنت أمشي بحجة إن ورايا مشاوير اعملها، رocht على البيت على طول ومفكرتش في أي حاجة ونمت، وتاني يوم صحيت كأني لوح تلج، مش عارفة أحس بحاجة ولا زعلانة ولا مبسوطة ولا حتى مرتاحة، فضلت على الحال ده كذا يوم لغاية ما عدى اسبوع والتاني، وهو مكلمنيش ولا حتى فكر

يبحث رسالة يتظمن عليا بيها من باب اننا صحاب على الأقل.. الأيام جرت بعضها لغاية ما بقيت شهر.

وأنا كنت كل يوم باموت بالبطيء من الانتظار وأنا مستنيه يراضيني أو يطيب بخاطري، أحس على الأقل اني فارقة معاه.

هو مش احنا صحاب وأنا غالية عندك؟! طب فين بقاا؟! هونت عليك كل الفترة دي متسألش عليا وأنت عارف اني هكون تعبانة من غيرك، سحبت وجودك مرة واحدة، دبحتني بسكينة تلمة بانتظاري ليك كل يوم وبمكالمتك الي تصلح كل حاجة، كل يوم مكتش بعمل حاجة غير اني بمسك تليفوني واستنى يمكن انهارده تحن.. يمكن تفتقدني، يمكن أوحشك وتكلمني، يمكن العشرة وذكرياتنا تحن قلبك عليا وترجع، ده أنا مش طالبة منك غير وجودك.. يا طيب ايه اللي قساك عليا كده؟!

فجأة حسيت إن أحن شخص كنت بشوفه قسوة العالم كلها اتجمعت فيه، طب أنا موجعتوش بيقسى عليا أنا ليه؟!

كانت فترة مميتة اتجمعت فيها كل مشاعر الحزن والفقد والاشتياق.. خيبة أمل على خوف من فراقه وحنين لأماكن جمعتنا، ذكريات مش عاوزاها تكون مجرد ذكرى بدون وجود الشخص، كنت خائفة أعيش مشاعر الوجد بعبه، رافضة انه يكون مجرد علاقة فاشلة وانتهت زيه زي أي حد، مش عارفة ليه بالذات مكتش عاوزاه يكون بالصورة دي، مش زعلانة منه، لكن فكرة إن الوجد جاي منه هو.. فكرة مش

متقبلاها.

ومفوقتش من الدوامة دي غير على دعوة منه على خطوبته على واحدة زميلته، معملتش حاجة غير اني فضلت أضحك، أضحك أووي.

وحطيت همي جوا شنطة ومشيت.. مشيت من غير راجعة، مشيت وأنا مقررة اني مش هبص على اللي فات، وھفتح صفحة جديدة باللي اتعلمته.

(١١)

## فضفضة

كان يوم الجمعة من آخر الشهر، اتجمعت أنا وصحابي البنات عندي، أصل أنا وصحابي متعودين اننا نتجمع عند واحدة فينا كل شهر، نقعد مع بعض نتكلم ونحكي في أي حاجة مضايقانا أو حتى نفك عن نفسنا شوية بدل ضغط الشغل طول الشهر.

بس المرة دي كانت القعدة مختلفة؛ لأننا مكناش بس بتكلم في حاجة مضيقانا، لا كانت الحاجة الي مخوفانا كمان، فضلنا نتكلم عن مخاوفنا الي بسببها بقينا عايشين زي الميتين، مفيش متعة، مفيش راحة، مفيش طاقة حتى اننا نقوم بالحاجات العادية في يومنا زي الشغل مثلاً، حتى خروجاتنا الي المفروض بنكون فيها مبسوطين كانت قعدتنا فيها بتكون مهمومة بسبب الثقل الي في روحنا.

طلبنا غدا من برا، طلبنا بيتزا أهى حاجة يمكن تبسطنا شوية وخلصنا أكل، ودخلت اعمل طقم شاي لينا، وبدأت فرح الكلام، أهى فرح دي بقا تعتبر أعقل واحدة في الشلة؛ شخصية قوية و مثقفة بتحكم عقلها قبل قلبها دايمًا، بتعرف توزن الأمور بس ده ميلغيش بإنها شخصية حساسه وبتتأثر أوقات كتير بمشاعرها، بس هى ذكية

وبتعرف كويس تفصل ومتخلّش مشاعرها هي اللي تمشيها، عشان كده ركزت معاها لما اتكلمت خصوصاً انها بدأت كلامها بسؤال.

فرح: بنات في حاجة كدة بتحصل معايا، مش عارفة بتحصل معايا أنا بس ولا انتوا كمان! أنا ماما بقت تضغط عليا في موضوع الجواز ده بالتخويف.

سحر: بالتخويف ازاي يعني؟!

فرح: يعني تخوفني بإنني ممكن لو طولت ومتجوزتش مش هخلف، أو هتجوز واحد كبير في السن وده لأن فرصتي في الجواز بشخص في سني قلت.

استغربت فرح جداً في الوقت ده؛ لأنها عمرها ما كانت بتتهم بموضوع الجواز ده، أو انها تخلف، أو متخلفش، دايمًا بتمشي في المواضيع دي بجملّة واحدة لما ربنا يريد هلاقي نفسي مع شخص مناسب مرتاحة معاه وبحبّه، ولغاية ما ييجي الوقت المناسب والشخص المناسب أنا مش مطلوب مني غير اني أركز في حياتي وفي مستقبلي وصحتي، غير كده مش مطالب مني اعمل حاجة تانية، يعني ولا أركز مع فلانة انها اتخطبت قبلي ولا مع علانة انها اتجوزت وخلفت وأنا لسة سينجل زي ما أنا.

كملت فرح كلامها، وقالت: أنا عارفة ان كل شيء في إيد ربنا طبعًا، بس أنا غصب عني بقيت بخاف، بقيت بحس ان ماما بتلعب معايا على حته الغريزة بتاعة الأمومة الموجودة عند أي بنت فأخاف وأتجوز.

ردت سحر عليها: يا بنتي دي حاجة بتاعة ربنا ما في ناس بتتجوز صغيرة وربنا ميسمحش انها تخلف، وممكن يبقا عندها ٥٠ سنة وتخلف عادي، ياما ناس كتير اتجوزت كبيرة وربنا رزقها باورطة عيال؛ ربنا كريم وبيعوض واوعى تفتكري انه ميز حد عن حد، احنا كلنا عند ربنا سواسية، كل واحد له رزقه في الي تتجوز بدري وتبقا أم، وواحدة تشتغل وتعمل كارير، هل بقا الي اتجوزت بدري أحسن من الي لسه متجوزتش وبتشتغل؟ لا خالص كل الحكاية إن الأولويات عند كل واحدة اختلفت مش أكثر، وارجع واقولك برضوان كل شيء نصيب، والي ربنا عاوزه هو الي يكون.

فرح: أنا عارفة كل ده والله وفاهماه، بس أنا بـ...

قطعت كلام فرح وقولتها: عشان احنا في مجتمع ضاغط يا فرح، طول الوقت بيضغط عليك من كل ناحية، بيضغط عليك بمقاييس الجمال معينة ويحاسبك لو مش عينك ملونة ولا شعرك مش طويل، ويفضل يديك كل شوية مقياس للجمال، وتفضلي أنت يا عيني تحاولي ترضيه بكل الطرق، وبرضو مش بيتراضى، مجتمع بيضغط عليك بعادات وتقاليد متخلفة مقيدك بيها، بيضغط بعامل سن محدد ليك عشان تتجوزي، ولو عدتيه يديك لقب عانس، ولو اتجوزتي هيقولك براثو وهيديك لقب مدام، مجتمع بيفضل يقول عليك بت لحد ما تكبري فيقول عليك ولية، مجتمع لو عارضتيه هيقول عليك يا مُعقدة يا عيارك فالت، مجتمع الي يتصرف فيه بعفوية وتلقائية يتقال عليه مجنون.

فرح: عندك حق يا نور، بس وبعدين، احنا هنعمل ايه؟!  
 سحر: ما هو أكيد يعني مش هنغير العالم، مفيش قدامنا غير اننا  
 نستحمل نرضى بنصيينا زي ما كل البنات عايشين وراضيين.  
 فضلنا نتكلم كلنا، ما عدا مي الي كانت بتسمعنا وماسكة طبق  
 حلويات بتاكل فيه لحد، ما أخيراً سابت الطبق الي في إيدها وبدأت  
 تتكلم.

مي: أنا مشكلتي أكبر من مجتمع عايشة فيه أو بيت وعيلة بتضغط  
 عليا، أنا مشكلتي الحقيقية مع نفسي أنا خايقة.. خايقة أكون بستنى  
 الي مش جاي، واتعشم بحاجة مش ليا، وافضل متشعبطة في حبال  
 دايرة هتاخدني وأقع على جدور رقبتى واتكسر ونتكسر معايا أحلامي  
 كلها، بس أنا مقداميش حل تاني غير يا إما اني استنى يمكن الي جاي  
 يكون أحلى فعلاً ويطلع ده كله غلط، وربنا يعوضني عن كل الوقت  
 الي عيشت فيه خايقة ومستنية، يا إما امشي في سكة الندم فيها بعدين  
 مش هيعمل حاجة.

سكتنا كلنا واحنا باصين لبعض ومحدش عارف يطمئن التاني؛ عشان  
 كلنا في دائرة واحدة، كلنا خايفين ومضغوطين، كلنا بنحس بكل الي  
 قالته كل واحدة فينا، ده غير الي مكناش عارفين نعبر عنه بالكلام، كلنا  
 بنيجي آخر اليوم نعيط على سريرنا لغاية ما نروح في النوم ونصحى تاني  
 يوم نلبس ونحط مكياج ولا كأن في حاجة، كلنا نفسنا نعيش مبسوطين،  
 كلنا طلبتنا بسيطة نتحقق بس احنا الي في مجتمع مصعبها علينا.



سحر: ١١١ بقولكوا ايه احنا جايين نقعد مع بعض نتبسط ونفك  
عن نفسنا شوية، عارفين ان كله قرف بس هنعمل ايه يعني! فليحترق  
الجميع.. شغلينا يا بنتي أغاني خرينا نرقص ونتبسط.  
فرح: على رأيك، شغلي يا بنتي.. والله يا بنات ما لينا إلا بعضينا ١١١.

(١٢)

## حُضْن

أنا اكيد اتحضنت وأنا صغيرة، بس وأنا كبيرة اتحضنت من ماما كثير خصوصاً لما كنت بسافر كذا يوم كنت برجع احضنها، لكن في حُضْنين مش قادرة انساهم وفاكراهم كويس جداً، ولما بفتكرهم بشم ريحة حضنها وبحس اني جواه فعلاً.

أول حضن كان وقت وفاة اخويا، وفي وسط وجعها على فراقه ركزت معايا وحضنتي وقالتي عيطي يا حبيبتى عيطي؛ عشان ماتعشش لاني كنت في حالة صدمة ومش قادرة استوعب اللي حصل ولا حتى أعيط.

وتاني حضن كنت اتعرضت لموقف وجعني جداًااا وفضلت فترة بتألم مع نفسي، ومش قادرة حتى أواجهها بألمي ده، وفضلت مدارياه عنها لحد ما تعبت، ومبقتش قادرة اكتم جوايا وجعي، وحسيت اني محتاجة حضنها أوي؛ عشان افرغ فيه كل الوجد والألم اللي جوايا وبمجرد ما حضنتها فضلت أعيط أوي، وافضفضلها ودي كانت أول مرة اعمل ده مع ماما اني أفضفض في حضنها، ووقتها حسيت إن وجعي قل يكاد يكون اختفى أصلاً.. حسيت براحة وكأن جبل اتشال من على قلبي.

وأنت جواه هتحس انك صغير أوي بس مالك الدنيا كلها، هترجع طفل من تاني.. مبسوط ومرتاح، مش حاسس بتعب ولا ألم، دموحك بتقف وتاخذ نفس وكأنك بتقول خلاص كله بقا تمام.

لمسة الإيد اللي بتظمن، والتمليس على شعرك اللي هيخليك تروح في نوم بعد ما كنت بتتحايل على النوم عشان يجيلك.

هتشم ريحة أيام وذكريات حلوة، ريحة سندوتشات الجبنة بالطماطم الي كنت بتاخذها معاك المدرسة، ولعبك القديمة، والشنطة الجديدة الي هتروح بيها أول يوم، وفرحة العيد ولبسك الجديد، مهما كبرت هتفضل صغير وأنت فيه؛ عشان مهما كبرت مش هتكبر على حضن ماما.

أنا بحب جداً احضن الأطفال اللي لسة مولودين؛ بيكون فيهم ريحة كده كلها دفاء، بحس اني متطمنة كدة وعاززة أنام، حاجة صغيرة أوي بس مخلياك حاسس انك مالك الدنيا دي بإيدك.



لما اشتغلت مدرسة فترة كنت بتبسط أووي لما الأطفال تجري عليا تحضني وترتاح على دقات قلبي، كنت بحس اني أنا اللي محتاجة الحضن ده مش هما، وأوقات كتير كنت بحس إن حضنهم ليا ده دعم نفسي كبير، وبيزود ثقتي بنفسي؛ كأنهم بيقولولي أنت مقبولة ومحبوبة وجميلة، أنت تستاهلي تحضني.

ساعات لما كنت ابقا متضايقه أو زعلانه اجري احضن أي طفل من الأطفال دي، كنت بحس بدفء وطبطة منه، حضن بريء ونقي ومش عايز أي حاجه منك، والأهم اني كنت بشوفهم مبسوطين من الحزن ده وحينه.

كان عندي بنت صغيرة اسمها بسمة، البنت دي مفيش مرة تشوفني غير وهي تجري عليا تحضني، لدرجة إن أوقات لما اكون واقفة بشرح في الفصل ألقاها قامت من مكانها تحضني وترجع مكانها تاني، مكتتش بفهم ليه هل هي محتاجة فعلاً حضن ولقيته مني؟! ولا هي بتحس فعلاً اني طول الوقت محتاجة التحضن عشان اتطمئن عشان أنا طول الوقت خائفة؟!!



كان عندي واحدة صاحبتي دائماً كانت تقولي عارفة أنا ممكن مشاكلي كلها تخلص في حُضن، وكانت دائماً تيجي تحضني، ويمكن هي سبب من الأسباب الي خلّنتي أركز في قيمة الحُضن.



أنا دائماً عندي مبدأ إن الحزن مش مجرد إن إيديك تضم شخص، أو إن ضلوعك تمس ضلوعه؛ الحزن إن الحواجز النفسية اللي بينك وبين الشخص ده تقع.. تدوب.

وشوارع قلبك وحواريه تكون مفتوحاله يتمشى فيها براحتة،

الحُضْنُ في نظرة عين بتقولك بحبك، ولمسة إيد بتقولك اتطمئن، في ناس طبطبتها حُضْن، وناس حُضْنها غُربة.

أنت ممكن تتحُضْن من حد وتحس انك عريان وخايف؛ وده لأن الحُضْن بينقل مشاعر الشخص الحقيقية اتجاهك، مستحيل تحس بحب وأمان من حُضْن حد مبيحبكش، من الصعب انك تطمئن وأنت في حُضْنه؛ لأنه بيكون طاردك وأنت جواه.

الناس بتشتري الدباديب عشان تحُضْنها، عشان تحس نفس احساس الحُضْن الحقيقي؛ لأنه بينقل حرارة جسمك؛ فتحس انك بتتحُضْن.

دايمًا بحس إن كل واحد فينا مستني حُضْن معين يدخل جواه يشفي جروحہ القديمة ويحتويه، بحس إن كلنا لينا أحضان «بيوت» نكون جواها متطمنين مش قلقانين من حاجة، ولا ايه ممكن يحصل، متطمنين وبس.

(١٣)

## عائشة على اللي فات

\_ الو.

= أنتِ فين في البيت ولا ايه؟!

\_ ااه في البيت.

= هتتزلي تقابلي فريد امتي؟!

\_ لا مش نازلة أقابله.

= نعم! داليه بقا إن شاء الله؟!

\_ ماليش مزاج، وبصراحة الموضوع بوخ أووي ومكنش له لازمة  
اننا نحاول نقرب أصلاً.

= تاني؟ لا بقولك ايه أنا جيا لك.

\*\*\*

قفلت معايا سها وهي متعصبة.. ساعات بحسها أمني؛ دايمًا شائلة  
 همي كأني بنتها الوحيدة! كنت عارفة هتيجي تتكلم تقولي ايه، مفيش  
 نص ساعة وكانت جاتلي.

\_ ممكن اعرف بقا ايه الكلام الي قولتيه ده؟ أنتِ عاوزة تنهي موضوع فريد؟

= يا ستي فريد شخص كويس، ومحترم، وزى الفل، وميت بنت غيري غيررري تتمناه، لكن أنا لا، هو أخري معاها نكون أصدقاء وبس.

\_ لسة مستنياه؟

(بصتلها ومنطقتش بكلمة) وكملت هي كلامها: مش هيبجي، لو كان هيبجي كان جه، هو سافر وعاش حياته خلاص، ناقص أنتِ بقا.. بتعملي في نفسك كده ليه؟! اتجوزي أنتِ كمان، وخلفي، وعيشي حياتك، اعملي عيلة بدل ما أنتِ لوحدة، الوحدة هتأذيك يا زينة.

= حبه مرض ضربني في أضعف مكان فيا.. خد قلبي معاها ومشني، بقيت عايشة من غير روح، هو قدر يعيش، لكن أنا مش قادرة حتى أتعايش مع فكرة انه مش موجود ومش هيرجع.. أنا بقيت بهرب من أي حاجة تفكرني بيه وتصحي فيا الحنين؛ عشان مش هستحمل مشاعر حنيني له، الأغاني الي كنا بنسمعها، والأماكن الي كنا بنروحها، حتى الشوارع الي اتمشينا فيها سواء، كل ده بمقدرش اتحملة من غيره، بقت أمنيتي أمشي في شارع من غير ما يفكرني بيه ولا أروح مكان من غير ما تبكيني الذكريات... حبيته حب مرضي حتى مش قادرة اني أتعالج منه.

\_ ولحد امتي هتفضلي رابطة حياتك وسعادتك بيه؟ انسيه يا زينة! أنا عارفة اني قولتلك الكلام ده كتير أووي.. بس أنا خايفه السنين تسرقك

وفجأة تكتشفي انك خسرتي كل حاجة حتى نفسك، لازم تصدقي فكرة انه محبكيش؛ الي بيحب ميوجعش وهو اتفنن في وجعك، أذاك ببعده عنك واختفاؤه من غير سبب، وخلاك تلفي حوالين نفسك وتشكي فيها، مفيش حد هيعمل كده في حد بيحبه.

= أنا عارفة كل ده وفاهماه كويس.. بس ماليش حكم على قلبي الي وقف قدامي وربعلي ايده وقالي والله ما أنا مدخل حد غيره جوايا وان قدرتي تشيليني شيليني! والظاهر انه عشان أنساه بيقا لازم أغير قلبي كله، بدل ما تحبيلي عريس جبيلي قلب جديد يحب العريس.

أنا هقوم اعملي حاجة أشربها، تشربي ايه؟

\_ فضلتي تتمسكي للآخر.. وتحبي من كل قلبك، وتدي مشاعر بكل أمانة، وكانت النتيجة ايه! اتسابتي من غير سبب!! يمكن السبب كان انك بتحبي بكل قلبك، كان لازم تخسري شوية من قلبك؛ عشان يدريك الأمان مينفعش نحب لآخر حته فذقلبناا يا زينة! هيخلص ومش هنلاقيه!! أنا نصحتك كتير وأنتِ أعقل واحدة فينا، وفاهمة كويس نتيجة الي بتعمله.. أنا مش عايزة أشوفك غير مبسوطة ومستمتعة بحياتك، مش بتتعذبي بغيا به كدة وععيش على أمل انه يرجعلك!

= سها أنتِ زعقتيلي في التليفون وقفلتي السكة في وشي صح؟!

\_ ااه حصل؛ عشان أنتِ استفزتيني بصراحة.

= طب هاتي النسكافيه ده كده.



\_ اهو، بس ليه؟!

= روجي بقااا.

\_ ايه ده طب مش هنفطر؟!

= افطري في بيتكم يا قلبي.

\_ طب ماتكلمناش في موضوع فريد!

= مش اتكلمنا! اه والله، اتكلمنا وقولتلك قراري.

\_ بس أنا مش موافقة.

= مش مهم، باي يا سها، باي يا حبيبي.. خلي بالك من نفسك.

سها كان عندها حق في كل كلمة قالتها، وممشيتهاش عشان ضايقتني، بالعكس هي بتفوّقي وأنا اللي مصممة أكمل في غيبوبة (ما يمكن؟!).

ساعات كتير بنكون عارفين الحقيقة، بنكون عارفين السكة اللي ماشينها دي آخرتها ايه وهتودينا على فين، بس نعمل ايه في الأمل!

الـ ١٪ اللي بتتمنى انه يتحقق.. احنا ولا أغنيا ولا سُذج لدرجة اننا ما نشوفش العلامات اللي قدامنا، وبتحاول تفوقنا من وهم عايشين فيه.

بس هي الرغبة في تحقيق المبتغى والوصول للمراد هي اللي بتخلينا نصبر ونحاول وننتظر، هي اللي بتخلينا نستني ونأمل.. يمكن.. يمكن يحصل اللي بتتمناه! يمكن اصحى في مرة ألاقه قدامي بيقولي أنا آسف..

تتجوزيني؟!!!

يمكن تحصل مرة ويحصل زي الأفلام.. يمكن؟!  
بس في جميع الأحوال أنا الخسارة، والمحزن بجداني قابلة الخسارة..

(١٤)

## اناخرت ليه؟!

- أوقات كثير بقضي الليل مع صوت أم كلثوم وكوباية الشاي الأخضر بالنعناع وأفكر فيك، وأوقات تانية مع صوت هاني الدقاق وأنا هويت وانتهيت وحساني دايرة فيك حتى في وقت هجرك ليا..!

أوقات بقضيه وأنا بتفرج على أفلام وتملي بشوفك بطلها.. إذا كنت أنت البطل اللي في حياتي مش هتكون في أفلامي؟! أنت بطلي.

كلمة بحبك اللي بيقولها البطل للبطله دايماً بحسها ليا بتتقال؛ عشان بصوتك أنت.

- وساعات بيجي الليل واحس اني مش عاوزة اعمل أي حاجة، ولا اسمع ولا أشوف، ولا حتى أفكر في حاجة، عاوزة افضل باصة للسقف وساكته، بس غصب عني بلاقي نفسي برضو بفكر فيك.. وأكلمك.. وتنزل دموعي واخذ تنهيدة واسألك أنت اتاخرت ليه؟!

- بحب المشي.. بحب اتمشى في الشوارع وأحس بنسمة الهوا وهي بتخبط فيا.

أنت كمان بتحب المشي مش كدة؟

تعرف اني طول ما أنا بتمشى بشوفك؟ آه بجد بشوفك؛ في اتنين ماسكين ايدين بعض وماشين.. ببقا محتجالك خصوصاً لما بكون ماشية تايهة، ببقا محتاجة مسكت ايدك ليا تطمني.. ده أنا لو تايهة هبقا متطمنة وأنا معاك؛ عشان أنت طريقي.

- بشوفك في محلات الورد، فجأة بلاقيني بابتسم واخذ تنهيدة، تنهيدة انتظار لبوكيه الورد اللي جاي منك.. بس هو اتاخر ليه؟!

- أنت تعرف اني بفضل أدور عليك؛ يمكن أقابلك وتبقى هي الصدفة اللي جمعتنا! لما بشم ريحة برفيوم مميزة باقف مكاني وأقول يمكن تبقا ريحته هو؛ عشان هو أكيد مميز.

- لما بروح البيت بعد يوم طويل ومُجهد ببقا مش عاوزة اعمل أي حاجة تانية خالص غير اني اشوفك واسند راسي على كتفك واستريح! دايمًا بحس اني سعادتي ناقصة مهما نجحت، ومهما وصلت برضو بحس ان في حاجة ناقصة.. سعادتي دايمًا مش كاملة.

مرة حد قالي: هو مش أنا راجل أهو، بس اوعي تخلي سعادتك راجل، جمعي خيوط سعادتك من حاجات كتير؛ عشان تبقي مبسوفة.

- مش عارفة ليه من وقتها كل ما احس اني محتجالك عشان سعادتي تكمل أحس إن ضميري بيأنبني؛ وكأنه مينفعش..! بس أنا ببقا مش مقتنعة بده؛ ازاي سعادتي تكمل من غيرك؟!

ده احنا موجودين في الحياة عشان نكمل بعض، ربنا خلق كل واحد

فينا جواه حته ناقصة، محتاج للتاني يكملها، في مكان جوانا فاضي محتاج لحد يملأه.

مش بقول أوقف سعاتي على رهن وجودك، لكن احتياجي ليك طبيعي، اشتياقي لوجوك أمر لا بُد منه، أنت كمان أكيد بتحتاجني.. أكيد بتشتاقي؟؟!

- كل يوم ببقا محتاجة مكاملة منك تخليني اقدر أكمل شغل، محتاجة اسمع رأيك في مشكلتي ونفكر سوا وناخد قرار، لما بنزل (لبسي) ببقا عاوزاك معايا لأن في النهاية ببقا عاوزة لبسي يكون على ذوقك؛ عشان مش هيهمني حد يشوفني حلوة غيرك.. وأنا كدة كدة حلوة عشان وياك.

- ده أنا حتى خلافتنا محتجاها؛ عشان احس إن فيه شد وجذب. محتاجة طبطبة منك واستخبي في حضنك وبين ضلوعك في كل مرة احس فيها اني خايقة، أنا محتاجة تطمني عشان أنا طول الوقت خايقة، محتاجة تحبني أووي، ومحتاجة كمان تتأكد اني بحبك أووي.

معرفش شكلك، ولا طولك، ولا حتى عندي فكرة عن الصدفة اللي ممكن تجمعنا في يوم، أو يمكن أصلاً تكون أنت جنبي بس لسه قلوبنا مخبطتش في بعض!

أنا مش عارفة أنت اتاخرت ليه!

بس أنا مستنياك..

(١٥)

## بنت أبوها

- القبض نزل.

= بجددد!!!

- اه.. بجد.

= الحمد لله؛ نازل في وقته.

- اه طبعاً هتجري تكلمي بقيت المفاجأة لسي طارق بتاعك، مش  
كدة؟

= بصراحة اه؛ كان في حاجات ناقصة كتير عاوزة أجيبها.

- أنا مش فاهمة عيد ميلاد ايه ده الي بيقدوله شهر يجهزوله! مش  
شايفة انك مزوداها يا مريم شوية وأوفر بصراحة؟

= لا خالص على فكرة، انك تفكري في سعادة حد بتحببه وتفكري  
ازاي تخليه يكون مبسوط ويعيش لحظات مميزة دي مش أفورة دي محبة.

- أتمنى بس يكون فعلاً مقدر كل طاقة الحب دي؛ أنت بقالك شهر  
يا مريم مبتعمليش حاجة غير انك بتفكري ايه الي ممكن يكون مختلف  
ويتعمل ايه هيخليه مبسوط.. يا رب يقدر ويحس كل مشاعرك الحلوة

له دي .

= هيحس، وأكيد هتوصله؛ اللي بيطلع من القلب بيوصل القلب، وأنا مفيش حاجة عملتهاله إلا وكانت من قلبي بجد.. ويلا بقااا كفاية رغي؛ أنا هجري اقبض وامشي على طول عشان في حاجات محتاجة أجيبها، يلا باااي.

- باي، ربنا يفرح قلبك يا مريم يا رب!

نزلت من الشركة بعد ما قبضت وأنا في دماغي مليون فكرة ومليون حاجة اعملها عشان عيد ميلاد طارق، كنت حاسة اني عاوزه اشتريله الدنيا وما فيها وألفهاله هدية.. كنت بدور على أصعب مشوار واروحه عشانه، وأفكر في أكثر هدية مختلفة عشان أجيبهاله حتى لو هعملها بأيدي.. كنت عاوزه اجمعه كل الناس الي بيحبها عشان يبقوا معاها، بس الي وقفني خوفت انهم يفهموا حاجة خصوصاً انهم ميعرفونيش، وكنت هعزمهم بصفتي ايه أصلاً! كنت تعبانة من كتر اللف والمشاور بس لما بفتكر ان التعب ده عشانه كان بيهون عليااا! التعب لى بتجبه بيتقلب راحة.

وفي وسط زحمة مشاويري لقيته بيكلمني...

- أنت دايمًا كدة؛ جاي في وقتك.

= اشمعنا؟

- كنت بفكر فيك.

= طب ما أنا عارف.

- وعرفت منين؟ أنت مهكرني بجد ولا ايه!

= اه طبعا.. أنت فين وايه الدوشة دي؟

- مفيش، بشتري شوية حاجات كدة، ايه أنت الي فين؟

= أنا في البيت.

- ايه ده أنت رجعت من السفر امتى؟ مش المفروض كنت هترجع

بكرة!

= عادي خلصت الشغل الي ورايا فقلت آجي النهارده.

- طب عاوزة اشوفك؛ أنت واحشني.

= ان شاء الله أكيد هنتقابل يعني.

- طب عيد ميلادك تقضيه معايا.

= تمام.. يلا أنا قولت اتطمئن عليك، عاوزة حاجة؟

- مبسوسة اني سمعت صوتك، عاوزة سلامتك.

= وأنا كمان، باي.

- باي باي.

كنت دايمًا بحس ان طارق جبلة، مشاعره في تلاجة.. فاكرين سعاد

حسني في خلي بالك من زوزو لما قالت أكلمه بحرارة يرد بالقطارة؟



أهو طارق كدة، ببقا ملهوفة عليه وهو ولا هو هنا، جبلة، بس أقول ايه! بحبه.

خلصت كل المشاوير اللي ورايا وروحت نمت حتى بهدومي؛ كنت تعبت أوي.. المنبه رن الساعة ٧، مكنتش قادرة افتح عيني ولا أقوم خالص من كتر تعب امبارح؛ كلمت غادة عشان تاخدلي أجازة النهارده وتبلغهم اني تعبانة ونمت تاني، ولما صحيت كلمتها اسألها عملت ايه.

- الو، ايه يا غادة عاملة ايه؟

= أنا تمام، أنتِ الي عاملة ايه وتعبانة مالك؟ مفهمتش منك حاجة الصبح!

- يا بنتي مفيش، أنا بس امبارح عملت مجهود كبير ومشاوير كثير؛ عشان عيد ميلاد طارق أنتِ عارفة، وروحت خلصانة خالص، ومقدرتش انزل الصبح الشغل.

= يا دي عيد ميلاد طارق ده!! يا رب بس يقدر ولا يطمر فيه ويحس على دمه بقااااا ويعرف انك بتحبيه الحب دا كله!

- هيحس وهيقدر؛ قولتلك الي بيتعمل من القلب بيوصل القلب، أنا متأكدة أصلاً انه حاسس بيا وبمشاعري دي كلها، دلوقت كمان أكيد بتوصله. وبعدين بقا كل حاجة في عيد ميلاده ده هتفكره بيااا، وهيبقا يوم مميز أوووي مش هينساه طول عمره.

= مريم، حقيقي يا بخته بيك، ويا رب تحس على دمك يا عم طارق!

- طب اقفلي بقا؛ خليني أشوف هعمل ايه.

= ماشي يا ستي، ابقني طمنيني عليكِ.

- أوكيه، باي.

كنت كل يوم بأكد على طارق انه هيقضي معاي يوم عيد ميلاده، كنت مستنياه كأنه يوم العيد؛ كان نفسي أسعده أوي ويكون يوم مميز، كل حاجة كنت مجهزاها عشانه كان نفسي تنطق وتقوله بحبك؛ عشان أنا جبانة ومش قادرة أقولها، سنين وعائشه مخيياها ومستحاملة؛ يمكن بكرة يحس! يمكن يفهم! لكن مفيش، مش بقولكوا جيلة. لحد ما أخيراً جه اليوم اللي مستنياه، يوم ميلاد حبيبي، يوم ميلاد (طارق) كنت متفقة معاه اني هستناه في الكافيه اللي اتقابلنا فيه أول مرة، وطبعاً كنت مجهزة كل حاجه هناك، ونزلت ووصلت الكافيه وفضلت مستنياه، لحد ما لقيته بيكلمني:

- الو، أيوة يا مريم.. أنا آسف أوي بجد؛ أنا مش هقدر آجي في ميعادنا.

= ليه يا طارق؟ هو في حاجة ولا ايه؟!

- لا، بس صحابي عامليني مفاجأة عشان عيد ميلادي وكدة؛ فأكيد مش هينفع أسيبهم وامشي.

= بس أنت معاهم من الصبح، عادي لما تستأذن، وبعدين أنا مأكدة عليك بقالي كتير أوي، وكمان كنت أنا عمالك مفاجأة!

- معلى بقا يا مريم؁ نعوضها متزعلىش؁ أنا مضطر اقفل معاكِ دلوقت؁ هكلمك تانى بالاي.

قفل معايا حتى من غير ما يسمع ردي عليه؁ أخذت شنتطي وسبت الكافيه ومشيت؁ سبت كل حاجة هناك حتى الهدية بتاعته.. مكنتش مركزة خالص؁ حسيت انه دلقي عليا جردل ماية ساقعة؁ كنت ماشية في شارع زي التايهه؁ مبفكرش في حاجة؁ ولا بيعط؁ ولا بنطق؁ لحد ما مشيت في شارع كنا اتمشينا فيه سوا قبل كده وقعدنا فيه شوية على الرصيف؁ لقيت نفسي بقعد على نفس الرصيف وبيعط.. بيعط زي العيل الصغير اللي تاه من مامته! وفضلت كده وقت طويل لحد ما هديت شوية وقدرت أروح البيت. كان صعبان عليا نفسي أكثر ما هو كان صعبان عليا كل التجهيزات اللي عملتها عشان.. طارق! كسر بنفسي وبخاطري وده احساس صعب أوي؁ اللي زعلني أكثر ان تاني يوم لقيته مكلمنيش ولا حتى عشان يحاول يعتذرلي؁ ولقيته منزل صور انه سافر مع صحابه.. المشكله مش في كده؁ المشكله اني مقدرتش مقولوش كل سنة وأنت طيب! بعته الرسالة بليل؁ شافها ومردش عليا؛ وقتها اتأكدت اني مُهمشه في حياته واني ولا حاجة؁ أنا بس اللي كنت شايفاه كل حاجة.. طب ايه ماكنش حاسس بيا؟!

مش حاسس انه محور حياة حد تاني! وانه أول حاجة يفكر فيها أول ما يفتح عينيه! مش حاسس انه جزء من صلاتي ودعوة وطلب من ربنا بطلبه كل يوم! مش حاسس انه في وسط ما هو متضايق ومهموم

وبيفكر في حد بايعه في حد تاني ييفكر ازاي يسعده! مش قادر يحس بقلب اختاره من وسط ٩٠ مليون.. اختاره هو عشان يحبه؟!

بابا كان كاتبلي مجموعة رسائل كثير قبل ما يموت، سحبت رسالة النهارده وكانت بتقول «مش لازم الي احنا نختاره هو كمان يختارنا، ولا الي بيعبنا يكونوا بيادلونا نفس الشعور.. المهم اننا مندمش على اختيارتنا الغلط عشان.. بتتعلم، ولا نندم على حب قدمناه لغيرنا من القلب عشان.. بيتعوض».

وكالعادة حسيت بوجود بابا وقد ايه هو حاسس بيا وبيرد عليا.

بابا كان دايمًا بينادي بي بنت ابوها، وكان دايمًا يقولي بنت أبوها ما يتخافش عليها، دايمًا يقولي حبي وقدمي حب لكل الي حواليك بس اوعى تخلي حد يستنزف مشاعرك ولا تقدمي حب في غير مكانه.. واعتقد بابا بعثلي الحل في موضوع طارق، وعشان أنا بنت أبويا هعمل بنصيحته.

(١٦)

## وبينا ميعاد

\_ ايه يا ابني رن رن رن! في ايه! أنا جاية أهو بس الطريق زحمة.

= مي، أنت لسة بتلبسي الكوتشي صح؟!

\_ بصراحة، ااه.

= طب ممكن تخلصي؛ عشان أنا في الشارع.

\_ يعني أنت هتفضل في الشارع! ممكن تروح تشرب حاجة في اي مكان أكون جيتلك.

= احنا أصلاً رايحين فين!

\_ لما اقابلك هقولك، يلا بقا شوف هتعمل ايه وقولي.. يلا بقا على فكرة أنت معطلني.

= لا والله! ماشي اخلصي بقا.

\_ أوكيه يا جمر، باي.

نزلت بسرعة وكلمت مازن اخليه يجيلي على الزمالك، طبعاً قعد يصيح شوية واني له ماقولتلوش من الأول تعالى على الزمالك وانه

لسه في مصر الجديدة، بس طبعًا أقنعتة يجيلي عادي جدًا وان الموضوع بسيط، ولما وصلت لقيته واقف في الشارع عند بيت اسماعيل ياسين، مش عارفة ليه يعني بس تمام...!!

أول ما شوفته ابتسمت كالعادة، وهو كمان ابتسملي برغم انه كان متعصب من تأخيري عليه.

\_ حمدا لله على السلامة يا أستاذة مي.

= ميرسي، الله يسلمك.

\_ بجد مستغزة!

= صانكيو جدًا عارفة.

\_ يا رب صبرني! يا بنتي أنتِ بتعملي فيا كدة ليه! اكمني غلبان يعني؟!

= مين الغلبان معلش؟! وبعدين أنا عملت ايه حرام عليك يا اخي ليه كدة!

\_ أنا.. أنا مني لله بجد.. ممكن بقا اعرف احنا هنروح فين، هو كل مرة نتقابل فيها تعملي كدة، لازم تدوخيني يعني!

= عارف قصر عائشة؟

\_ اه اسمع عنه، ماله؟!

= رايحين هناك، في معرض لوحات كدة، هنروح نتفرج.

\_ معرض لوحات!! يعني أنت متأخرة عليا ساعتين، وجايباني من مصر الجديدة للزمالك، ومش راضية تقولي رايعين فين، والآخر يطلع معرض لوحات!! أنت بتعملي معايا كدة ليه بجد؟ وأنا بستحملك ليه! أنا مش فاهم هو أنت ماسكة عليا ذلة؟!

= لا خالص.. وبعدين أنت بتستحملني عشان بتتبسط باقتراحاتي وخروجاتي والأماكن اللي باخدك فيها متنكرش صح ولا لا؟  
\_ ااه بصراحة.

= بس كدة، يبقى نروح القصر واحنا ساكتين، اتفضل بقا نتمشى، هو قريب مش بعيد من هنا.  
\_ اتفضلي حضرتك، تحت أمرك.

وصلنا القصر ودخلنا معرض اللوحات، ومازن كان بيتفرج وساكت مش باين عليه أي رياكشن، مبسوط، زعلان، تعبان، زهقان! لحد ما نكشته.

\_ ايه رأيك أستاذ مازن في اللوحة دي؟  
= جميلة جداً أستاذة مي، لا وعميقة.

\_ فعلاً.. عارف كان في زمان، في معرض لوحات لفنان مشهور كبير، بيتعمل كل سنة في فرنسا، كان في اتنين مرتبطين كل سنة لازم يروحوا يحضروه، وكان في لوحة أساسية بتكون موجودة في المعرض اسمها لوحة الفراق، كانوا كل ما يروحوا يقفوا قدامها ويصوّلها كتير

أو ووي ويفضلوا ماسكين ايدين بعض وكأنهم خايفين الأيام تبعدهم، ماسكين في بعض ومتبتين كأنهم بيتحدوا الفراق والبُعد، وتلف الأيام وينفصلوا، بعدوا ومحدث يعرف عن الثاني أي حاجة، لغاية ما جه في سنة كل واحد فيهم قرر يحضر معرض اللوحات، كل واحد منهم اشتاق لمكان جمعهم، عارف لما راحوا حصل ايه؟! =

ايه.. قابلوا بعض؟

\_ غير انهم قابلوا بعض.. اللوحة الي كانوا دايمًا يوقفوا قدامها اتغيرت، بقت عبارة عن اتنين واقفين ماسكين ايدين بعض بيتفرجوا على لوحة الفراق.

= الرسام رسمهم؟!!!

\_ بالظبط كدااا.

= الله حلوة أوي.. القصة دي حقيقية؟!

\_ لا طبعًا، أنا الي لسة مألهاها دلوقت.

= ههههه، يا شيخة ارحمني بقاااا!

\_ لا، يلا نروح ناكل؛ أنا جوعت.

= يلا.

واحنا بنتغدى سألني عن الحكاية الي قولتلها له واحنا في القصر:

\_ مي، هو أنت كنت تقصدي ايه بالحكاية الي حكيتها واحنا في



## القصر!

= حكاية ايه! قصدك بتاعة اللوحة؟!

- أيوة هي.. أنتِ ما بتقوليش حاجة كدة وخلاص، لازم بيكون وراها رسالة.

= يمكن يجي يوم ونبعد ومنعرفش حاجة عن بعض، ممكن نرجع أغراب تاني كمان، بس مهما بعدنا هنعرف نلاقي بعض من تاني؛ الأماكن اللي بنروحها قادرة تجمعنا تاني في يوم من الأيام، ومش صدفة على قد ما بيكون قدر منها انها تجمعنا؛ عشان كدة عايزاك تحب أي مكان نروحه، حبه أو ووي وسيب حاجه منك فيه لو عاوز تلقاني تاني.

- ومين قالك أصلاً اني ممكن اسبيك ولا حتى أفكر أبعد عنك! ومش هسمح على فكرة انك تختفي ولا تبعدي ده بُعدك أصلاً.. أو مال مين يجنني ويطلع عيني! على فكرة أنا بحب أي مكان بتكوني معايا فيه، أي مكان معاك بيكون مختلف حتى لو روحته قبل كدة مبحسش الاحساس اللي بحسه وأنا معاك، ده بيكون احساس مميز أوي، معرفش أوصفه غير بأني بكون مبسوط ومرتاح.. مي أوعدك اني عمري ما ابعد عنك مهما حصل، ده بجد.

= متوعدنيش انك هتفضل على طول معايا وان عمرك ما هتسبني مهما حصل؛ مفيش حاجة في الحياة مضمونة!! لو عاوز توعد اوعد بأنك هتحاول على قد ما تقدر تكون موجود.. على قد ما تقدر خليك...

= على قد ما اقدر هكون موجود.

\_ اطلبلنا الحلو بقااا.

= هو في أحلى منك بس!

\_ يا عم عارفة بس عمري ما اروح اقول.

= مي، قومي روجي..

## (١٧)

## كلمة

الحب مش بالكلام.. وآه الأفعال والمواقف قادرة تبين المحبة،  
بس ده ميغنيش أبددا عن الكلمة.. الوعد العقد اللي يربط بين اتنين،  
الكلمة الأمان، في أوقات كتير كلمة بحُب بتطمئن، أوقات كتير أوي..  
وخصوصًا لو أنت على طول خايف!

\_ رجعت ليه يا أحمد؟

= أنا ممشتش عشان ارجع.. أنتِ اللي مشيتي وسبتيني..

\_ أنا ممشتش.. دي النهاية المحتومة للحدوة اللي مبدأتش.

= مبدأتش!

\_ آه مبدأتش.. احنا كنا في حكاية مالهاش ملامح، حاجة مش  
مفهومة، غير مصنفة، كل حاجة فيها مش كاملة، وماكنش باينلها  
تكمل! مشكلتك يا أحمد انك كنت فاكرفي مش هزهق واستحمل  
المنطقة الرمادي دي كتير.. وده أكبر دليل انك معرفتنيش.. ولا ح..

\_ سكتي ليه؟

= مفيش.

\_ كملي يا نور؛ طالما كنتي هتنطقوها بيقا حسيتها.

= الاحساس لواحد مش كفاية، الاحساس مش كافي يديني طابع الأمان.. مش كفاية يطمني ويخليني أكمل.

\_ أنا قولتها بطرق كتير.. عملت اللي يوصلها وزيادة؛ كل حاجة كنت بقدمهالك كانت بتقولها، كل نظرة عين فيها لهفة وخوف عليك كانت بتبين.. وجودي لواحد معاك ده ممكنش كفاية؟!

= لا ممكنش كفاية، كل اللي قدمته من غير بوحك بيها مش هيشفعلك عن عدم نطقها.. نطقها اللي كان أوقات كتير هيكون علاج لوجع (هو أنا ايه عنده؟! هو أنا بيتهيألي؟! طب احساسي صح ولا غلط؟! طب بيتسلي بيا؟!).. مش هيشفعلك قصاد الليالي اللي كانت دماغي هتفجر من كتر التفكير.. مش هيشفعلك عن الأوقات اللي كنت ببقا محتاجة فيها حضنك ومش لاقية اللي يديني الحق ده، مش هيشفعلك!! = للدرجة دي يا نور كنت شايفاني وحش؟ وكنت غلطان بعد كل دا!! أنا كنت مستعد اعمل عشانك أي حاجة.. كان كل هدفي انك تكوني مبسوطه وناجحة، أنا كانت راحتني فيك يا نور.

\_ وأبسط حاجة معمלתهاش يا أحمد! أنت حسستني ان الكلمة كتيرة عليا وأنا أقل من انها تتقلي.. أقل من اني أطمئن، ودلوقت راجع ليه؟ راجع توقف حياتي تاني، توقفني في نص السلم تاني، راجع تمغص عليا حياتي وتخليني ارجع وراا...!

ومفوقش غير على عريية بتخبطني عشان مش باصة قدامي .  
 = أنا طول السنين دي منستكيش، أنا بس مكنتش عارف اتصرف  
 ازاي ولا اعمل ايه.. أنا راجع عشان ده اللي المفروض يحصل، اننا بقا  
 مع بعض مش غير كده.

\_ خلاص يا أحمد.. الصفحة اتقطعت.. باب الرجوع اتسد من  
 بدري أوي، أنت بس الي واثق من نفسك زيادة، مش قولتلك انك  
 متعرفنيش!

= نور!

\_ أحمد، مبسوطه اني شوفتك.. بس محبش اشوفك على طول.

(١٨)

## زي الأفلام

كل واحد فينا له طقوس يبدأ يومه بيها، في اللي يبدأ بأغنية مع فنجان القهوة، وفي اللي يبدأ بمكالمة أو رسالة لشخص ما..

وفي اللي يبدأ على سفرة ولمة عيلة.

وأنا الحقيقة ببدأ بحاجة تانية خالص.. حباية الاكتئاب اللي هتساعدني اكمل يومي.

عمري ما استوعبت ولا حتى صدقت ان ممكن ناس تكون عايشة على أدوية اكتئاب بالسنين؛ على أساس فكرة اننا بتعايش مع الاكتئاب، وعلى انه شيء عادي، عادي جداً!!!

الفكرة بقا، هو أنا جالي أصلاً الاكتئاب من ايه؟

الوحدة مثلاً! بحكم اني عايشة لوحدي بعد ما ولدتي اتوفت، ولا بسبب علاقات فاشلة مريت بيها!

ولا يمكن بسبب مشاكل الطفولة اللي متحلتش!

ولا خوف.. قلق.. توهة! مش عارفة أنا مين، عايزة ايه، ليه حصل كدة، وليه أنا بالذات، كان ممكن اعمل ايه عشان ده ميحصلش؟!

في النهاية هفضل أَلَف في نفس الدائرة الي مش بتنتهي، ولا اسألتها بتخلص.

وعلى فكرة في زبي كثير، ويمكن مشاكلهم أكبر بكثير من اكتئاب.

السؤال الأهم، المكتئب ده بيقابل كل يوم مكتئين ويتعامل مع شوية أمراض نفسية ماشية على رجلين يعني ايه؟! كلنا ضحايا المرض النفسي!!!

طب لو ممكنش فيه طب نفسي كانت الناس اكتشفت انها مريضة؟! ولا كانت هتقتنع انها مس شيطاني وأرواح شريرة زي ما بعض فترات التاريخ اعتبرتها كدة!

في برديات كثير بتقول ان الاكتئاب والصرع والانفصام كلها حالات نفسية تسبب ثقل في الروح وده أعتقد أكثر وصف أقدر أقوله على نفسي شخصيًا؛ أنا حاسة بثقل.

شربت النسكافيه بتاعي كالعادة من غير أكل، ونزلت أقابل عمرو؛ عشان نجهز لموضوع حلقة النهارده.

عمرو زميلي في الراديو وصديق ليا من أيام الجامعة، صاحب صوت مميز جدًا، وشاطر، شخص لين يعرف يتعامل مع أي شخصية، مهما كانت هو بيعرف يوصلها ويدخل جواها من غير تطفل، وده برضو ميمعنش انه وسيم حبتين.

\_ صباح الخير يا عمرو، ايه اتأخرت؟

= لا خالص، أنا لسة جاي أصلاً.

\_ طب ايه! فكرت في موضوع الحلقة النهارده؟!

= مش عارف مختار بصراحة، مش عايز نختار موضوع كليشيه.

\_ أيوة برضو ايه الموضوع الي مش كليشيه؟ يا ابني أنت غاوي ترنقنا كل مرة! لازم نجهز الموضوع قبلها بكام ساعة.

= أنتِ خدتي حباية الاكتاب النهارده؟

\_ ايه؟!

= هو ايه الي ايه! على فكرة عارف انك لسه بتاخدي أدوية الاكتاب.

\_ أيوة برضو، ايه علاقته بالموضوع بتاعنا؟

= أميرة، أنتِ ليه متجوزتيش لحد دلوقت؟!

\_ نعم!! عمرو هو في ايه مالك؟!

= لا بجدد، هو سؤال رخم شوية بس عمري ما سألتهولك رغم ان

كل الناس بتسأله.. ليه متجوزتيش؟

\_ عشان لسه مقابلتش الشخص الي شايفني أستاهل.. أستاهل

يكمل معايا حياته، أستاهل يتغير عشان يبقا معايا، أستاهل يعافر

عشاني، أستاهل أكمل معاه الطريق وأكون جزء أساسي من نجاحاته،

أستاهل أكون بيته.. عشان أنا استاهل. وبما ان لسة مقابلتش الشخص

ده يبقا هو كمان مقابلنيش، يعني لسه متقابلناش، لسه.. وده ميمنعش



انه موجود.. بس لُقانا ببعض لسه ما اتمش.

= أنا عاوز أكون جنبك، متبعديش وأنت محتاجة مساعدة؛ حباية الاكتئاب مش هتسندك.

\_ بس أنا عاوزة أكون لوحدي، سيبني أكون لوحدي واتعود أشيل شيلتي، أعتمد على نفسي واتعافى لوحدي؛ عشان لما ابقا لوحدي فعلاً بمقاش لايسة.. أنت لو ساعدتني النهارده وجيت بكرة وجعتني وسببتني ومشيت مين هيداويني؟!

= اللي يريحك حاضر.. بقولك ايه ما تيجي نعمل الحلقة من غير تخضير! كل واحد يقول اللي هو عايزه، يفتح قلبه ويتكلم؟

\_ ده ازاي يعني؟ وبعدين مين هيوافق يسيبنا كدة وب....

قطع كلامي معاه مكاملة رنا، ودي لازم أرد عليها؛ عشان هي مش هتسكت غير لما أرد عليها.

\_ ايه يا رنا عاملة ايه؟

= زفت.

\_ الله! ليه بس في ايه؟!

= منمتش من امبارح.

\_ ليه طيب؟

= نفسي اتأكد انه بيحبني؛ كلامه حاجة وتصرفاته حاجة تانية، أنا

نفسى أخط راسي على المخدة وأنا متطمنة اني هصحي هلاقيه بيحبني النهارده وبكرة ولآخر العمر، لكن أنا بنام ومش عارفة بكرة أصلاً هيرد على مكالمتي ولا لا؛ كل شوية بحال وأنا تعبت من المنطقة الرمادي دي، أنا تعبانة، هي ليه كل حاجة صعبة كدة ومتعبة؟

– رنا يا حبيبتى، مفيش حاجة صعبة، ولا حاجة، أنت اللي تابعة نفسك، الموضوع بسيط جداً وهو ان نخك اللي مشغلاه زي المكنة ده ليل نهار تفكير في هو بيحبك ولا لا، تفكيرك في الطقم اللي هتلبسيه بكرة.. أهم منه؛ اللي بيحبك مش هيسيبك تفكري لحظة، هو بيحبك فعلاً ولا لا، تمام؟

= يعني اعمل ايه؟!!

– يعني تحبي نفسك يا رنا، فكري فيها، ولما هتفكري فيها هو هيفكر فيك.

قفلت معاها وأنا عارفة انها مش هتبطل تفكير، ومش الكلمتين اللي قولتهم هما اللي هيغيروا حياتها؛ لأن هي كدة كدة عارفاهم.. الفكرة الأصعب ان هي عندها حق، ان فعلاً كل حاجة بقيت صعبة وليها خطط وتكنيك معين، حتى في العلاقات العاطفية اللي الحب أساسها بقا الأساس خطة متخرش المية؛ عشان تخليه يحبك ويتعلق بيك ادخل على النت وشوف كم الفيديوهات والخطط اللي لازم تعمل عشان ما تطلعش خسران في العلاقة.. لازم تتقل وتخففي فجأة، وتمشي على الخطة مطبوظ لو عايزه يرجعلك تاني، ده غير طبعاً التاروت ويترى

عقله الباطن يقول عنك ايه في غيابك عنه.. وهترجعوا ولا لا، وطبعًا كله ساعد على فشل العلاقات أكثر من ناجحها؛ لأن ببساطة لازم تتعامل ببساطة.

\_ هاه يا أستاذ عمرو! كنا بنقول ايه؟

= كنا بنقول اننا هنطلع لايف من غير ما نجهز موضوع، أنا قررت. وفعلاً نفذ عمرو فكرته، ولغاية قبل ما نبدأ الحلقة بخمس دقائق مكنش حد فينا عارف يتكلم عن ايه.. لغاية ما جالي اشعار على الموبيل لذكرى في نفس اليوم، أنا من الناس الي مبتحبش تكون ذكريات مع حد أو بمعنى أصح بخاف من الذكريات؛ بيصعب عليا افتكر حاجات صاحبها مش موجودين أيًا كان بقا مش موجودين ليه.. وده كان موضوع الحلقة (الذكريات).. وبدأ عمرو الحلقة.

\_ اعزائي المستمعين، معاكم عمرو سمير وأميره كمال وحلقة جديدة من برنامج على الهوا.. الحقيقة النهارده مجهزناش موضوع للحلقة وقررنا نطلع على الهوا ونتكلم في الي حسينه، نتناقش في فكرة حتى من اقترحكم انتوا.. ازيك يا أميرة الأول.

= أنا تمام يا عمرو الحمد لله، أتمنى يكونوا مستمعينا في كل مكان بخير! الحقيقة يا عمرو أنا لغاية قبل ما نبدأ مكتتش عارفة هنتكلم في ايه، لغاية ما حسيت اني عايزة أشارككم بحاجة.

\_ ايه هي؟!

= اني أنا عندي فوبيا من الذكريات، بخاف أكون ذكريات مع حد، ودايمًا بسأل نفسي هو مين اللي بيكون الذكريات دي، احنا! ولا هي بتتعمل غضب عننا؟ خصوصًا دلوقت؛ الموبيلات والكاميرات اللي معانا طول الوقت ساعدت اننا نكون ذكريات أكثر ونحتفظ بيها لفترات طويلة.. حتى لآخر العمر.

\_ هي الذكريات يا أميرة أنا شايف انها بتتكون غضب عننا، وبارادتنا، وحتى من غير موبيلات أو كاميرات؛ فهي أي ذكرى بنمر بيها بتترسخ في الدماغ واحنا بنسترجعها وقت ما احنا عايزين.. بدليل ان أوقات بنمسح كل ذكرياتنا مع الأشخاص وبرضو نفضل فاكرينهم وفاكرين كويس تفاصيل كل حاجة كأنها امبارح.

= عندك حق يا عمرو، أنا في مجموعة مسدحات اتبعتت عن موضوع الذكريات ده، وأول ماسدج بتقول «الذكريات زيها زي أي حاجة، فيها الحلو، وفيها الوحش، ولازم نتقبل جدًّا فكرة ان في ناس مجرد فترات في حياتنا، في منهم هيكون ذكريات حلوة، وفي منهم هيكون ذكريات وحشة نتعلم منها». كلام مضبوط جدًّا، بس أنا شخصيًا حتى الذكريات الحلوة بتضايقني جدًّا، فكرة انه خلاص الشخص ده مش هيرجع تاني فكرة مؤلمة بالنسبالي، يمكن عشان أنا تذوقت الفراق كذا مرة، كمان فكرة ان الذكريات دي مش هينفع ترجع تاني برضو حاجة بتزعلني، بس هو فعلاً غضب عننا بنفكر الذكريات دي.

وأنا بقلب في الرسائل المبعوثة لقيت رسالة منه «النهارده أحلى يوم

بالنسبالي؛ كانت أول مرة اقابلها فيها.. أنا ذكرياتي معاها كلها حلوة، حتى لو هي مش موجودة، كفاية ذكرياتها تونسني» كنت عارفة انه قصده عليا؛ عشان أنا جالي اشعار البوست الي نزلته؛ عشان كنت مروحة مبسوطة وسعادة الدنيا كلها فيااا.. الرسالة كانت من كريم؛ الي عارف ومتأكد اني هقرأها.. مقدرتش اتكلم تاني وسييت عمرو ينهي الحلقة، وأنا ما صدقت انها خلصت؛ عشان امشي.

\_ ايه يا بنتي ماشية علير طول ليه؟ استني نتغدى سوا.

= لا مش هلحق.

\_ ليه وراك ايه؟!

= رايحة اسكندرية.

\_ دلوقت؟!!

= أيوة، يلا باااي.

نزلت جري، وركبت وروحت لنهلة صاحبتني أو عيلتي زي ما بسميها، ماليش غيرها في الدنيا من بعد ما ماما اتوفت.. كانت أول واحدة جنبني وفضلت معايا، ولولا جوزها وبنتها كان زمنها عايشة معايا. كنت عاوزة اجري عليها واستخبي، كنت هربانة من كريم وذكرياته، مهما عملت فيها قوية ومش فارق معايا حاجة إلا اني بضعف أوي لما افكره، وبخاف بمجرد ما يحاول يقرب.

كلنا من ورا الشاشة بنان ان قلبنا جامد، عايشين حياتنا عادي ويمكن

أحسن، ناسيين ومش فاكرين ذكرى واحدة حتي ممكن تضعفنا، بس قدام نفسنا كلنا مالينا الحنين، لسة عاوزين القدر يتغير، لسة فاكرين الذكرى وبتمنى ترجع، كلنا الوجد مالينا مهما خينا.. كلنا!

الي كنت هتجنن منه اني بفتكره كتير.. وكأن الذكريات شريط سينما بيمر قدامي، ماكتتش حاجة مفاجأة يعني افتكر ذكرى لينا النهارده؛ أنا على طول فاكراه، الي بستغربه انه..

ازاي يكون كل حاجة جوايا رافضاه؟ كل حاج؟ بتقول لا مش عاوزاه! واشتاقله وألح طيفه في المكان.. ازاي ممكن قلبي يفكر يميل؟ ازاي شامة ريحته! ازاي لسه بتمنى حضنه.. ازاي!!

= وحشيني يا نهلة!

\_ أميرة!! ايه المفاجأة الحلوة دي؟!

= حظك حلو، جوزي مش هنا ومسافر يومين، يعني هتقعدي معايا غصب عنك.

\_ أنا محتجالك أوي.

= مالك؟

\_ مش عارفة، زعلانة من نفسي أوي، عاوزة أعاقبها.

= ليه يا أميرة! حصل ايه؟.. كريم؟!

منطقتش بكلمة، دموعي بس هي الي كانت بتتكلم، كان بقالي

سنتين ماجبتش سيرته حتى .. بس نهلة كانت عارفة اني منستوش .

\_ جاية هربانة كالعادة .. وطالما لسة بتحبيه ما تديله فرصة!

= بعد ايه؟ لو أنا بحبه فأنا وجعي منه بقا أكبر من حبي له .. أديله فرصة تانية عشان يوجعني تاني؟ يسيبني ويختار غيري!

\_ وليه ما تقوليش انه خلاص عرف قيمتك بجد وانه مهما لف مش هيعرف يعوضك ولا يلاقي زيك؟

= وهو ليه مقدر نيش من الأول ويحافظ عليا؟ أنا لو ساحتته انه سابني وراح لواحدة تانية كان شايف انها أفضل مني فأنا مش هنسى الاحساس الي حسيته وقتها، وثقتي في نفسي الي اتهزت! مش هقدر انسى أسألتي لنفسي (هو أنا عملت ايه غلط؟ ايه كان ممكن اعمله عشان ميسبنش ويروح لغيري؟! طب هو أنا وحشة؟! أنا مستحقش يكمل معايا؟! عشان في النهاية .. وبعد وقت طويل طبعًا اكتشف اني معملتش حاجة، ومغلطتش في حاجة، هو الي عينيه كانت فارغة!! أنا مستاهلش أبدًا اني أحس بده.

\_ يبقى تنسيه يا أميرة، وتعيشي حياتك، وتحبي غيره، انسيه وانسي وجعه، وبصي لقدام، متوقفش نفسك عند محطة في حياتك، ولا على ألم مريتي بيه؛ لأن لو كل وجع هتقابليه هتقفي عنده .. هتقفي كثير أوي وهتضيعي عليك حاجات كثير أوي حلوة، أنا عارفة انك استحملتي كثير في حياتك بس أنا واثقة ومتأكدة ان ربنا هيعوضك عن كل ده وأكثر، أنت قوية وتقدري انك تكلمي ومتقفيش.

= عندك حق يا نهلة.. هي فين كندة؟!

\_ نايمة في اوضيتها.

= ينفع أنام جنبها؟

\_ أنتِ الي اختارتي استحملي بقا ههههه.. بس استني أجهزلك  
تاكلي.

= لا يا حبيتي، أنا بس محتاجة أنام.

\_ الي تحبيه.

دخلت أوضة كندة بنت نهلة.. الملاك الصغير، كنت محتاجة أنام في  
حضانها، أهذا ومفكرش في أي حاجة، كان نفسي يكون للعقل زرار  
ندوس عليه نوقف بيه التفكير ونفصل شوية عن أي حاجة شغلانا  
بدل ما هو يفضل شغال زي الطاحونة كدة ومخليني حاسة ان دماغي  
هتنفجر، حطيت راسي على المخدة وضمت كندة في حضني ولأول  
مرة من فترة كبيرة أوي أروح في النوم بسرعة كده.

وصحيت على صوت أغنية كدة كنت بحبها لمصطفى قمر غناها  
لياسمين عبد العزيز اسمها (لحظة تفاهم):

قبل أي كلمة تقولها عن ظنونك والي كان

قبل ما تفرقنا كلمة

قبل ما يفوت الأوان



يلا نسرق م الزمن لحظة تفاهم  
 محتمل نرجع وأحسن من زمان  
 خرجت من الأوضة لقيت بلالين كثير أوي، والأغنية شغالة وكريم  
 ماسك بوكيه ورد ويغنيها!

كنت طول عمري بقوله مش بصدق نهايات الأفلام السعيدة،  
 والحركات الرومانسية الجامدة دي، لقيته بصلي ويضحك، ويقول:

= أيوة أنا بعمل زي الأفلام والنهايات السعيدة؛ عشان احنا علاقتنا  
 مينفعش يكون ليها نهاية تانية غير دي.. وهي اننا نكون مع بعض، أنا  
 غلطت وعارف اني غلطت، بس مش غلطة اللي هتكتب نهايتنا، اعتبريها  
 صفحة جديدة وبداية جديدة، ونسرق من الزمن لحظة تفاهم، أنا متأكد  
 اننا هنرجع أحسن من زمان.

\_ كريم!

= أيوة

\_ متغنيش تاني؛ عشان أنت صوتك وحش وكرهتني في الأغنية  
 بصراحة.

= لو وافقتي نرجع مش هغني تاني.. غير في فرحنا طبعًا.

\_ موافقة!

(١٩)

## عشرة

\_ ماما.. كنتِ بتحبي بابا قبل الجواز؟

قالتلي: لا احنا ماكنش على أيامي حب والكلام ده، أنا اتقدملي اتنين، أبوكِ وواحد تاني، قالولي تختاري انهي اختارت أبوكِ، واتخطبنا وبعدين اتجوزنا.

\_ الله! طب ما أنتِ اختارتيه هو مش الثاني، اشمعنا يعني! ولا هو عجبك؟

= معرفش، أنا قولت آخذ ده وخلاص.

ماما كنت متمسكة بالدبلة بتاعة جوازها جدًا، عمرها ما قلعتها من ايديها، برغم ان بابا مكنش يلبس دبلة أصلاً عشان مش يحب يلبس حاجة في ايديه، بعد فترة كبيرة من وفاة بابا ماما تعبت شوية وبدأ جسمها ينزل في الوزن بشكل كبير، والدبلة بقت واسعة على ايديها، وغضب عنها وقعت منها ماتعرفش ازاى غير انها اتفاجئت انها ملقيتهاش في ايدها.. أنا فاكدة كويس أوي ماما في اليوم ده، كانت متضايقه أوي رغم اننا قولناها نحيلك غيرها عادي، إلا انها رفضت، قالت: مهما اجيب مش هيعوض عن الدبلة دي. وبعدها لاقيتها في الأوضة باصة

لصورة بابا، وبتقوله: أنا أسفة الدبلة وقعت مني غضب عني، أنا أسفة!  
وكانت بتعيط..

\*\*\*

مرة حد سألني على ماما وشخصيتها وكدة، قولتله: انها شخصية  
قوية جدًا، والجدع فينا يعارضها، ماما ما كنتش بتتفاهم؛ كانت بتضرب  
على طول.

بعدها سألني هي مامتك زعلت على وفاة باباك، رديت عليه وقتها:  
دي اتكسرت، بقيت عكس كل اللي أنا قولته عنها ده، فجأة لقيتها  
كبرت وعجزت، وبقا أقل حاجة بتأثر فيها.

\*\*\*

بابا قبل ما يتوفى كان تعب فترة وفي الوقت ده ما كنش بيتكلم معانا  
غير بسيط أووي، كان طول الوقت يبصلنا كأنه بيودعنا، كنت بحسه  
بيحفظ ملامحنا على قد ما يقدر، ومكنش بيخلي ماما تتحرك من جنبه،  
ولا حتى تبص بعيد، كان طول الوقت يقولها بصيلي متبعديش.. أيوة  
كدة متبعديش وشك عني.

\*\*\*

ليا أصحاب أول ما اتعرفت عليهم كانوا بالنسبالي أصحاب عادية،  
شوية شوية بقوا مقربين، شوية كمان بقوا أصدقاء أكثر، وشوية كمان بقا  
ليهم غلاوة ومعزة، وفي الآخر لقيتني بحبهم، بحبهم أوي وبفهمهم

حتى من غير ما يتكلموا، وساعات ببقا عارفة ردود فعلهم وحافظاها كمان.

عارفة عيوب كل واحد ومتقبلاها ولسه بحبه، أكيد اتعرضت لمواقف كتير تزعلني منهم إلا ان علاقتي بيهم فضلت قوية وبرضو بحبهم.

\*\*\*

كان في شخص غالي عندي، كان صديق ليا بس مع الوقت اتحول لحبيب، مع اني عُمري ما فكرت ان الشخصية دي تتحول لمنطقة أعمق من الصداقة؛ لأنه ببساطة كان مينفعش، وكان في ظروف كتير تمنع من ان العلاقة دي تكمل بالشكل ده، وان الأفضل ليها هي علاقة الصداقة، لكن لقينها بتتحول مننا لعلاقة أقوى وهي الحب.. حبيته بعد ما عرفت عنه كل حاجة، كنت شاهدة على لحظات ضعفه وعلى ظروفه وعلى عيوبه، كنت خلاص حفظته، كنت بعرف أقرأ أفكاره، كان دايمًا يقولي أنتِ ازاى فهماني كدة؟! بعرف اتوقع ردود فعله واعرف كمان اللي مخبيه عليا، كان بيفتكره ساعات ذكاء مني لكن هو كان نابع من عِشرتي له.

\*\*\*

دايمًا كنت بسمع جملة الحب بيعجي بعد الجواز، ويترد على الجملة دي بأنه ميبقاش حب؛ ده ببقا عشرة أو تعود.

كل الحوادث الي حكيته دي بتجمعها حاجة، هي الحب والعشرة، أوقات كثير الحب بيبدأ من العشرة وبيكون أقوى من مشاعر الحب المفاجأة (الخاطفة) زي ما بنقول؛ لأن الحب أو (الخاطفة) بتبقا مشاعر سخنة وتبدأ تبرد مع الوقت، ومع التعود بتحس انك خلاص انبهارك بالشخص راح، بقا مألوف بالنسبالك، حتى ردود فعله بقت بتعرف تتنبأ بيها، لكن الحب المبني على العشرة ده مختلف؛ ده حب اتبنى من شخص أنت أصلاً عارفه وحافظه وقابله وعشان كدة حبيته، مش مستني منه يبهرك طول الوقت، ولا يعمل حركة مطرقة يشدك له، ولا حتى ياخدك على حصانه الأبيض، ولا يطير بيك فوق السحاب، أنت مش مستني حاجة غير وجوده؛ لأن أنت بتربطك بيه حاجة أقوى من ده كله.

تعرف فلان؟ اااه، بتحبه؟ اااه.

طب عاشرته؟ لا.

بيقا لا تعرفه، ولا بتحبه.

(٢٠)

## نور

مكتتش نمت، لبست ونزلت اتمشى شوية، كانت خطواتي ثقيلة أوي، كنت شايفة كل حاجة حواليا أبيض وأسود، مفيش ألوان تانية.. مع اني بحب الألوان، خضار الشجر، وزرقة السماء، ولون السحاب الابيض، لون النيل، ضوء الشمس الي متقدرش تستخبي منه ضلمة. كنت ماشية ومش عارفة رايحة فين.. يمكن لما معرفش الطريق أوصل!!

مكتتش حاسة بحاجة غير تُقل على قلبي، معنديش شغف لحاجة بس حسيت فجأة ان عمري ضاع على الفاضي، في حاجات كتير مجربتهاش، حاجات مشوفتهاش، وحاجات أكثر مشبعتش منها، حسيت ان في حضن لسة مدخلتوش، ااه حضن! يمكن كان هو ده فعلاً الي كنت محتاجاه.. حضن، حضن اترمي فيه؛ استخبي من قسوة العالم، ابكي من غير حرج، حضن يطمني، يديني من برد الوحدة، حضن أتوه جواه، التوهة في الحضن أمان، حضن كان هيخلص من روحي حاجات كتير أوي.

فضلت ماشية أبص على الناس والشوارع، كنت ببص لوشوش الناس المهمة؛ عشان اتطمئن اني مش لوحدي، وان في غيري همومه

أكبر مني بكثير.

فضلت ماشية لغايه ما وصلت لمكان على النيل، قعدت فيه وطلبت قهوة سادة عشان احس بمراتها، وكانت كل رشفة منها كنت حاسة اني بقبل ألم من الألامى، بشربه، واستطعمه، واخذ منه فائدة وجوده في روحي، زي فنجان القهوة اللي بناخد فائدته.. بنفوق، بنركز أكثر.. على فكرة القهوة والألم نفس المفعول، الاتنين بي فوقونا ويخلونا نركز أكثر؛ فنعرف قيمة حاجات كثير.

فنجان القهوة خلاني أحن للماضي، لحاجات فاكدة اني نسيتها بس طلعت موجودة وواحدة مكان كمان، فارضة نفسها في كل حاجة بتفاصيلها.

اهاه منها التفاصيل اللي بنيت حكايات وهدت غيرها، التفاصيل اللي لو كنا ركزنا فيها كانت حاجات كثير أوي اختلفت، كان في حاجات كثير اتغيرت.. يمكن كمان مكنتش حصلت! يا ريت كنا اهتمينا بالتفاصيل! يا ريت كنا اديناها حقها! يا ريت!

يا ريت كنا بزراير ندوس على زرار نحب، وندوس علي زار غيره ننسى!

يا ريت كان كل حاجة باختيارنا! بس حتى دي كمان كنا هنختار ونقول يا ريتنا ما اختارناها..

يا ريت كان لقلبنا بديل على رأي انغام، مش علشان ينسينا؛ لكن

عشان يقويننا في لحظة ضعفنا ما يسبناش!

تعمل ايه كلمة يا ريت لو الوقت عدى؟ وتعمل ايه بعد ما اتألنا!  
مش هتعيد الي كان ولا هترجع الزمان. يا ريت كنا نقدر نوقف الزمن  
عند لحظات معينة!

ويا ريت كان ينفع نمسح الذكريات من روحنا!  
يا رتنا ما حيينا، ويا رتنا حيينا الي حبونا، ويا ريت الي حييناهم  
حبونا!

يا ريت كنت مشيت من أول قبضة قلب!  
يا ريتني مشيت قبل ما أكمل في طريق مالوش آخر!  
لكن هتعمل ايه كلمة «يا ريت»؟!  
تحقق حلم من عدم...

ولا ترجع عمر راح في انتظار...؟  
يا ريتنا كنا غير! يا ريتنا اتقابلنا في وقت تاني!  
يا ريتنا فهمنا بدري.. يا ريتنا فضلنا صغيرين..  
يا ريتنا قولنا للي بنحبهم اننا بنحبهم أكثر!  
يا ريتنا قضينا معاهم وقت أطول!  
يا ريت كانت كلمة «يا ريت» بتفرق...!



خلصت فنجان القهوة ومكتش عارفة اعمل ايه تاني، بصيت في  
ساعتي لقيت فاضل ساعة على معادي.. وكلمتهم اني ممكن أوصل  
بدري شوية، وقالولي مفيش مشكلة عادي.

حاسبت على القهوة ومشيت، وأنا خارجة من المكان خبطتني بنوثة  
كانت مستعجلة، الخطبة كانت جامدة بس البنت الحقيقة اعتذرت كثير.  
خطبة الجسد أسهل بكثير من الخطبة اللي في الروح، خطبة المشاعر  
الي بتفوقك من غفلتك، خطبة القلب الي بتفلقه نصين بعد كل خذلان  
من حد بتحبه.

وقفت تاكسي..

- مصر الجديدة؟

= انفضلي.

التاكسي كان مشغل عبد الوهاب (يا مسافر واحدك).

وهو كام واحد فينا حبيبه سافر وهو جنبه! السفر مش مسافات،  
السفر في المشاعر أصعب بكثير أوي من المسافة، بعده عنك بمشاعره،  
سفره لقلب حد تاني غيرك.. تفكيره في غيرك!

غربة بتحسها من حبيبك وهو جنبك، سافر لواحد وسابك تايه،  
غريب وأنت في أرضك.. سافر لحياة تانية مع حد تاني، وأنت مش في  
حسابانه!

عينيك الي دموعها بتتكلم.. مش هيعرف يقرأها؛ عشان ميعرفش لغتها.. ميعرفهاش!!

\_ أنا آسفة اني جيت بدري عن معادي..

= لا طبعًا يا أستاذة نور، أنتِ نورتي.

\_ متشكرة جدًا، هي دكتورة مها موجودة؟

= اه موجودة، ومستنيكِ كمان.

\_ ايه ده بجد؟

= اه، اتفضلي هي في انتظارك.

\_ ازيك يا دكتور؟

= ازيك أنتِ يا نور.. برضو نفذتي الي في دماغك وجيتي لواحدك؟

أنتِ لسة معرفتيش حد!

\_ ومش هعرف...

= ليه يا نور! مينفعش تشيلي كل دا لوحداك، أنتِ في أكثر وقت

محتاجة حد يكون جنبك ويساندك في رحلتك؛ الموضوع مش بسيط.

\_ وليه لازم أعرف حد وجعي! ليه لازم أبين ضعفي قدام حد؟

مش كل الي هيعرف وجعك هيداويه، ولا كل الي هيشوف لحظات

ضعفك هيكون أمين.

أنا قوية كفاية يا دكتور اتحمل متاعب الرحلة دي؛ لإنني شايفها فعلاً

رحلة، رحلة ولازم استمتع بيها وبمتاعبها، واتعلم من الدروس اللي هقابلها في طريق، احنا أصلاً جايين الحياة رحلة.

= بس محدش بيعيش لوحده؛ وجعك لو اتقسم مع غيرك هيقُل، لازم يكونلك ونس في رحلتك.

\_ يا دكتور، محدش له ذنب أقاسمه في وجعي، هيفيد بأيه انه يعرف ألمي ووجعي! مش هيقدر يعمل حاجة غير انه يشفق عليا، يتصعبن عليا كل ما اتعب، ويخاف من أي حاجة يقولها ولا بيتصرفها لي جرحني، يعاملني زي الطفل الصغير اللي بيتعلم المشي وخايف عليه ليتخط ولا يقع.

دكتورة، احساسى بالألم بأنهم يشفقوا عليا أو صعبانة عليهم أصعب بكتيبيير من ألم الكنسر.

أنا مش لوحدي؛ معايا اللي ساندني من غير ما اطلب والي ضعفي قدامه بيتحول قوة، مش بيقاسمني في وجعي.. بس بيديني الطاقة اللي تتحملة..

\_ يلا بقا؛ أنا جاهزة.

= مفيش فايدة يا نور، دماغك ناشفة، ربنا يدريك القوة ويسندك، يلا يا حبيبي.. متخافيش، هتبقي بخير.

\_ إن شاء الله..

(٢١)

## نقصيل

عاوز ابتسامتك تكون هادية، عندك ثقة بالنفس ودمك خفيف، ااه  
ومتنسش! عينك تقفل لما تضحك جامد.

بالنسبة للماشية، أنت وماشية جنبي امسك في ايدي، اتشعلقي فيها  
جدًّا، حسسني انك حاسة بالأمان معايا واني الحصن الي بتتحمي  
فيه.

لما تيجي تقعدي اقعدي بثقة وحطي رجل على رجل لما تكون  
القاعدة مش على هوائك، ولما ترتاحي للأشخاص والمكان ربعي رجلك  
واتعاملي بعفوية وحرية من غير حساب لحاجة.

كلميني أول ما تصحي، وقبل ما تنامي، وطول اليوم؛ عشان تطمني  
عليها.

وطبعًا مش هو صيكن.. أنت بتغيري عليااا موووت، ودبي خناقة  
معايا لما تلاقي واحدة قربتلي.

اكتبيلي شعر؛ عشان تبسطيني، وهزري واضحكي معايا؛ عشان  
تخرجيني من المود.

اسمعيني لما احتاج اتكلم، طبطبي عليا لما تضيق بياا، قوليلي كل حاجة بتعدي وهيبجي الأحسن لسة ربنا شايلنا الأجل.

قوليلي أنا معاك.. جنبك.. في ضهرك، وأحارب الدنيا معاك.

ومتسبنيش مهما حصل حتى لو قولتلك مش عاوز أكمل.

كنت بحب اسمع أغنية قديمة كدة لسميرة سعيد، كانت بتقول:

قال جاني بعد يومين، يبكيلى بدمع العين

يشكي من حب جديد، يحكي وأنا ناري تنيد

وسمعت وفكري شريد، وسكت وقلبي شهيد

كنت اتخيل الموقف وأنا بحب حد وييجي يحكيلى على واحدث تانية

بيحبها، كنت اسأل نفسي اعمل ايه لو ده حصل معايا؟! مكتش بعرف أوصل لإحساسي وقتها.

لكن لما جربت احب حد وهو بيحب غيري وشايفني؛ هي لقيت إن

القلب بيتفتأ زي حنة القماش الدايبه الي مستحملتش الشدة فاتقطعت نصين.

وده أعتقد الي معرفتش توصفه سميرة سعيد، غير بكوبليه:

شايفين الظلم يا ناس! ده حلال ده ولا حرام؟

ااه من جرح الاحساس، ده ألأمة أشد ألأام

(والي مالوش حل غير الي قاتله في الكوبليه الي بعده):

أوصيلك بالصبر يا قلبي!

في حاحه تقدر تخليك تكمل غير الصبر! الصبر على جرحك يداوى مع الأيام، قلبك اللي انفتأ زي قطعة القماش يتخيظ. الصبر اللي يخليك تستحمل جروح المشاعر الحالية واللي جاية.. الصبر بأن هو ده الطبيعي طالما لسة بتحس وعندك احساس ومشاعر.. الصبر على غرامه اللي طلع أوهام!

\_ أنت عايز ايه دلوقت! جاي ليه؟!

= بحبك.

\_ لا، أنت مبتحبنيش، أنت بتحبها هي مش أنا، طول الوقت شايفها هي، لكن أنا.. أنا مش موجودة بالنسبالك.

= لا خالص، أنا بحبك يا سا... يا سلمى.

\_ يا سارة! غلطت في اسمي كالعادة ونطقته اسمها.. أنا عارفة ان كل كلمة حلوة كنت بتقولها لي كانت بتبقا ليها هي مش أنا، حتى كلمة بحبك دي ما كنتش بتبقا ليا. عمرو أنا حتى لبسي كنت بتختاره على ذوقها، أنت كنت عايزني نسخة تانية منها! أنت حتى مدتش نفسك فرصة تحبني زي ما أنا، عاوز تغيرني؛ عشان تحبني، عشان أكون حد تاني أنت بنفسك فرطت فيه؛ عشان ماكنش عجبك.. هو الإنسان كدة يتمرد على الشيء لحد ما يروح من ايديه فيعرف قيمته! وأنا بكل ثقة عارفة ومتأكدة انك هتندم عليا، وهتحس قد ايه أنت خسرتني، ومش

هتعرف لا تعوضني ولا تعوضها، على فكرة.. أنا لو ساحتك يا عمرو  
فأنا مش هقدر انسى وجع قلبي في كل مرة بتغلط في اسمي وتندهني  
باسمها، ولا كل مرة أكون معاك وتتكلم عنها وفاكرها وفاكر بتحب ايه  
وبتكره ايه، أنت عمرك ما سألت نفسك أنا كنت بحس بأيه؟!

= صديقي مكنش قصدي، وأنا أوعدك اني هتغير، ومع الوقت  
هتلاقيني نسيت و...

\_ وحييتني! يمكن مع الوقت تحبني، بس أنا مش هستنى الوقت  
يتحنن عليا ويخليك تحبني يا عمرو.. أنا مش عاوزه أشوفك تاني،  
وكفاية أوي اللي كسرتوا جوايا.

(٢٢)

## شريهان

\_ بنت صغيرة عندها ٨ سنين، بتتفرج على التلفزيون في سعادة، بنظرة كلها اعجاب وانبهار بواحدة جميلة شعرها طويل بترقص بخفة ورشاقة ودلع، ملاحظها كلها جميلة وضحكها تخليك تشوف كل حاجة بالألوان، واحدة متعرفش تعمل حاجة قدامها غير انك تحبها.. تحبها وبس!

مكنتش اعرف اسمها ايه، ولا مين دي! معرفش غير انها بنت حلوة أوي وتخطف قلب أي حد، بعدين عرفت إن دي شريهان، اسم متكررش ونجمة ما تتكررش تاني.

وأنا عندي عشر سنين كنت في البلكونة بتاعتنا بلعب بالعرايس بتاعتي، وأنا بلعب لمحت في البلكونة اللي قدامنا واحدة بتسقي الزرع وكان شعرها طويل أوي، وأول ما لفت وشها فضلت انتنطط، وجريت على ماما أقولها: ماما، الحقي شريهان سكنت قدامنا.

= شريهان مين اللي سكنت قدامنا! وشوفيتها فين؟!

\_ في البلكونة اللي قدامنا يا ماما، بتسقي الزرع، تعالى شوفها بسرعة.



وجريت ماما معايا على البلكونة وهي مش مصدقة طبعاً؛ شريهان  
تسكن قدامنا ازاي؟ وأول ما ماما دخلت البلكونة وشافتها قالتلي:

= دي هالة، يخبيك يا فريدة.

\_ هالة مين يا ماما! دي شريهان اللي بتطلع في التلفزيون.

= لا دي هالة، طنط هالة كانت مسافرة ورجعت من السفر، بس ده  
ايه اللي رجعتها دي دلوقت؟!

سابتني ماما ودخلت تكمل الأكل، وأنا فضلت أبصلها ومش  
عارفة اشوفها غير شريهان،

وفجأة لقيتها بصتلي وضحكتلي وعملتلي باي باي؛ هي شريهان، هي  
بجهاها وخفتها.

لما بابا بقا رجع على الغدا ماما حاكيته اللي حصل النهارده.

\_ اسكت مش هالة بنت استاذ صلاح الله يرحمه رجعت من السفر!

= اللي كانوا ساكنين قدامنا دول؟!

\_ أيوة، وفريدة بتتك افكرتها شريهان.

فريدة: على فكرة هي شريهان، وعملتلي باي باي كمان.

\_ يا حبيبتي قولتلك دي واحدة شبهها.

= هي فعلاً كانت جميلة وشبه شريهان.

\_ جميلة اه، بس راجعة بطولها، شكلها متجوزتش!

= يا ستي ربنا يعدلها.

وقتها مركزتش أوي في جملة ماما؛ يعني ايه جميلة بس متجوزتش!!

فضلت أتابع هالة أو شريهان زي ما كنت مسمياها، كنت معجبة بيهما أوي وبجمالها؛ كانت ست شيك وجميلة وناجحة، وكانت بتحب الأطفال أوي؛ كانت دايمًا تجييلنا حاجات حلوة لما كانت تلاقينا بنلعب قدام العمارة.

كنت بحبها أوي، وكان نفسي لما أكبر أكون زيا وألبس لبس حلو شيك زيا كدة!

ولما كبرت عرفت انها فاتحة أتيليه وهي اللي بتصمم اللبس بنفسها، وطبعًا عشان كدة لبسها كله شيك أوي وحلو، كنت دايمًا بحسها هانم كدة في نفسها، وطبعًا شريهان.

وكنت دايمًا اسمع من الناس هما وييتكلموا عليها كانوا دايمًا يقولوا ازاى واحدة حلوة أوي ومتجوزتش؟!

خسارة جمالها ده كله تعيش كدة لوحدها ومتجوزش!!

وبرضو ما كنت بفهم ايه علاقة جمالها بإنها متجوزتش، بعدين الأيام بقت تجري والسنين تمر، بس عمرها ما مرت عليها؛ كانت زي ما هي ويمكن أحلى كمان، طنط هالة كمان شغلها كبر ونجحت أكثر في المجال بتاعها، فتحت شركة كبيرة باسمها، وعملت مدرسة عشان تعلم البنات

التفصيل، بس الناس عمرهم ما شافوا إنجازتها دي كلها مكنوش  
 يشوفوا غير حاجة واحدة بس انها جميلة أوي بس متجوزتش.. وكأن  
 ده الإنجاز الوحيد لأي واحدة حلوة هو انها تتجوز..! طب افهم من  
 كدة إن أي واحدة وحشة مش هتتجوز؟! ولا لو واحدة متجوزتش  
 يبقى عشان وحشة؟! طب هو مين أصلاً اللي قرر خلاص انها وحشة؟!  
 احنا ليه طول الوقت بنسعى للجمال وللكمال؛ كأنه هو ده المغزى من  
 وجودنا في الحياة! بركب شعر عشان نبقا حلوين، بننفخ ونشفط ونكبر  
 ونصغر عشان نبقا حلوين! طب عاوزين نبقا حلوين؛ عشان نتجوز؟!  
 عشان نرضي المجتمع الى فرض علينا إن الجمال مسيره للجواز وغير  
 كدة مينفعش!

طب هو الجمال نعمة ولا وسيلة للجواز؟!

وليه بنربط الجمال بالجواز! هو مش الجواز ده اتنين بيختاره بعض  
 يربطهم رابط الحب؟

اتنين قرروا يعيشوا ويكملوا حياتهم مع بعض؛ عشان متفاهمين  
 ومرتاحين مع بعض، مش عشان هي جميلة فلا ده أنا اتجوزها بقا..!  
 ليه بنستخسر الست الحلوة ونستخسر جمالها في كل حاجة إلا  
 الجواز؟!

دي ناجحة في شغلها اه، بس متجوزتش!

دي كاتبة ومفكرة، بس مش متجوزة!

دي بتعمل أعمال خير وبتساعد الناس، بس لسه متجوزتش!  
 كأن الجواز هو الهدف الأول والأخير في الحياة وأي هدف غيره ما  
 هو إلا هراء...

طنط هالة متجوزتش خالص، وعاشت لوحدها لحد ما سافرت  
 ثاني، وسابت الشركة لشباب صغير يديرها، سافرت بس فضلت ساوية  
 أثر حلو في كل مكان حتى في الزرع الي في بلكونتها.  
 بس للأسف لما سافرت الناس نسيت كل حاجة حلوة عملتها،  
 ومقالتش غير نفس الجملة:

رجعت لوحدها، وسافرت لوحدها، كانت حلوة اه.. بس  
 متجوزتش!!

(٢٣)

## فنجان قهوة

امتى الزمان يسمح يا جميل؟

امتى الزمان يسمح يا جميل؟

وأسهر معاك على شط النيل!

محمد عبد الوهاب.

كُل يوم بصحى الصُّبح بدري عشانٍ ارسم في البلكونة، اللي هي  
من حُسن حظي ومن نعمة ربنا عليا إنها بتطل على النيل، وبعمل فنجان  
القهوة بتاعتي وباخذ ألواني وفُرشتي وبسرح في جمال الطبيعة واستمتع  
بنسمة الهوا الصافية، وبتيجي في بالي على طول جُملة إسماعيل ياسين كان  
قالها قبل كدة في فيلم من أفلامه؛ أصلي بعشق إسماعيل ياسين والبركة  
طبعًا في بابا؛ هو اللي حبيبي في الأفلام الأبيض واسود، وخصوصًا  
أفلام إسماعيل ياسين؛ فنان بسيط أوي، ولذيذ، ويدخل القلب بسرعة،  
مبيعملش مجهود خالص عشان تحبه، وده الصح؛ أنت مش مُطالب

منك أبداً تعمل مجهود عشان تتحب؛ عشان أنت أصلاً أبسط تفاصيلك مُلفتة.

المهم كان يقول ايه بقا اسماعيل ياسين؟ آه: «يا سلام على نعمة ربنا.. شمس، وهوا، ومياه، وكُل ده ببلاش.. الحمد لله!».

الرشفة الأولى:

اعمم مطبوعة، أكثر حاجة بتعجبني في القهوة وشها؛ عشان وش واحد غيرنا خالص كبني آدمين؛ بقينا بنلبس ميت وش على وشنا عشان نعجب، وعشان نساير الي قدامنا هو مين فينا أصلاً بقا عايش بوشه الحقيقي! مين عايش بوش واحد؟

الفرشة:

الألوان حلوة أوووي، بتديني أمل في الحياة.. لازم يكون في حياتنا حاجات بتدينا أمل في بكرة مينفعش نعيش حياة من غير أمل؛ اليأس يقتل نفس البني آدم، أما الأمل فيحييها.

الرشفة الثانية:

ريحة القهوة بتفكرني بريحة المطر في الشتا.. صوت فيروز.. زقزقة العصافير.. ريحة القهوة بتفكرني بالتفاصيل، ومفיש أجمل من التفاصيل؛ الي مركزش وانا أمل في تفاصيل الطبيعة فاته كثير، والي متأملش تفاصيل جسمه ونفسيته فاته أكثر وأكثر، فاته يعرف عظمة الخالق الي مهتم بالتفاصيل وخالقها بحب.

## الفرشة:

في كل مرة برسم فيها لوحة بحس انها حنة مني، وأفضل أسأل نفسي هي حياتنا لوحة! طب لو لوحة مين اللي رسمها؟ أنا ولا حد ثاني! وأنا اللي بختار ألوانها، ولا هي جاية بلونين مبيتغيروش إلا اسود والأبيض زي أيامنا كدة، يوم حلو ويوم وحش.. طب واللون الرمادي! احنا اللي عملناه، عملنا منطقة رمادية كدة، اللي هي بين البينين؛ عشان تبقا فاصل بريك.. استراحة يعني، ولا عشان منزعلش بيها حد؟!!

## الرشفة الثالثة:

كثير قوي بحسد فنجان القهوة ده؛ موده متحدد، ومعروف قهوته يا سادة يا زيادة يا مانو، لكن احنا بين التلاتة مود دول بندخل في مليون موود؛ كل شويه بحال.. معرفش هل مودنا اللي بيتغير كل شوية ده أحسن لينا ولا لا.. بس اللي متأكدة منه إن حزن مؤقت ودي حاجة تبسط أوي، والفرح مؤقت ودي حاجة تقلق أوي.

## الفرشة:

متخليش حد يرسمك الخط اللي هتمشي عليه، ولا تسمح لحد انه يشخبط على وشك؛ أنت شكلك كدة حلو زي ما أنت، أصل أنت عمرك ما هتعرف ترضي الناس، والأهم منهم انك تبص في المراية وتشوف نفسك حلو وراضي عنها.

## الرشفة الرابعة:

مش مهم أي حاجة تانية بقا.



(٢٤)

## الحلو بابا

خايف أقول اللي في قلبي تعرف وتعند ويايا

ولو داريت حبك تفضحني عيني في هوايا

صحيت على صوت فيروز اللي مشغلاه طنط ميرثت جارتنا، وطبعًا  
ريحة القهوة الواصلة لحد أوضتي. حاجة آخر مزاج يعني.. غريبة أوي  
فيروز دي يا اخي؛ بتعمل جو يهدي الأعصاب، مش طبيعي بس هموت  
واعرف مين اللي ربط صوت فيروز بالقهوة، يعني اللي ميحبش القهوة  
مينفعش يسمع صوت فيروز مثلاً!

صوت فيروز ده أكبر بكثير من انك تسمعه بس وأنت بتشرب قهوة  
ولا بتقرأ كتاب، صوت فيروز دايمًا يفرض نفسه، تحسه انه بيناديك  
منين ما تكون. يعني أنا مثلاً لما بسمعه بحس نفسي في لبنان، ااه والله ده  
أنا بكلمك من هناك!!

قومت من على السرير عشان اغسل وشي واعمل حاجة اشربها،  
وواحدة قرار اني مش نازلة من البيت النهارده.

– صباح الخير يا بابا.

= صباح الفل يا قلب بابا.. يلا تعالي جهزتلك حنة فطار إنها ايه..  
عظمة! يلا افطري قبل ما تنزلي.

\_ لا ما أنا مش نازلة النهارده الشغل.

= ليه يا حبييتي! حصل حاجة؟

\_ لا يا حبيبي، بس حسيت اني عاوزة اقضي اليوم معاك النهارده،  
مش عاوزة أنزل.

= يا سلاام! أنا أطول ست الحسن والجمال تقعد معايا اليوم كله  
النهارده.. طب أنا بقا هعملك أحلى مكرونة بشاميل في الكون، أحلى  
من بتاعة امك كمان!

\_ يا باباااا! هههههههه.

= مش أحلى أوي، بس شغالة.

\_ ربنا يخليك ليا يا رب.

= ويخليك ليا يا كتكوتة بابا.. يلا كمي فطارك وأنا هقوم نعملنا  
كوبيتين شاي نحبس بيهم.

دايمًا بابا فاتح نفسي على الأكل؛ يعمل أكل حلو أوي.. حتى لو طبق  
فول بيكون له طعم ثاني من ايده، دايمًا بابا وهو بيجوز الأكل بيكون  
مبتسم ومبسوط، بيعمله بحب عشان كدة بيكون له طعم مختلف ويجبر  
أي حد ياكل حتى لو كان مالوش نفس زبي كدة هتلاقه نسف السفرة

في ثواني. بعد ما خلصت لميت السفارة ودخلتله المطبخ لقيته بيعملنا  
أحلى كوبايتين شاي بالنعناع.

\_ خلصتي فطارك؟

= ااه يا حبيبي، تسلم ايدك.

\_ طب يلا بقااا، امسكي كوبايتك وتعالى ورايا على البلكونة.

= ماااشي.

دخلنا البلكونة وبابا شغل أم كلثوم وأكثر أغنيه بحبها ليها (أنت  
عمري) يخربيت الجمال! لحن محمد عبد الوهاب اللي تحسه معمول السنة  
دي، لحن يعيش للأجيال كلها، مصدقش أبداً إن اللحن ده من سنة ٦٤  
مش السنة دي! ولا كلماتها اللي تحسها بتديلك عمر من تاني بلقا الحبيب  
ينسيك الماضي اللي شوفته بجروحه وآلامه.

\_ صاحب مزاج أنت أوي يا بابا.

= ااه طبعاً.. صوت أم كلثوم ده إدمان، عارفة يا زهرة.. كانت دايمًا  
ماما بعد ما نفطر تعملنا كوبيتين شاي ونقعد هنا في البلكونة ونشغل أم  
كلثوم ونفضل نتكلم عن ذكرياتنا مع بعض.

\_ كنت بتحبها يا بابا؟

= مين.. أم كلثوم؟

\_ لا، ماما يا بابا.

= ماما!.. هو أنا عمري حببت غير امك؟ الله يرحمها كانت بلسم، كل حاجة كانت تشوفها بسيطة، مشاكل الدنيا عندها تهون، مهما يحصل تقولي سهلة هتعتدي.. وكانت بتعتدي فعلا، الي مصبرني على فراقها انك شبهها، بس أنتِ أشقى منها.

\_ الله يرحمها..

= هاه بقا، قوليلي مالك؟ منزلتيش ليه النهارده الشغل!

\_ ما قولتلك يا بابا، كنت عايزة اقضي معاك اليوم.

= يا ابت! هو أنا هتوه عنك يعني؟ أنتِ فيك حاجة متغيرة، ماالك؟!

أخذت نفس عميق وطلعت به بوجع، وبصيت للشارع، ورجعت لبابا تاني وقولتله: تعبانة يا بابا، تعبانة أوووي!

= مالك يا حبييتي، ايه الي تاعبك؟؟

\_ حاسة بتقل غريب في قلبي.. ثقل اتجاه الأشياء الي بحبها، والناس، وكل حاجة.. وخيفة.. خيفة أوي.

= خيفة من ايه بالظبط؟!

= من كل حاجة، خيفة من الي جه، واللي لسه مجاش.. خيفة أتعلق، وخيفة من الي اتعلقت بيه، خيفة أمشي في طريق مش طريقي، وأمشي سكة ملهاش آخر، خيفة شغفي يقل مع الأيام بالحاجات الي بحبها، وخيفة أحلم حلم مش من حقي، وأحب الي مش مكتوبلي...

خائفة أكون بستنى الي مش جاي، واتعشم بحاجة مش ليااا.. وافضل متشعبطة في حبال دايبة هتاخدني وأقع على جدور رقبتني واتكسر وتتكسر معايا أحلامي كلها.. بس أنا مقداميش غير اني استنى؛ يمكن الي جاي يكون أحلى فعلاً ويطلع ده كله غلط! يا إما امشي في سكة الندم فيها بعدين مش هيعمل حاجة.

\_ عارفة يا زهرة! كان في مرة زمان راجل راجع بيته متأخر أوي في عز ليلي الشتاء، وفي وسط ما هو في الطريق لبيته حس بحركة وراه، خوفه خلاه مقدرش يُبص يشوف في ايه، فضل يمشي يمد وهو خايف، والحركة وراه تزيد، وهو ينهج ويعرق في عز الثلج.. ونبضات قلبه تزيد من الخوف، لحد ما وقع ومحطش منطق.

\_ مات؟!!

= من الخوف يا بنتي.. خاف من مجهول، عارفة الي كان خايف منه كان ايه؟ قطعة ماشية عادي، بس هو استسلم لإحساسه بالخطر.. توقع الوحش، ونسي ربه الي حافظه، كان ممكن جداً يلف يشوف في ايه ويتظمن، لكن هو قرر يكمل مشواره خايف، وكانت النتيجة انه موصلش! الي عايز أقولهولك يا بنتي ان الخوف هيحرمك من حاجات كتير حلوة حواليك؛ الخوف ييموت صاحبه، لكن الأمل بيحييه، خليك واثقة في ربنا انه أحسن عليك من انه يعلقك بحاجة مش ليك، ولا بحلم أنت مش قده؛ امشي في طريقك بثقة في الله وفي نفسك، وأكد ربنا هيفتارك الصالح دايماً وأبدًا.

\_ ربنا يخليك ليا يا بابا، ساعات كثير أووي ببقا مش عارفة من غير  
وجودك جنبي كان ممكن يحصلي ايه! وجودك بيطمني.  
= تعالي في حُضن بابا.. واقوي للدُّنيا.

(٢٥)

## حبك بطعم البطيخة

أنا عمري ما كان عندي مواصفات لشريك حياتي، ولا رساله شكل وشخصية في دماغي كدة ويا هويا بلاش؛ وده لإنني مُقتنعة انك لما بتحب شخص بتشوفه حلو ومُناسب ليك، حتى عيوبه.. اه مبتحبهاش لكن بتعرف تتعايش معاها عادي.

أنا دايمًا لما حد بيسألني عاوزة شريك حياتك تكون مواصفاته ايه، مبعرفش أُرِد غير بكلمة واحدة «ونس» عاوزاه يكون ونس.. أعرف أشاركه كل حاجة، الفرح معاه يزيد، والحزن يقل، والنجاح يكون له طعم.

أحب أشوفه وسط يوم حررر وزحمة وخنقة، يوم كله ضغط، أحب اني أشوفه؛ عشان هيبقا هو نسمة الهوا اللي هتلفف يومي، واسبرينة الصداق اللي هتريحني من ضغط اليوم، والهدنة من الزحمة والوشوش الكثير اللي شوفتها.. باخد نفس وبحس اني ببدأ اليوم من جديد وبانتعاش.

هشوفه شبه كل حاجة بحبها.. الأفلام أبيض واسود القديمة، الأماكن التاريخية، في ريحة الكتب، صوت فيروز الصبح، وصوت أم

كلثوم وهي تقول (خليني جنبك خليني فحضن قلبك.. خليني)، كل الأغاني القديمة الي بحبها.. شبه موسيقى الجاز، وأفلام الكرتون. الأكل الي بحبه، والجوابات المكتوبة بخط الإيد. لما اشوفه أحس بانتعاش، زي مثلاً انتعاشك بعصير اللمون بالنعناع، أو البطيخ المتلج في عز الحرر فيطري على قلبك. ايس كريم من عند العبد وأنت بتتمشى في وسط البلد. أول شوية هوا من مكان في تكيف بعد ما اتسلخت في الشمس والحر... شيكولاتة بالبندق وقت التوتر، وشاي أخضر بالنعناع آخر اليوم، الكتاب الحلوو الي بياخدك ويفصلك عن العالم. صوت مسار إجباري الي بتسمعه وانت في عربيتك في الطريق. عربية التين الشوكي في الصيف. كوز الدرة المشوي الي يشبع أجدها جعان. المانجا ولغوصتها، كوباية عصير القصب وأنت عطشان، القاعدة قدام البحر في اسكندرية، آكلة سمك جامدة، النكت البايخة الي بضحكك برضو.. الصبح الساعة ٦ صباحاً، عربية الفول، أول كوباية شاي في اليوم تحبس بيهااا.

هو هيكون تفاصيل كتيير أوووي.. وهشوفه في كل تفصيلة حواليا، بشم ريحته في كل مكان بحبه وأي حاجة بسمعها.



(٢٦)

## حنين

آخر حاجة كُنت أتوقعها اني آجي المكان ده!! أصل بصراحة مكان  
يخوف؛ هادي أوي كدة ومفهوش ونس.

بس أنا مش حاسة إني خايفة!! يمكن عشان أنت موجود؟! هو  
مفيش ناس كتير بتيجي هنا؟! أعتقد مفيش حد هيجي هنا إلا لو  
الحنين غلبه زي حالاتي..

هو أنت زعلان مني عشان مكنتش بجيلك؟! على فكرة بقا مش  
معنى اني مش بشوفك ابقا ناسياك، أنا دايمًا فاكراك وفكرة كل كلام  
اتقال بينا بالنص، وحافظاه صح، وفاكره، حتى عتابك ليا على التأخير  
وعلى طولة اللسان والدبش.

آه صح، أنا جيالك معايا الحاجات اللي بتحبتها، الشيبسي شطة كبير،  
والمولتو كمان.

قولتلك ميت مرة بلاش هزار بالإيد..

ايدك ثقيلة يا أخي!

أيوة يا اخويا فاكرة.. أول مرة تَضْرِب في خناقة عشاني، كان شكلك

يضحك أوي وأنت داخل بثقه كدة وفتح صدرك وهوب أخذت بونية في عينيك.

طب أنت فاكرك لما خبطتني باللعبة واحنا صُغيرين؟! وقتها اتعورت ونزفت دم كثير أوي.. مش قادرة أنسى نظرة خوفك وقلقك عليا وقتها، زي حاجات كتير تانية منستهاش، زي مسكت ايدك ليا في تعديّة الشارع.. وفي مفاجأة حلوة في عيد ميلادي عملتها لي.. ولما عديتني وأنت عندك برد ونمت في سريرك.

أنا الكلام أخذني ونسيت أسألك! ها بقا قولي عامل ايه هنا؟! مرتاح طبعا.. مرتاح من الزحمة والدوشة والحناقات والحوادث والقرف.. ومن البني آدمين اللي اتغيروا!

هو أنا ممكن ييجي عليا يوم واتغير زيهم؟! أنا خايفة!! كل مابشوفهم بيتغيروا للأوحش بخاف على نفسي.. ومن نفسي أكثر.

المهم كان في حاجات كتير أوي عاوزة أقولك عليها.. أنا جيت حاجات كتير كان نفسي فيها وحققت حاجات تانية كنت بتمناها، بس مش عارفة ليه مش مبسوفة، مش مرتاحة، متبصلش كدة.. أنا مش معقدة!

بس أنا مش زعلانة منك، ومش زعلانة منك على فكرة انك مشيت حتى من غير ما تقولي سلام!

أنا زعلانة؛ عشان كان في حاجات كتير المفروض اعملها

ومعملتهاش.

زعلانة على كلمة حلوة بدل ما أقولها اتكسفت؛ فرميتلي دبشتين!  
طب تصدق بقا إن الوجة اللي بجد ماكنش في الفراق! الوجة  
الحقيقي كان في التفاصيل؛ التفاصيل الصغيرة أوي اللي عيشتها بعد  
ما أنت مشيت.

عن طبق زيادة بيتحط على السفرة، صورة محتاجة تتعلق..  
الوجة كان في الروتين اللي كنت بعيشه معاك كل يوم، الروتين  
العادي الممل اللي اتحول فجأة لذكرى بتمنى ترجع ولو دقائق!  
عارف أنا مبكيش من الفراق، أنا ببكي من الحنين؛ أصل الحنين ده  
حاجة كدة بتيجي تخبطك في نص روحك، تلخبطك، وتقلب كيائك،  
وتخليك مش عارف..

يا إما مش عارف تعيط أو مش عارف تبطل عياط!  
ويبدأ ياخدك ويوديك زي ما هو عايز.. أصل الحنين ده مالوش  
كبير!!

ياااه أنا تأخرت أوي! الوقت معاك عدى بسرعة والليل ليل.  
بصراحة المكان هنا يخوف أوي بليل.. عارفة انك موجود آه، بس  
أنت عارف اني جبانة.

متقلقش هجيلك تاني، زي ما كسرت حاجز الخوف المرة دي بالحنين

هعرف أكسره المرة الجاية.

ابقا تعالى زورني أنت كمان! بلاش كسل..  
هتوحشني وأنت أصلاً على طول واحشني!  
يلا سلام.. سلام يا عم الميت الكسلان.

## (٢٧) نفاصيل

صوت المطر.. ريحة الجو في الشتا  
صوت طرطشة الزيت وتجهيز الفطار  
ريحة البُن والقهوة بتتعمل  
صوت أم كلثوم من بعيد  
دقات الساعة  
كاست قديم وشرايط عبد الحليم وأم كلثوم.. وأغاني التسعينات  
ألبوم صور قديم مليون ذكريات  
الصور المتعلقة على الحيطان وكل ضحكة فيها حياة تانية  
الستائر بتتحرك من الهوا  
الكرسي الهزاز  
متابعة الأخبار  
حركة صوابع ايدي على الكرسي

سجارة متولعة في طفاية وجنبها فنجان قهوة سادة

جرس الباب يضر ب

التليفون بيرن

خطوات الرجلين قدام الشقة!

أنا عمري ما نسيتها.. أنا حافظ كل ملاحظتها صم.. كانت دايمًا تقولي  
حبك للتفاصيل هيجب أجلك، متعرفش ان عشقي للتفاصيل جه من  
حبي ليها هي، من تفاصيلها هي!

ضمة حاجبها لما تتعصب

رعشة ايدها لما تتوتر

وطقطقة صوابعها لما تتكسف قدام الناس

خدودها اللي بتحمر من البرد

وعنيها اللي بتقلب عسلي في الشمس

هزة رجلها لما بتغير، وعصبيتها اللي ملهاش مبرر

ضحكتها بصوت عالي، وعنيها لما تقفل

وابتسامتها الهادية لما بتكسف

وضحكتها لما بتقفشني!

حبها للشاي بالنعناع ساعة العصر

وفنجان القهوة المظبوط الصبح  
 مبتحبش الطماطم فبتشيلها من السندوتشات  
 لبس الساعات  
 الألوان الغامقة  
 الآنتيكات  
 كلمة (بجد، وفعلاً، وجداً) اللي دايمًا موجودة في وسط كلامها،  
 وبتختمه بـ (تمام)  
 حبها للهدوء وصوت أم كلثوم  
 وتتعصب من الصوت العالي  
 حبها للروايات الرومانسية  
 وأفلام الأبيض واسود  
 عمري ما اقتنعت إن التفاصيل ملهاش علاقة بالحب  
 إذا كان العلاقات ممكن تفشل بسبب التفاصيل! التفاصيل الصغيرة  
 أووي..  
 زي ما هي فشلت معانا؛ معرفتش تقرأ تفاصيل حبي ليها في كل  
 حاجة بعملها  
 بلمعة عيني لما بتشوفها

وضحكتي ليها وأنا مضغوط

غيرتي عليها

لبسي الي مختاره على ذوقها

ميولي الي اتغيرت بسببها

حبي لحياتي عشانها

حببت كل حاجة، حبيتها وهي محبتنيش أو مخذتش بالها منها!

دايمًا اختار الي بتحبه مش الي أنا بحبه، بعملها الي يبسطها هي  
مش الي يبسطني.. يمكن مقولتلهاش اني بحبها صريحة.. بس قولتها  
بحاجات كتير أوي!

وكانت آخرها في عيد ميلادها، وبرضو ماخذتش بالها من التفصيلة!

\_ أنت مكنتش هتفتحلي؟!

= مكنتش اعرف إن أنت.

\_ مش هتقولي ادخلي؟

= لا طبعًا، اتفضلي.

\_ بيتك شبهك.. مليون تفاصيل.

= معلش بقا، أنا عارف انك مبتحيش التفاصيل، أو بمعنى أدق

مبتكرزيش فيها.



\_ لا ده كان الأول، لكن دلوقت بقيت برکز وافهم.. أنا كمان بحبك.

= أنتِ عرفتني؟!!

\_ اه عرفت من دي.

= السلسلة!!

\_ قريت الي مكتوب عليها؛ أخذت بالي من الكلمة الموجودة  
وحاولت اترجمها.. وأكيد أنت تقصدها، مش كدة؟

= كدة..

(٢٨)

## فترة حظر

صباح الخير يا مرايتي ...

ايه ده؟! أنا شكلي حلو أوي النهارده؛ وشي صافي وهادي، ومفيش هالات سودا كتير زي الأول.. اممم ممكن عشان بقيت باخد كفائتي من النوم!

أصل بحكم التعود بقيت بصحى بدري، وده طبعاً لاني بنام بدري، وعشان مفيش شغل شكلي مش مجهد وتعبان، وشكلي حلو زي ما شايفها كدة، أنا فعلاً كنت محتاجة فترة راحة.. شكرًا.

اليوم بقا طويل أوي؛ مفيش حاجة تشغلني زي الأول. اتفرجت على أفلام جديدة، ورجعت كمان لأفلام قديمة بحبها وليا معاها ذكريات.. زي مثلاً أفلام اسماعيل ياسين، مين محبش أبو ضحكة جنان؟! وكمان فيلم دهب وياسمين، من صغري وأنا مجنونة فيروز، مفيش طفلة ماكش نفسها بقا فيروز؛ الطفلة المعجزة!

بس فضل برضو عندي وقت؛ فقرت كتب جديدة وروايات، فرصة الواحد يغذي عقله شوية، وأنا أصلاً بحب القراءة جداً؛ حاجة كدة ورثاها من بابا الله يرحمه، بس أكيد برضو مش هقضي كل وقت في

القراية والفرجة على أفلام، لازم استغل الوقت الفاضي ده؛ فقررت أقوى اللغة بتاعتي، وكمان أتعلم حاجة جديدة، زي الطبخ مثلاً! الحقيقة الأول مكتش بعرف اعمل ده.. شكرًا.

\_ الله! ريحة محشي! ماما عاملة محشي، أنا بحب أكل ماما أوي، بس للأسف أغلب الوقت كنت باكل برا؛ وده طبعًا بحكم شغلي.. بس من ساعة بقا؛ ما أخذت الأجازة، وأنا ماما ايه مدلعنا آخر دلح، محشي ومكرونة بالشاميل ومسقعة ولا ألد، الواحد فعلاً مستمتع بالأكل البيتي وأخيرًا إدى اجازة لمعدته من أكل الشارع.. شكرًا.

\_ هههههه! بقالي كتير أوي مقعدتش مع عيلتي وضحكت كدة، كان قليل لما كلنا نتجمع كدة؛ وده طبعًا عشان مشاغل الحياة والشغل.. بس الحمد لله جات فرصة واتجمعنا، دي طلعت قاعدة العيلة حلوة أوي فيها دفي وأمان، وفيها ضحكة بتطلع من القلب مش مجاملة.

طب ده أنا أول مرة آخذ بالي إن ماما لما بتضحك أوي عينيها بتقفل زبي، لا وكمان بتعرف تقلد.. دي قلدتنا كلنا! وأختي الكبيرة مبتعرفش تلعب كوتشينة خالص.. ده أنا اللي بكسبها!

أعتقد دي كانت فرصة حلوة اننا نلم الشمل تانيز ونرجع أيام زمان اللي كنا خلاص نسيناها.. شكرًا.

\_ ايه دا؟! أنا تليفوني مرنش خالص النهارده! وبعدين ده مفيش غير اتنين تلاتة بس اللي بيكلموني كل يوم، رغم ان صحابي كلهم قاعدين في البيت، أنا كنت فاكدة اننا مش بتتكلم مع بعض كتير عشان بنبقا

مشغولين! متوقعتش إن احنا مش في بال بعض أصلاً! ده غير الي كانوا بيكلمونا كل يوم واحنا بنشتغل ولما قعدنا في البيت وأخذنا اجازة وبقا عندنا وقت ولا بنسأل حتى! معقول يكون البعيد عن العين بعيد عن القلب فعلاً؟!

احنا فعلاً كنا محتاجين فترة زي دي؛ فترة نفلتر فيها الأشخاص الحقيقية الي باقية علينا وصاينة الود، على رأي اغنية مدحت صالح «بحلم بعيون تصون ودي» احنا محتاجين ناس تقدر قيمة الود وتعرف معناه.. شكراً.

– الليل ليّل، أنا مش بحبه؛ دايمًا بيحسني بالوحدة، ممكن أشغل مزيكا حلوة تونسني.

ايه دا؟!

أنا سقف أوضتي فيه نقشة حلوة أوي، ازاي مחדتش بالي منها قبل كدة؟!

زي برضو دولابي الصبح لما روقته لقيت عندي هدوم كتير أوي، أنا فعلاً مش محتاجة هدوم زي ما دايمًا ماما بتقولي.. أنا الفترة دي اتعلمت أفرق بين الي عاوزاه، وبين الي أنا فعلاً محتجاه.. شكراً.

– ربنا العزيز..

يا أول وأحلى حاجة أبدأ بيها يومي وأنهيه بيها.. شكراً أوي!  
يعني حتى واحنا قاعدين في البيت وممنوعين من النزول ماهنش

عليك تسيينا، برضو أنعمت علينا بحاجات كتيرة حلوة أوي، وخلصنا  
 نتعلم حاجات أكثر، خلطنا كمان ناخذ بالننا من حاجات عمرنا ما ركزنا  
 فيها ولا عرفنا نشوف حلاوتها ونقدرها، عرفتنا كمان نعمة (العادي)  
 اللي دايمًا كنا شايفينه مجرد روتين ممل.. شكرًا ليك يا رب على حنيتك  
 علينا، شكرًا من كل قلبي.

(٢٩)

## الانتظار

ماما كانت دائماً تقول انها مبتحش الانتظار خالص، مبتحش تنتظر أي حاجة سواء حلوة أو وحشة، أو حد بتحبه المفروض يبجي وهي في انتظاره، مبتحش تستنى؛ الانتظار يسبيلها توتر وملل.

الحقيقة إن عمري ما فكرت فيها، بس فاكرة وأنا صغيرة لما كنت استنى حد جاي وعارفة انه معاه حاجة حلوة ليا، أو بنت صغيرة هلعب معاها.. كنت ببقا مبسوطة وأنا قاعدة مستياه عارفة انه جاي، مش في دماغي إن أي ظروف ممكن تحصله فهيتأخر أو ميجيش.

علي عكس مثلاً ماما؛ كانت تفضل رايحة جاية تجهز أكل، ومشروبات، وتنصف البيت، ولو اتأخروا تبص من البلكونة، ومش عارفة ايه العلاقة أصلاً بين التأخير والبلكونة! بس كان بيبقا باين عليها التوتر من الانتظار.

لما كبرت عرفت إن الانتظار ده حاجة مزعجة جداً جداً.. انك تستنى حد يبجي يكمل معاك مشوار حياتك؛ أهو انتظارك للشخص ده بيكون مصحوب بخوف وقلق وتوتر، مش عارف هو حلو ولا وحش! هيطلع يستاهل كل الانتظار ده ولا لا! هيكملك ولا هيكمل

عليك؟!

وانتظارك للفرصة الي هتيجي وتغير حياتك، وبرضو هتبقا قلقان؛  
عشان ممكن بعد ده كله متجيش، ولو جات هتعرف تستغلها ولا لا!  
هتعرف تاخذ القرار وقتها ولا لا؟؟

انتظارك لظهور النتيجة، نتيجة تعبك في الامتحان.

انتظارك للمكالمة الحلوة من حبيبك، رغم انك هتسمعها من غيره  
بس في انتظار تسمعها منه بالذات، تخيل لو تأخرت؟! هتفضل في حيرة  
وشك، وتسال هو بيحبني أصلاً ولا لا؟

انتظارك لكلمات الاعتذار المتأخرة.

وانتظارك في اللقاء الأول.

وانتظارك مكالمث مستنيها تحدد مصيرك!

وانتظارك لطيارتك وأنت بتودع كل حاجة.

انتظارك لخدمة العملاء تطلع منهم بحاجة مفيدة في الآخر.

وانتظارك لمندوب المبيعات يبطل رغي..

وانتظارك للمرتب ينزل.

وانتظارك لقاعدة ممله تتفض بقا وتروح!

حتى الانتظار واحنا صغيرين طلع أحلي بكثير من واحنا كبار..

احنا وصغيرين كان الانتظار مصحوب بشغف، ولهفة، وانبساط!  
لكن لما كبرنا الانتظار بقا مصحوب بخوف، وقلق، وتوتر، ويا ترى  
ايه اللي هيحصل؟!

منكرش إن عامل الوقت مهم، وإن مش كل حاجة ينفع تستنى فيها  
وتقعد في قاعة الانتظار مستنى حالك يتصلح مستنى الوقت المناسب  
عشان تفاتها انك بتحبها في الوقت اللي هي بتتخطب فيه أصلاً.. دي  
المفاجأة!

تستنى شوية لما يهدا وتروح تصالحه وفي الوقت اللي هو خد فيه  
القرار انه مش فارق معاك!

تستنى تكمل في العلاقة يمكن الوضع يتحسن في حين إن العلاقة  
عمالة تاكل فيك وتأذيك.

تستنى تيجي فرصة تانية أحلى وهي آخر فرصة ليك أصلاً!

تستنى تصالحه وتقوله بحبك وفجأة تلاقيه مش موجود!

أوقات بحس إن الانتظار ساعات بيكون مصحوب بطمع (طب ما  
استنى شوية كمان؟ عشان تجيلي حاجة أحسن، شخص أفضل، فرصة  
أكبر! طب ما يمكن السعر يغلى وهطلع كسبان!) متعرفش إن الدنيا  
قلاية وممكن أوي يحصل العكس.

الانتظار في العموم مزعج، ممل، مقلق.



وأفضل حاجة تقدر توصفه؛ هي إن وقوع البلاء أحسن من انتظاره.

(٣٠)

## فان المطيعة

صحيت من النوم مقريفة، مش عارفة مالي! حاسة اني عاوزة أعيط،  
 أنهار، بس مش عارفة أروح لمن! ولا حتى عندي القدرة اني اعمل  
 ده؛ حاسة انه مش من حقي أنهار ولا أقع، مش من حقي أرفع الراية  
 وأقول خلاص تعبت ومش قادرة أكمل.. كان بقالي كتير أوي صامدة  
 من بعد ما بعدت عن سليم.. سليم مرايتي ونصي الثاني! الي وجوده  
 لوحده كان حضن وطبطة عن كل حاجة وحشة بتحصيلي! لما خدت  
 قرار البعد...

بعدت عشان كنت زهقت؛ حسيت اني بنفخ في قربة مقطوعة، بقاوح  
 في علاقة من طرف واحد.. أنا بس الي بحاول، أنا بس الي عندي أمل  
 نكمل، أنا بس الي نفسي نبقا مع بعض، أنا بس الي مقتنعة بنصي الثاني،  
 (وأنا بس) دي متنفعش.. لازم تكون (احنا)!

عشان كدة مكشش ينفع غير اني أبعد؛ حفاظًا على الي باقي مننا..

كان نفسي نتخانق.. نزعق.. ناخذ قرار البعد احنا الاثنين بدل  
 الصمت القاتل الي اتبعناه وكل واحد فينا شايل جواه كوم عتاب  
 متقالش، فجأة سكت وهو سكت، والشهور جرت بعض.. لحد

مابقالنا سنة كل واحد فينا ميعرفش حاجة عن الثاني! زي الأغراب...!  
 منكرش انه وحشني، وحشني أووي.. كان بيعجي عليا أوقات  
 كثير بقا عاوزة أعاتبه وأعيط وفي الآخر اترمي في حضنه والموضوع  
 يخلص.. كنت هتصالح بكلمة، أو ماسكة إيد، مكاملة حتى لو عشان  
 يتظمن عليا.. كان نفسي أحس انه بيحاول عشاني، مُتمسك بيا ويعمل  
 مجهود عشان يحافظ عليا، وده اللي كان يقويني على البُعد؛ هو اني هونت  
 عليه!!!

احنا بنمشي لما نحس إن المكان مش بتاعنا، أو وجودنا بقا ثقيل أو  
 غير مرغوب فيه.. أو بنعافر في حاجة مش لينا.

مهما كان فيك صفات حلوة وعندك طاقة تستحمل الي محدش  
 يتحملة برضو مش هتعرف تحافظ على كل علاقاتك؛ عشان المحافظة  
 على العلاقات مش من مسؤوليتك لو حدك؛ دي مسؤولية الطرفين.

وأنا كان عندي استعداد أكمل وأعافر لآخر نفس.. حب يغفر  
 أخطأه الي اتعملت في حقي ولسة هتتعامل، بس أنا بس الي بحاول،  
 وبعافر، وببذل، ومجهود.. (وأنا بس) دي بتوجع أووي؛ عشان بتحس  
 انك غير مرغوب فيك، وأنا حسيت ده من سليم!

السنة دي كانت ثقيلة أووي على قلبي بكل تفاصيلها، كل حاجة  
 عملتها مكشش ليها طعم.. حتى إنجازاتي الي المفروض أكون مبسوفة  
 بيها كانت إنجازات حزينة؛ عشان مش عارفة أشاركه فرحتي! الأماكن  
 من غيره كئيبة، حتى الأكل اللي بنحبه لما كنت باكله كنت بحس انه

مالوش طعم وماسخ! أنا يمكن محورتش حياتي على سليم لكن رابطاه بكل تفاصيلي، وده الي وجعني.. عشان كنت شايفاه دايماً فيها.. وفي كل مرة كان بيوحشني فيها كان بيصعب عليا قلبي أوي؛ لسة فاكراه وببشتاقله رغم وجعه ليه؟! الله يعين قلبي على حبه الي مالوش دخل فيه!

كنت في الأول.. دايماً مستنياه طول الوقت، براقب تليفوني، وأبص في الرسائل يمكن يكلمني.. لو حد من صحابنا كلمني ببقا عشانانة انه يكون بيسألهم عليا.

شوية شوية بطلت استنى، وشوية كمان وبقيت بنسى، لغاية ما فقدت الأمل من أصله وسلمت للأمر الواقع؛ انه خلاص سليم مش موجود، مش راجع تاني، ولازم أكمل من غيره! ااه تسليم للواقع موجه بس هي الحياة كدة؛ مش هتقف، وأنت كمان لازم تمشي معاها حتى لو جواك نواقص.. لازم تمشي.

أكثر حاجة كنت شايلة همها هي (سليم لو رجع أنا موقفي هيكون ايه؟! طب المفروض هعمل ايه؟! أرجعله؟!!! طب ايه الضمان انه ميعملش فيا كدة تاني؟ مفيش ضمان!!) كنت بفتكره كتير.. وكأن الذكريات شريط سينما بيمر قدامي!

ازاي يكون كل حاجة جوايا رافضاه، كل حاجة بتقول لا مش عاوزاه من كتر ما وجعني وأشتاقله وألح طيفه في المكان..؟ ازاي ممكن قلبي يفكر يميل!

ازاي شامة ريجته؟! ازاي لسه بتمنى حضنه.. ازاي!!

لحد ما فجأة صحيت على رسالة على واتساب:

«صباح الخير يا مريم.. أنا عاوز أشوفك أرجوك، هستناك في المكان اللي كنا بنتقابل فيه دايماً في الزمالك الساعة ٦».

كانت الرسالة من سليم! أول ما شوفتها قلبي كدة اتقبض، حاجة كدة كانت زي الخضة، بس حلوة! بس دماغني كانت هتنفجر من كتر التفكير، والحيرة ما بين أروحله وأقابله ولا لا! طب هسامحه؟! طب لو قالي نرجع أقوله ايه؟! طب ما يمكن هو عايز مني أي حاجة تانية! الغريبة اني كنت ملهوفة أصلاً عشان أشوفه، رسالته صحت فيا الشوق له من جديد، وده اللي كان مخوفني.. اني أضعف قدامه، ويهون عليا نفسي والي عمله فيا! لحد ما قررت أنزل وأقابله. ونزلت بطقم عادي جداً ومن غير ميكب اب؛ كنت قاصدة أنزل وأنا عادية أووووي؛ مش عايزة أبهره ولا أندمه انه بعد عني ولا حتى عشان أبينله اني احلويت ومش همي.. لا ده شكلي ودي طبيعتي ومش فارق معايا أنت تشوفني ازاي.

جهزت ونزلت أقابله في الميعاد اللي قال عليه، والحقيقة كنت رايحة وأنا لوح تلج، مفيش مشاعر جوايا له تاني خلاص انتهت، ولهفتي عليه خلاص بردت، كنت قوية وحاسة إن مفيش حاجة ممكن تهز شعرة مني.. لغاية ما وصلت المكان، لقيت صوت أم كلثوم وأغنية فات الميعاد، كان بقالي سنة مدخلتوش. أول ما دخلت حسيت اني اتهزيت من

جوا؛ حنيت للمكان الي فيه ريحته ولذكرياتنا وصورتنا قدامي في كل ركن فيه، ولما شوفته قاعد كنت عايزة أجري عليه وآخذه بالحضن ومن غير ولا كلمت ولا عتاب.. مش مهم حصل ايه! متفهمش ده غباء؟ ولا حب صادق مقدرش عليه البعد ولا الوقت؟ مهما كنا عاملين فيها جامدين ومفيش حاجه تهزنا إلا اننا بيجي علينا وقت وبنحن.. بنحن حتى للقلب الي وجعنا وجرحنا وعذبنا كثير.

بنحن لأننا كنا لا نملك إلا مشاعر حقيقية نابعة من القلب..

مهما الوجة قوانا هتبقا في جوانا حنة ضعيفة؛ غالبًا بيكون مكانهم الي سايين في أثر حتى لو بسيط بس موجود. موجود عشان يربطهم بروحنا الي مهما نغيب ونتشغل بنرجع لركن الأثر ده ونحن.. نحن بس مفيش رجوع.. مفيش غير حنين.. الخبطة الي بتتخطبها في روحنا ومنرجعش بعدها عادي.. الخبطة الي بتوجعنا بس لو عديناها بنفوق ونقوى أكثر.

الحنين للأشخاص، والأماكن، والذكريات.. هو الخبطن الي مفيش منها مفر، بس لا بُد منها!

\_ ازيك؟

= ازيك يا مريم؟.. شكرًا انك جيتي.

(ما انكرش افني لما جات عيني في عينيه حنيت، وأكد بان عليا الحنين؛ أي حاجة ممكن تدارى إلا نظرة العين لما بتحن).

\_ الحقيقة اتفاجئت برسالتك، خير في حاجة؟!

= أنا آسف.

\_ على ايه؟

= على كل حاجة عملتها أو وجعتك بسببي.

\_ وايه اللي فكرك ييا أصلاً!

= أنا منستكيش عشان افكرك.. بتضحكي؟ مش مصدقاني!

\_ أصلها مش بالكلام يا سليم! بالأفعال.. وأنت أفعالك كلها كانت بتقولي امشي.

= ما انكرش اني كنت غشيم.. وغبي في تصرفاتي معاك، بس متوقعتش أبداً انك تقسي كده وتمشي!

\_ ايه! كنت فاكرا اني ممكن أتحمل لحد امتي؟! استنى تعمل فيا ايه تاني؟! عارف يا سليم المشكلة بجد كانت فين؟ كانت اني دايمًا باختارك وأنت ولا مرة اختارتني؛ دايمًا ضامن وجودي، هتستحمل، هتعدي... مش ههون عليها، بس أنا.. كنت بهون عليك عادي.

= عمرك ما هونتي عليا.

\_ ايه؟!

= كنت برجع أصالحك، كنت بتأسفلك وأنت عارفة اني مش باعتذر لحد.

\_ بس أنا المفروض مش حد!! مكنتش عايزاك تعتذر؛ الأهم من انك تعتذر انك متزعغنش تاني، والأهم من الاتنين اني ما أهونش عليك أصلاً ولا تستنى اليوم يعدي من غير ما تراضيني، خصوصاً وأنت عارف اني هتراضى بسهولة.. جاي بعد سنة تقولي آسف يا سليم!!!!

= بحبك.. أنا اكتشفت اني حبيتك يا مريم، حبيتك أوي! كنت طول الوقت مش مفتنع اني بحبك، كنت بخاف تضعف قدامك؛ عشان كدة كنت بتصرف معاك بالشكل ده، اه كنت ضامنك ومتطمئن لوجودك عشان لقيتك قابلاني، أنا كنت خايف توجعيني..

= فكنت بتوجعني قبل ما أنا أوجعك يعني؟!

\_ مكنتش قصدي أوجعك.. بس كنت عاوز يبقا في مسافة آمنة بيني وبينك، كنت فاكِر إن حبنا لبعض اتسبب في جرح لينا احنا الاتنين.. واستمرار وجودنا في حياة بعض بعدين.. كان بيلهب الجرح ده! متعرفيش عشان يطهره ويعالجه ولا بيعمق الجرح أكثر فيصعب معالجته بعدين!! بس احنا كنا بنخاف نبعد، وبرضو كنا بنخاف نقرب.. ماكنتش اعرف إن الخوف هو اللي بيعرج فينا مش حبنا.. مفيش حب بيعرج!! وانا جايلك انهارد ده يا سارة وبكل حنة في قلبي بقولك بحبك وعاوز أكمل معاك.

= لا.. أيوة، لا يا سليم، لا وأنا لسة بحبك وعاوزاك، لا وأنا كنت بستنى اللحظة دي من بدري، يمكن لو كنت جيت بدري عن كدة كنت جريت عليك وقولتلك موافقة ومش فاكِرَة أنت زعلتني في ايه! بس أنا



دلوقت فاكرة كويس زعلتني في ايه، ووجعتني كام مرة، وكام ليلة نمتها وأنا معيطة، وكام مرة ركعت لربنا باسجد بالدموع بادعيه يشيلك من قلبي؛ عشان مش قادرة أنساك! أنت جيت متأخر كالعادة بس المرة دي متأخر أووي.. مش هقدر أقولك حاجة تاني غير انه خلاص مبقاش فيه حاجة تتعمل؛ فات الميعاد! عن اذنك.

سبته ومشيت، وسبت أم كلثوم هي اللي ترد عليه:

تعتب عليا ليه! وأنا بإيديا ايه؟ فات الميعاد فات.. فات الميعاد!

## الجلسة ١

بس كنت حاسة إن قرارى باني آجي هنا هو القرار الوحيد الصح الي ممكن أكون باخده دلوقت، ويمكن كمان يكون القرار ده جه متأخر شوية، ولو كنت جيت هنا من بدري يمكن حاجات كتير أوي ما كنتش حصلت!

أنا دائماً حاسة اني غلط، في مكان غلط، وسط ناس غلط.. مفيش حاجة لايقة عليا من الي أنا فيها، ولا شغل، ولا عيلة، ولا صحاب. طول الوقت حاسة بغربة. المكان الوحيد الي حاسة فيه انه المكان الصبح.. هو اني قدامك دلوقت.. قدامك دلوقت.

= اشمعنا ده المكان الوحيد لللى حاسة انه مكانك؟؟

\_ عشان أكيد الي أنا فيه ده مش طبعي.. مش طبعي احساسني بأني فعل غلط ماشي على رجلين، وجودي غلط.. قراراتي غلط.. اختياراتي غلط... أنا مش مبسوطه، وده سبب كافي يخليني أكون هنا..

= وانتِ جيالي عشان أخليكِ مبسوطه؟

\_ لا.

= أو مال ايه؟؟

\_ قولتلك جاية عشان أعرف أحزن.. أعبر عن حزني براحتي من غير ما احس بأنه ضعف مني اني حزينة، عاوزة ااعيط ااعيط أووووي بس من غير ما أجلد في نفسي اني باعيط لنفس الأسباب تاني، وأفضل أعايرني بأني مُغفلة وعبیطة، واني ساذجة؛ عشان وقعت في نفس الفخ تاني!!

نفسی أبین حزني عادي من غير ما احس انه عيب أو يقلل مني.. مش هينفع طول الوقت أبان قویه وبنفس الصورة، أنا مش قاعادة أكون قویه طول الوقت، أنا بنی آدمة مش تمثال!

غريب أوي المجتمع الي احنا فيه دا.. مش مسموحلك تضعف ولا تعبر عن حزنك بعد الفراق عشان هيتادوا في انهم يزوده ويحسوا كل يوم بالانتصار انك حزين بسببهم!

ولو ميبتتش حزنك ووجعك يبقا أنت مبتحسش ومعدكش قلب وانت الي جيت عليهم! القوه بقت افتري.. والضعف خزي...

أنا عاززة أحزن، أعيط، وأعبر عن حزني ده من غير ما ابقا مكسوفة  
وحاسة اني ضعيفة وقليلة الحيلة!

ولما أفرح أعبر عن فرحي من غير ما اتحسد عليه، وكأنه مش من  
حقي أو كتير عليا!

كل حاجة بقينا نحسبها مليون حساب، حتى احساسنا ومشاعرنا!  
مبقاش مسموحلنا نعبر عنها بأريحية.

أنا في مرحلة سميتها (مرحلة الـ مش قادرة)؛ مش قادرة أشتغل،  
مش قادرة أتكلم مع حد، مش قادرة أنزل من بيتي، مش قادرة أقابل  
حد، مش قادرة حتى أكمل يومي، ولا أعيش لبكرة.. آمال ماهر كدبت  
لما قالت (الي قادرة على التحدي والمواجهة) أنا ولا قادرة ولا نيلة، أنااا  
عاززة أهذا، عاززة أرتاح. مش كل حاجة لازم تبقا تحدي، مش كل  
حاجة لازم تبقا صعبة كدااا، فيها سهر، وتفكير، وأسئلة ملهاش آخر،  
لا وخطط! حتى علاقتنا ببعض بقت مبنية على خطط عشان تكمل  
وتبقا ماشية صح! حاجة في منتهى الإرهاق.

أنا عارفة إن ده بتسموه اكتئاب.. وأنا كل الي حواليا عندهم  
اكتئاب، ده أنا أشك إن حضرتك كمان عندك اكتئاب.. ولا ايه؟!

= وارد طبعا اني أصاب باكتئاب زبي زي أي حد؛ أنا بني آدم بحس  
وعندي مشاعر، بس ده ميمنعش أبداً اني أقدر أساعدك؛ عشان أي  
شخص مُكتئب عنده مُشكلة محتاجة حل أنا ممكن أقدر أساعده في انه  
يحلها.. ممكن أساعده في إنه يقدر يتقبلها من الأساس، وكونك مُعترفة

إنك مريضة، أو محتاجة مساعدة عشان تكوني كويسة ده علاج، أنا هنا مجرد وسيلة مساعدة.. لكن العلاج الحقيقي جواك أنت، وأنا وأنت خطوة خطوة هنوصله.

\_ زيادة...

= القهوة؟!

\_ لا مُشكلتي زيادة..!

بدي زيادة.. بقدر زيادة.. احساسني زيادة.. كلامي زيادة.. بعبّر زيادة.. حتى مشاعري دائماً زيادة! والمشاعر الزيادة بتدلق وتقع وتتبعتر، وهيقا صعب كل شوية نلمها.

المشكلة بقاا لما الزيادة دي نقابلها بالعادي.. عادي أوي!!!

= المشكلة الحقيقية هي توقعاتك الزيادة؛ أنت بتبقي متوقعة يترد على الزيادة دي بشيء كبير فطبيعي لما يترد بشيء أقل.. تخزني.

\_ بقيت بعاقب نفسي افي لسة بحس وبحب.. بقيت بخاف من أي شعور حلو بحسه؛ عشان عارفة انه مجرد كمين لوجع جاي في السكه.. بجلد نفسي كل ما ازعل علي حد او دموعى تنزل عشانه.. عشان لسة عبيطة، لسة بصدق وبثق.. وبتعلق.. لسة بحس!!

أنا معنديش استعداد أكوّن علاقات إنسانية تاني؛ الإنسان ده بقا أخطر حاجة على الكوكب.. هو مصدر الأذى لكل شيء على الأرض. الإنسان ممكن يحبك النهارده وبكرة يكرهك ويبقا هو مصدر ألمك

ووجعك بعد كدة... وتفضل تعاني منه بقيت حياتك. أنا مش مستعدة أتجوز وأخلف وأعرض عيالي لأذى وجروح تعيش معاها بقيت عُمرهم وتدمرهم نفسيًا وجسديًا.. وآخرتهم تبقا في عيادة دكتور نفساني بيحاول على قد ما يقدر يصلح المكسور فيهم.. طب وعلى إيه ده كله؟ ده حتى يبقا حرام عليا!

مشاعر

\_ يلا بقا أسبيك عشان معطلكيش .. أنا قولت بس أسأل عليكِ.

= ميرسي يا درش، تسلم يا كبير.

\_ ههه باي باي.

= باي.

\*\*\*

\_ ايه يا مصطفى عامل ايه؟

= الحمد لله يا فندم تمام.

\_ تمام في حد جاي من فرع الشركة في دبي يساعدك في المشروع الجديد.. هو هيوصل بكرة إن شاء الله، عاوزك لما يوصل تقعدوا مع بعض كدة وتطلعوا أفضل ما عندك؛ المشروع ده مهم جداً بالنسبة للشركة وليكوا انتوا شخصياً، هيفرق معاكم أووي.

\_ تمام يا فندم.. متقلقش حضرتك.. تمام مع السلامة.

\*\*\*

مي كانت هي الموظف الي جاي من فرع الشركة في دبي عشان تساعدني في المشروع.

ما انكرش أول ما شوفتها اتصدمت وده لكذا سبب، أولاً كنت فاكراً انه راجل الي جاي مش بنت، ثانياً لأن شكلها صغير أوي، تشوفها



تحس إنها طفلة، وتحس ليه هي طفلة فعلاً.

قعدت عندنا ٣ شهور في الشركة وكانت منتهى الدوشة والضحك والعفوية، كانت مختلفة، ملامحها هادية وابتسامتها ما بتفارقهاش، ما افكرش انها اتعصبت على حد ولا صوتها علي.. كانت لذيدة!

\*\*\*

\_ احم احم... ايه ده أنت بتعيط!

= بيعيط؟! لا طبعا.. أنا عيني مطروفة بس.

\_ وليه لا طبعا!! مش بني آدم أنت؟

= لا بني آدم، بس راجل.. والراجل مبيعيطش.

\_ قصدك مفيش راجل مبيعيطش، الفكرة بس في انكوا مبتحبوش تبينوا ده قدامنا وبتخبوا؛ عشان منستضعفكمش، بغض النظر إن ده غلط أصلاً.

= هو فعلاً غلط.. الفكرة نفسها من البداية غلط؛ الراجل اللي يعيط مبيقاش راجل؛ لما هو يعيط الست تعمل ايه! تحل المشكلة؟ الراجل معندوش وقت للعياط، معندهوش الرفاهية دي، لو عيط هيقا ضَعَف، ولو ضعَف مش هيعرف يدير كويس.. وهيغلط.. غلط يمكن ما يعرفش يصلحه تاني.

\_ بس أنت مكبر الموضوع أوي يا درش!

= درش؟!

\_ اه هو أنت مش اسمك مصطفى برضو!

= اه.

\_ بس يبقا درش.

«كان كلامي دائماً معها قليل وعلى قد السؤال وفي حدود الشغل وبس، ومع ذلك ماكتش بتفقد الأمل في إنها تخليني أتكلم معها وما انكرش اني في وقت بسيط حببت الكلام معها فعلاً، وبقا مبسوط وأنا بسمعها، كانت بتقول على نفسها إنها رغبة، وأنا كنت اه بشوفها رغبة.. بس لذيدة! لحد ماجات في مرة لقيت نفسي بقولها الي عُمري ماقولته لحد، معرفش بتوصل لمفاتيح قلبي ازاي وتوصل لخباياه!».

\_ هو أنت فعلاً مبتعيطش؟!

= اه.

\_ بجد! يعني عمرك فعلاً ما عيطت؟!!!

= من وأنا صغير وكنت لما اجي أعيط ابويا يزعلي، كان بيقلني الراجل ميعيطش.. متبقاش خرع كداه.. علمني الجمود لدرجة انه لما مات معرفتش أعيط عليه.. رغم إني كنت زعلان، بس حسيت إنه هيطلع يزعلي كمان إني بيعط عليه... بس بعدها عيطت مرة، وندمت بعدها!

\_ليه؟!

= حبيت.

\*\*\*

\_مصطفى، أنا فعلاً مش قادرة أكمل، زهقتت...

= زهقتي مني؟

\_يووووه... هنرجع للأسئلة الي مالهش لازمة! ما ترضى بقراري وخلاص.

= قرارك ده لما تكون حاجة تخصك لوحداك.

\_وأنا قولت الي عندي.. أنا فعلاً مش عاوزة أكمل، مش قاادرة، مش طاايقة.

= هو أنا للدرجة دي وحش يعني وما اطقش! للدرجة دي مش هالين عليك حتى تعرفيني الأسباب؟

\_أهي دي بقااا مشكلتك.. دور الضحية، والأكبر أهو قدامي؛ الدموع الي في عيونك، ومتفتكرش انها هتخليني أراجع عن قراري، أنا مش عاوزاك.. أنا مش متقبلة انك تكون جوزي في يوم من الأيام، مش حاسة إنك ممكن تكون الراحل الي أكمل معاه؛ أنت ضعيف قدامي، دموعك دي مش حل.

= أنا ضعيف قدامك عشان بحبك.. ودموعي دي عشان أنتِ غالية

عندي!

\*\*\*

- معنى إنك تنزل دموعك قدام حد وميقدرهاش.. دي أكبر إهانة ممكن تتعرضلها، خصوصًا لو دموعك عزيزة وغالية، أنا بقيت مقتنع تمامًا إن مهما حصل ميستاهلش دموعة واحدة تنزل من عين راجل.

= عندك حق.. بس الكرامة في الدموع مش بس عند الرجالة، البنات كمان.. يعني لازم تحس إن دموعها متقدرة، وإنها مش كائن ضعيف ولا حاجة لمجرد انها بتعيط؛ ده تعبير عن مشاعر وإحساس، هي في النهاية بني آدمة زي الراجل بالظبط، ما هو بني آدم بيعس ويبحزن ويبفارق، أكيد هيبقا محتاج يعيط وإلا يبقا بقااا معندوش غدد دموعية.. والشخص اللي يقسى على نفسه وقلبه يبقا هيقدر يقسى على قلب أي حد... مبنعرفش نديله الأمان يا درش، مبنعرفش!

- مُقنعة شوية أنتِ يا مي.

= مش شوية.. كثيررر، ممكن أطلب منك طلب؟

- ايه؟!

= سيب نفسك، عبر عن مشاعرك من غير خجل؛ مشاعرك هي اللي بتميزك.. لو عاوز تضحك اضحك، ولو حزنت ابكي، مش هيحصل حاجة.. المكان اللي مش لاقى نفسك فيه امشي منه ومتفكرش، فضي قلبك من الهموم يا درش؛ الحياة ثقيلة لو حدها.

«مي علمتني أكون شخص خفيف، بسيط، بعرف استمتع بكل حاجة، بقيت بيعيط لما اشوف فيلم في السينما وتأثر بيه، وأضحك وأنا في الشغل عادي؛ عشان المدير بني آدم.

برضو وأحب، أحب ومش خايف من وجعه ولا ضعفي قدام اللي بحبه؛ عشان لو اختارت الشخص الصح ضعفك قدامه بيتحول قُوة.. قد ايه كان نفسي مي تكون الشخص ده، بس مفيش نصيب، ربنا يسعدها!».

( ٣٣ )

## الجواب الأخير

أنا مش عارفة أكتب اقول ايه في وقت زي ده، بس أكيد انكم وحشتوني، وأكيد كمان مش عاوزاكم تكونوا زعلانين مني؛ أنا عملت كده غصب عني، عملت كدة بعد ما فعلاً تعبت وطاقتي خلصت، أنا مكتتش عارفة أعيش كنت دايمًا حاسة اني ميتة، عايشة جسد بس من غير روح، حتى لو كنت بيان قدامكم باضحك أو مبسوفة ده كان كله كذب، يمكن ما تعرفوش أنا مريت بأيه ولا أنتوا كتبتوا بتتعبوني وتضغطوا عليا ازاي، بس أنا مش بكرهكوا ولا بقيت زعلانة، مش هقول إن الغلط ماكنش منكم ولا حتى كان مني، أنا مش حاسة اني عاوزة أغلط حد دلوقت، ولا بكتبلكم دلوقت عشان أحسسكم بالذنب بعدين، أنا بكتب لكم دلوقت عشان تحاولوا تلحقوا الي ينفع يتلحق، أنا متأكدة إن الكلام والحاجات الي هقولها لكم هتكون مفاجأة ليكم، يمكن تستغربوها، ويمكن كمان متقدروش تصدقوها؛ عشان مش قادرين تقتنعوا إن ده ممكن يكون حصل أو بيحصل دلوقت، بس دي الحقيقة.

وأنا صغيرة اتعرضت للإيذاء الجنسي أكثر من مرة، أيوة يا بابا أنت وماما.. وكانوا طبعًا ناس قريين مننا، يعني فوق مستوى الشبهات،

وطبعًا مكنتش أقدر آجي اقولكم كده؛ مكنش حد فيكوا هيفهمني ولا هيططب عليا، إذا كان مقدرتوش تحافظوا عليا أصلاً ولا حتى تاخذوا بالكم إني مش طبيعية وفيها حاجة متغيرة، بس تمام أنا لما كبرت حاولت على قد ما اقدر أعالج الجروح دي، بس أنا كثير أوي كنت ببقا محتجالكم، على الأقل انكم تدوني الثقة بأني بنت كويسة وزبي زي أي بنت، مفيش حاجة نقصاني أو تعيبني، بس كنتوا هتدوني الثقة دي ازاي! انتوا عمركم ما قولتولي كلمة تشجيع واحدة، من وأنا صغيرة وأنا بتعرض للتممر منكم انتوا قبل الناس اللي برا، دايمًا تعيبوا على شكل جسمي ووزني، حتى إنجازاتي عمركم ماشوفتوها! دايمًا شايفين فلانة أو فلان أحسن مني، أوقات كثير كنت ببقا محتاجة منكم كلمة تشجيع واحدة؛ عشان تديني طاقة أكمل، كلمة حلوة أو براقو عمري ما سمعتها منكم! عارفين؟ أنا كان نفسي نبقا صحاب أوي، نقعد نتكلم مع بعض واحكيلكم عن يومي وعن صحابي، كان نفسي لما أخرج أخرج معاكم انتوا وأكون مبسوفة، كنت دايمًا بتمنى ده، كان نفسي محسش إني لوحدي، كان نفسي أحس فعلاً انكم بتحبوني!

أنا كان زي زي أي بنت نفسها تتجوز وتخلف، مش عشان دي طبيعة ولا غريزة؛ على قد ما كان نفسي اعمل لعيالي اللي كان نفسي يتعمل معايا، كنت هحضنهم! عارفين يعني ايه تحضنوا ولادكم؟ يعني بتدوهم الأمان، بتحصنوهم ضد أي حاجة ممكن تيجي عليهم تضعفهم، عارفين؟ أنا كانت ممكن مشاكي كلها تخلص في حضن!!

أنا فاكدة كذا مرة كنت أرجع البيت معيطة ومخذولة من صحابي، راجعة البيت مهدومة من الناس اللي برا، كل مرة كنت بقا عاوزة أترمي في حضن حد فيكم أشكيله ويقويني، لغاية ما جات ماما في مرة لقيتني بيعط فضلت تزعلي وتغلطني وتلوم عليا اني بيعط، قالتلي ايه التفاهة اللي أنت فيها دي قومي شوفي ورانا ايه نعمله! ومن ساعاتها وأنا حتى العياط بقيت أخاف أعيطه قدامكم، حتى الحزن كنتوا بتحاسبنوني عليه، مكش عندى رفاهية الانهار وقت ما أكون محتاجة أنهار! وده كله ليه! عشان انتوا متضايقوش وتزعقولي؛ اكمني تافهة ومش مقدرة اللي بتعملوه عشانى من أكل وشرب ولبس ومصاريف.

وكان عشان أَرْضِي المجتمع اللي أنا فيه؛ ما أنا لو حزنت وبينت حزني قدام الناس هيقولوا عليا اني كئيبة، ومحدش هيتعامل معايا، ويتجنبني.. وأنا كنت لو حدي كفاية، مكنتش هقدر أستحمل كمان إن في ناس بتبعد عني ونفرائي.

دخلت علاقات كتير أوي عشان أحس إنني محبوبة، كنت دايمًا بدور على الحب، كان نفسي أتحب أوي، كنت زي الجعان اللي ما بيصدق يلاقي لقمة ياكلها، وكل علاقة فيهم خدت مني ما ادتيش، مفيش علاقة ما أدتيش، وأنا من كتر ما كنت هشة من جوايا وقعت ومقدرتش أقوم، الفترة الأخيرة حسيت إن خلاص مفيش فايده وإنني هفضل كدة على طول، مفيش حاجة هتتغير، كل اللي هيجي تاني هيكون أسوء، لا انتوا هتتغيروا وتعيدوا اللي كان، ولا أنا هبقا كويسة عشان مفيش



حاجة جاية نتيجة، أنا كنت محتاجة كثير أوي، ومن كتر الي محتجاه مبقتش عارفة أحدد احتياجي لايه بالظبط!

أنا كنت بحاول أعمل أي حاجة عشان أرضيكم وأرضي الناس، عمري ما عرفت أرضي نفسي، كمان دايمًا كان في كلمة (ما ينفعش) بس يا ترى كلمة (ما ينفعش) دي هترجعني دلوقت؟! أكيد لا ما ينفعش ودي كلمة ما ينفعش الوحيدة الي صح.

أنا في دولابي هتلاقوا صندوق في جوابات كثير؛ كل مرة كنت ببقا محتاجة أتكلم مع حد فيكم أو في حاجة حصلتلي كنت بمسك القلم واكتبلكم كأنكم بتسمعونني، وصدقوني كل مرة كنت باكتب فيها كنت ببقا محتاجة حضن منكم أقدر أعيط فيه!

كل مرة كنت بنام فيها وأنا منهارة كنت بقول خلاص مش هيطلع عليا الصبح وهرتاح، بس برضو كنت بصحى عادي وأكمل معافرة! بس أنا خلاص مش هقدر أعافر تاني.. آه خايفة، آه محتجاكم، ومحتاجة حد يشدني في حضنه ويقول لي لا.. بس خلاص مفيش وقت، ومبقاش في فرص تانية.

الحقوا الي ينفع يتلحق..

واعرفوا.. لو كنت اتحضنت مكنتش انتحرت!

(٣٤)

## المراية

كان يوم عادي زي أي يوم، صحيت الصبح وبصيت في المراية وشوفت صورتي.

بس الغريبة إن صورتي مكنتش بتتحرك، كانت ثابتة وبتبصلي.. بتبصلي بحدّة، بس النظرة كانت مليانة عتاب معرفتش تداريه.

\_ لسة عينك تايهة وضحكك بهتانة! لسة صوتك بيترعش مش خوف.. يمكن كسوف، يمكن عشان بتتوتري من أقل حاجة! قوليلي.. لسة بتعملي حساب كل حاجة؟ لسة قلبك بيصفي بسهولة؟ ولا بقا أزرق من كتر الكدمات! لسه قلبك بوصلتك! طب مش يمكن تايهة عشان ماشية وراه؟ لسة مؤمنة إن المشاعر بتتجدد وإن طول ما احنا عايشين هنفضل نحب!

= أنت مين؟!

\_ مش عارفاني؟ أنا منك، عايشة جواك.. عشان كدة بطلتي تسألني عليا، تشوفي مالي أو فيا ايه، ده أنت حتى بطلتي تتكلمي معايا، أنت خايفة ليه كدة؟ حد يخاف من نفسه!

= أوقات الواحد لازم يخاف من نفسه.

\_ ويا ترى لما بتخافي من نفسك بتعملي ايه ؟ بتراجعي نفسك!  
بتصلحي أخطائك! بتفكري فيا؟

= أنت مين عشان أفكر فيك؟ وأفكر فيك ليه؟

\_ فكري في نفسك اللي نسيتهها، والي جيت عليها.. الي داريتها  
جواك وخبيتها.

نسيتهها يوم ما كان لازم تفكري فيها وتديها حقها ومعملتيش كدة!  
نسيتهها في كل مرة فكرتي في غيرها قبلها، وادتيهم أكثر ما ادتيها،  
ومنحتيه لى مقدرهوش، وجيتي عليها يوم ما كان لازم تصرخي  
وتقولي انك تعبتى وقاوحتي ورسمتي الضحكة كذب، يوم ما تعبتى  
واتظاهرتى بالصحة والعافية، ويوم ما رضيتى واتنازلتى وكملتى في  
علاقات مؤذية كملت عليك، جيتى عليها يوم ما كان من حقى اتكلم  
وسكتيىني! وخبيتى جواك؛ لجل ما شكلك كدة عاجبهم.. بيريجهم،  
خبيتى عنهم، وشوية شوية نسيتهني جواك، ومن كتر ما بدلتى في  
وشوش زيهم توهتتى في زحمة الوشوش، ونسيتهني وشك الحقيقى..  
نسيتهني لدرجة انك لما شوفتني دلوقت معرفتنيش.. معرفتنيش نفسك!  
بس مش هسكتلك.

\_ هتعملي ايه؟!

= هرجع لنفسي.. هدخلك مكاني.

\_ لا سييني أنا... لا!!!!!!!!!!!!!!

(٣٥)

## الجلسة ٢

أنا مبجش دور الضحية ده!

إحساس سخيف إن أصعب على حد، أو أبقا قاصدة أعمل ده عشان  
أصعب عليه، ازاللي أصلاً ممكن أستحملني كداللي!

- وده اللي خلاك تهربي..؟ بعد ما عرفتي اللي عندك!

= قصدك لو كيميا... هههه كانت النهاية الطبيعية لحياة واحدة زيي؛  
أصل فكري فيها كداللي... يعني مثلاً ده منظر واحدة بعد ده كله النهاية  
تبقا سعيدة! تؤ مش لايقة.

- أنت بتستعطيني ولا بتستعظفي ربنا..!

= مستفزنيش... أنا لا يُمكن أقبل أي شعور بالعطف، وإلا كنت  
عرفت اللي حواليا اللي عندي مش هربت.

أنا زمان كنت باستغرب أوي الناس اللي كانت تحبي حالة مرضها  
عن أقرب ناس ليها، كنت بشوفهم إنهم قد ايه محتاجينهم جنبهم وإن  
دي فرصة عشان اللي بيحبوهم يفضلوا معاهم وميسيبوهمش.. كل  
طلبتهم هتبقا مجابة، هيقدرُوا يعيشوا الحياة صح، ويستمتعوا بيها؛ لأن

مش هيقا في كلمة لا، ولا مستحيل، ولا مش هينفع.. كله هيحس بقيمة.. وهو هيحس بقيمة وقته وحياته، كل حاجة هتتغير للأحسن، ازاى يسيبوا كل دااا ويفضلوا مكملين حياتهم ومخبين وجعهم وهما كل ثانية بتعدي محتاجين حضن؟! سنده، طبطبة.. محتاجين كلمة حلوة.. بدل ايه دااا مال وشك بهتان كدا ليه!

وشيل شعرك الي بيقع ده قرفتنا!

ما تمد شوية يا أخي، ايه خايف تمشي! ما تاكلي ده أنتِ مسمومة صحيح..

أنا اكتشفت في الآخر انه فعلاً عندهم حق؛ إحساس انهم بيعملوا كدة عشان صعبان عليهم وجعه أصعب ميت مرة من وجع المرض وعلاجه.. احنا بيقا عندنا شك في كل كلمة بيقلوها وكل تصرف بيعملوه معانا، عندنا شك دائماً بأن ده مش حقيقي؛ ده جبر خاطر، حتى جبهم بنشك فيه؛ بيقا مشروط، حب مؤقت.. عشان تعبنا!

- بس أنتِ كدة من الأول يا نور.. بتشكي في حب كل الي حواليك طول الوقت، بتخافي تعرفي حد ظروفك أو حاجة عن حياتك؛ عشان متشكيش في محبته ليك، لازم تكون كل حاجة شايفها منك مفهاش غلطة عشان حبه يبقا مطبوط وفي محله وراضيك! وده مش حب يا نور، عشان كدة معرفتيش تلاقيه.

= أنا كنت خايفة، كنت عاوزة أتطمئن.. عاوزة اتقبل.. محدش عرف يعمل ده.

$$\bullet \bullet \bullet \bullet \bullet =$$

= أنت قصدك ايه بظبط؟؟!

= أنتَ عاوزة مني ايه بالظبط؟ أنتِ بتساعديني ولا بتوجعيني  
أكثر!!!!

- بساعدك.. بساعدك يا فرح.. ازاي كنت عاوزه تتقبلي وتتحبي وتتسامحي على أخطائك وأنت نفسك مقدرتيش تسامحها علي الي عملته؟ رغم انك جربتى ألها وبتجربيه!

= عشان الي عملته دااا مكنش له أي مبررر خالاص انها تعمله...  
ازاي تسييني لوحدي!! ازاي قدرت تبعد عني كدااا؟ دا حتى  
مهمهاش أنا هعمل ايه من غيرهاا! أنا كنت محتجاها أووي.. كنت  
محتاجة وجودها وحضنها.. نصيحتها لياا.. اهتمامها بيا.. كل حاجة!  
كل حاجة! أنا كنت عاوزة أمي.. أنت عاوزاني أسامح إن أمي تبقا  
عاشت بس بعيد عنى كأنها من الميتين؟!!

– أنت فكري في كل اللي أنت محتجاه وبس.. مفكرتيش هي كانت حاسة بأيه وعملت كل ده ليه، كان صعب عليها تستحمل انك تشوفيها كل يوم وهي بتتوجع وتتألم وأنت مش عارفة تعمليلها حاجة، يمكن

كانت خائفة عليك من صدمة فراقها ليك المحتوم.. حتى لو كانت فضلت موجودة معاك كان المرض هاددها، ومش هتقدر تقدملك اللي عاوزاه.

= كان كفاية وجودها.. لكن هي مفكرتش فيااا! أنا كان من حقي اختار معاها، أنا مسؤولة منها مش المفروض تسييني كدااا.. يمكن لو كانت موجودة مكش كل اللي اتعرضتله ده حصل!

\_ طب ما أنتِ عمليتي زيااا بالظبط.. بعدتي عن كل حاجة، وكل الناس اللي بتحبك ومستعدة تستحملك وتكمل معاك، واختارتي تبقي لوحداك، وافكرتي إن ده أفضل حل ليك، ومفكرتيش غير في نفسك وبسسسس!.. بتلومي ليه بقا عليها دلوقت وأنتِ عمليتي زيااا؟ قرررتي تحاربي المرض لوحداك ومهمكيش حد.

= الوضع مختلف؛ هي أم، في حد مسؤول منها.. حد جزء منهااا! مكش ينفع تقرر ده مع نفسها وتمشي.. وهي عارفة إن مالهش بديل، لكن أنا ببعد عشان خاطرهم، مش عشان خاطري؛ عشان محدش يتعلق بياا ويتعب ويتوجع على فراقي، عشان جهم ميتحولش لشفقة بعد كداا، عشان مصعبش عليهم... عاوزة أفضل بلمع في عنينهم ويجبوني، مش عاوزاهم يشوفوني وأنا بدبل كل يوم عن اللي قبله، مش هقدر أتحمل أشوفهم عاجزين وأنا بتوجع ومش هيقدرُوا يعملولي حاجة.. أنا عملت كدة عشانهم.

\_ يا نور ماهو داا موقف ماما بالظبط! هي عملت كدة عشاناا



أنت؛ كانت خائفة عليكِ أنتِ.. افهمي بقااا... متصعبيهاش على  
نفسك أكثر من كدااا!

= قوولتلك الوضع مختلف! ومش عاوزاكِ تساءليني.

\_ دماغك ناشفة.. مفيش فائدة!

(٣٦)

## بلونو

كُنتُ قاعد في الكافيه الي متعود أقعد فيه ولقيتها داخله وفي ايديها كاميرا، كانت لامة شعرها ومش حاطة مكياج، كانت عادية، عادية جداً بس كان فيها حاجة خلهاها مش عادية! قعدت على ترايزة في يمين الكافيه، وسامح أول ما شافها جري يسألها تشرب ايه، وردت عليه من غير حتى ما تبصله:

\_ قهوة مضبوطة.

= تحت أمرك يا أستاذة.

«والحقيقة مقدرتش امسك نفسي، وسألت سامح»:

\_ هي مين دي؟!!

= كل الي أعرفه عنها إن اسمها سلمى، وساكنة جنب الكافيه بشارعين، والأحسن يا بشمهندس إنك ما تتعاملش معاها.

\_ ايه دع ليه؟!!

= أصلها خلقية ومبتحبش تتعامل مع حد، وعلى طول تيجي لوحدها تشرب قهوتها وتمشي، وتتعامل من طرايف مناخيرها.

\_ بس غريبة يعني؛ أول مرة أشوفها!  
 = أصلها مبتجيش كثير، وأغلب الوقت حضرتك مش بتكون موجود.

\_ اعمم تمام.  
 = عن اذنك يا بشمهندس.  
 \_ اتفضل يا سامح، معلش عطلتك.  
 = لا ولا يهملك.

«كلام سامح عنها خلى فضولي يزيد بإني أعرف مين دي، ولأول مرة أقوم من مكاني وأروح أكلّم واحدة اتعرف عليها».

\_ هاي، ازيك؟  
 = هاي.  
 \_ أنا بلوتو.  
 = نعممم!!

\_ اسمي باسم، بس مشهور ببلوتو، أنا عارف إنه اسم غريب شوية.  
 = لا خالص.. كان عندي كلب اسمه بلوتو.  
 \_ احم.. أنا أول مرة أشوفك رغم إني على طول باجي هنا.  
 = وايه مُشكلك مش فاهمة!

\_ لا، يعني أحب أتعرف عليك، أنا باسم، مهندس معماري.  
 = طب يا هندسة، مش تركيزك في شُغلك أهم من تركيزك معايا؟  
 ووقتك أهم من ده كله وإنك تتعرف على الخلق؟ دي أرواح ناس  
 برضو.. ولا ايه!

\_ اه.. شكرًا لحضرتك، وآسف إنني أزعجتك.

= لا ولا يهكم يا أستاذ بلوتو.

اتخرجت أوي، وحسيت انه اتدلق عليا جردل مائة ساقعة.. مكنتش  
 متخيل إنها تكون سخيفة معايا بالشكل ده، فضلت أتردد على الكافيه  
 أكثر من الأول عشان أشوفها وهي ما كنتش بتيجي كثير، ولما كانت  
 بتيجي بتقعد في نفس الرُكن بتاعها وتشرب فنجان القهوة وتمشي، بس  
 كانت بُشير فضولي دايماً مين الشخصية دي! وايه حكاية الكاميرا الي  
 على طول في ايديها ما بتفارقهاش دي! لحد ما جه في يوم وحصلت  
 حادثة كبيرة أوي قُدام الكافيه، وكان فيها جرحى كثير، وناس شبه  
 ميتة، ولما طلعت من الكافيه لقيتها واقفه وبتصور الحادثة والناس  
 سايحة في دمها، والي واقع على الأرض بين الحياة والموت وهي بتصور!  
 ولا كأنها بتصور صور فرح!! معرفش ليه اتعصبت وروحت أتحاقت  
 معاها؛ غالباً كنت بتلككلها وعاوز أردلها الي عملته معايا.

\_ ممكن أعرف ايه الي حضرتك بتعمله ده؟

= وأنت مال حضرتك!

\_ هو ايه! مفيش أي إحساس بالناس الي سايح دمها دي وبتموت؟  
بتصورهم بدل ما تساعديهم!

= ااا وأنت بقا دلوقت بتعمل ايه! بتساعدهم؟! أستاذ بلوتو خليك  
في حالك وأعتقد دي حاجة متخصصكش، متبقاش متطفل وبجح كمان.  
\_ أنت ايه العجرفة الي أنت فيها دي! أنت بتكلمي كدة ازاي؟  
فكرة نفسك مين؟!

= أنا أكيد مش بلوتو.. باي.

تاخذ الأوسكار في حرقه دمي وإحراجي، وكل موقف بيخليني  
اقفل منها ويزيد فضولي أكثر أعرف مين دي، كنت كل ما احكي عليها  
لطارق صاحبي يقولي فضولك ده هو الي بيقلل منك، ويقولي هي  
عندها حق ما تحليك في حالك، بس أنا بعد الموقف الأخير ده اختصرتها  
وبقيت أقعد في الكافيه حتى ما ابصلهاش.

\_ مساء الخير يا أستاذ بلوتو.

= أنت!! أهلاً.

\_ أنا مش جاية أعتذرلك على فكرة.

= أmaal حضرتك عايزة ايه؟

\_ اتفضل.

= ايه ده؟

\_ الكارنيه بتاعي.. أنا مُصورة صحفية، وكان طبيعي جدًا أكون  
بصور الحادثه؛ لأنه شغلي يا هندسة.

= طب هو أنتِ ليه مقولتليش وقتها كدة!

\_ لإن مش شُغل حضرتك تقول للناس تعمل ايه وتحكم عليهم،  
أنت شُغلك إنك تبقا مُهندس وبس.

= شكرًا ل حضرتك.. حاجة تانية؟

\_ وتفتكر أنا ممكن أعوز حاجة منك يا بلوتو! عن اذنك.

= حقيقي قليلة الذوق، صبرني يا رب.. يا رب صبرني.. هي مين  
دي!!

بعد فترة بسيطة كُنت قاعد في الكافيه كالعاده، بس المرة دي أنا  
وصحابي ولقيتهم فاجئوني بعيد ميلادي واحتفلوا بيا، وتاني يوم لقيت  
سامح الي شغال في المكان بيديني ظرف وبيقولي أستاذة سلمى سابت  
ل حضرتك الظرف ده، وكانت صور لعيد ميلادي، والحقيقة كانت أجمل  
صور أتصورها في حياتي كُلها، فعلاً الصور كانت حلوة أوي.. من  
الواضح إنها مُصورة شاطرة جدًا، بس ازاى صورتنى وهي ماكتش  
موجودة في اليوم ده؟! فضلت أسبوع كل يوم أروح الكافيه عشان  
أحاول أشوفها، لكن هي ماكتش بتيجي.. لحد ما أخيرًا شوفتها.

\_ شكرًا على فكرة.

= العفو على فكرة.

\_ طب مش هتقوليلي على ايه!

= أكيد عشان الصور وصلتك، وأكيد كمان إنها أحلى صور اتصورتها في حياتك.

\_ يا سلام! وايه الثقة دي؟

= أنا عارفة نفسي كويس.

\_ الحقيقة هي أحلى صور فعلاً اتصورتها، بس أنتِ صورتها ازاي وأنتِ ماكتيش موجوده اليوم ده؟!

= دخلت وهما بيحتفلوا بيك، بس أنتِ مكنتش واخد بالك، كُنت بتحتفل ومش مركز.

\_ ااااه، حضرتك أخذتي إذن عشان تصوري!

= عليك خفة دم يا بلوتو، فطبعة! هتموتني في مرة.

\_ قصدك اني دمي ثقيل! تمام مش هزعل أنتِ عندك حق.

= أنتِ اللي بتقول أهو..

\_ ماشي.. أنا كدة عرفت إن اسمك سلمى وبتشتغلي مصورة صحفية، ممكن اعرف بقا أنتِ منين؟ أصل لهجتك مش اسكندراني!

= أنتِ هتصاحبني ولا ايه؟ صورتك كام صورة وقولتلي شكرًا وقولتلك العفو خلصنا.

\_ تصدقي اني أنا بلوتو فعلاً اني بتعامل معاك!





وقربنا من بعض أكثر، بس كانت دايمًا مش بتحكي عن نفسها، أنا فعلاً معرفش عنها أي حاجة بس أعرف عنها دلوقت وده كان كفاية بالنسبالي، بحبها وهي كدة بعجرفتها ودبشها؛ اللي اكتشفت مع الوقت انهم قناع كانت بتداري بيه حنيه وطيبة قلب غير عادية، كانت بسكوتة، حبيتها أووي وهي كمان حَبْتَنِي.. وطلبت إيديها للجواز.

\_ سلمى، أنت عارفة إني بحبك، أنا عارف إن فترة ٦ شهور مش كفاية بس أنا متأكد من قراراي ده، أنا عاوز اتجوزك واختارتك تكوني شريكة حياتي.

= باسم، قبل قرارك ده لازم تعرف كويس أنا مين وحكايتي ايه.  
\_ مش عاوز أعرف حاجة عن حياتك قبل كدة، أنا عاوزك أنتِ، اللي يهمني حياتك من بعد ما قابلتك.

= وأنا لازم أعرفك كل حاجة.. أنا مُطلقة.

\_ أنتِ كُنتِ متجوزة؟!

= ١١١١ من ٣ سنين؛ أهلي غصبوا عليا اتجوز ابن عمي حتى بعد ما عرفتهم انه بيتحرش بيا.. لقيتهم بيكدبوني واني بتبلى عليه عشان أفرکش الجوازة، واتجوزته غصب عني، كانت أسود فترة عيشتها في حياتي، كان بيعاملني زي الحيوانة؛ بياخدني غصب، ده غير الضرب والإهانة، مكانش في يوم بيعدي عليا إلا وأنا بطلب الطلاق منه لدرجة إن في مرة أبويا ضربني عشان مطلبش الطلاق تاني!

\_ طب وعملتني ايه عشان تطلقي؟

= في علاقة من العلاقات اليي كُنت باخدها منه نزفت ودخلوني المستشفى، وهناك عرفت إني حامل وسقطت؛ طلبت من الدكتور يكتيلي تقرير بالكلام ده من غير ما حد يعرف؛ عشان أقدمه في المحكمة وأرفع عليه قضية وأطلق، وعملت كدة فعلاً واطلقت، وكمإن سجنته.  
\_ جدعة.

= اه، بس أهلي مسكتوش، طلبوا مني أتنازل عن القضية، لا وكمإن مكنوش عايزني أطلق بعد ده كله، ولما رفضت قالولي أنت ولا بنتنا ولا نعرفك.. وأنا جيت على اسكندرية واشتغلت في أكثر حاجة بحبها وكانوا منعني عنها وهي التصوير، ولغاية دلوقت محدش يعرف عني حاجة ولا حتى فكروا يدوروا عليا.. وأنا طول الوقت كنت لوحدي كارهة كل الناس والتعامل معاهم، بتعامل بعجرفة وقلة ذوق عشان محدش يحب يتعامل معايا؛ كنت بخاف أقرب من حد وآمن له عشان الي من دمي ومكانوش أمناء عليا، لحد ما شوفتك يا باسم.. أنت بقا بعد الي سمعته ده لسة عند قرارك؟

\_ أنا لو متأكد من حاجة فأنا متأكد اني اختارت صح، وقراري بجوازك هو الصح.. أنا فخور بيك إنك اتحملتي كل ده ووقفتي على رجلك من تاني وقدرتي تنجحي رغم كل الظروف دي، وأنا متأكد إنك هتكوني أم لولادي عظيمة، ولو الي خرب حياتك قبل كدة علاقات غلط سواء أهلك أو جوزك في علاج تخريب العلاقات الغلط؛ علاقة

واحدة صح، وأتمنى أكون أنا العلاقة الصح الي تصلح كل الجروح الي  
جواك.. تقبلي ده؟  
= موافقة.

[تمت]

( ٣٧ )

## نهار جديد

طول عُمرِي حاسَة اني لازم أعمل إنجاز.. لازم اعمل حاجة كبيرة، مش عارفة هي ايه، بس لازم اعملها؛ عشان أكون ناجحة ومحبوبة و متميزة ومكنش عايشة وخلاص.. وفي كل عيد ميلاد ليا ببقا زعلانة عشان باكون شايفة اني معملتش أي إنجاز ملموس السنة الي عدت، لغاية ما في يوم روحت لبابا وتنا بيعطله وبقوله أنا زيرو يا بابا، أنا ماليش لازمة، قالي: ليه؟!

قولته: عشان أنا لغاية دلوقت ماعملتش أي إنجاز في حياتي.

سألني: هو أنت شايفة الإنجاز ممكن يكون ايه؟ يعني ايه إنجاز بالنسبالك؟!

- يعني.. يعني مثلاً الحقق نجاح كبير في شُغلي مثلاً أو أترقى، أو أَلْف العالم.. أو مثلاً اعمل مشروع خاص بياا، أو أبقا مشهورة مثلاً! أي حاجة.

= أي حاجة!! أنت تعرفي يا نيرة إنك كل يوم بتعملي كم هائل من الإنجازات بس أنت الي مش واحدة بالك.

\_ أنا!!! ازاي؟ مش معقول طبعا.

= لا معقول.. لأن يا نيرة الإنجاز هو تحقيق هدف بتسعى له، أي هدف بتحاول توصليله ده إنجاز، ده غير إن فيه إنجازات تانية مهمة للأسف مش بناخد بالناس منها.. زي مثلا سعيك في انك تخلي اللي حواليك مبسوطين، إنك تستمتع بحياتك وتعيشها صح، إنك تكون مصدر ثقة وأمان لشخص ما! تضحك في وش الناس حتى وأنت مهموم، تعافر عشان تحقق حلمك رغم كل العكوسات اللي بتقابلك.. إنك تسمع غيرك وتحس بيه من غير تقطيم، ده إنجاز.. إنك تكون قد كلمة بحبك اللي بتقولها وتعمل بيها وتكون قدها إنجاز.. وأهم إنجاز بقا إنك تحافظ على نفسك ومتغيرش ولا تغير مبادئك في عالم كله بيزيف الحقيقة.. فهمتي ايه هي الإنجازات؟

\_ فهمت.

«نيرة، نيرررة.»!!

\_ أنا!!! ايه!! مش شايفاني بسجل وبكلم الفائز بتوعي؟!

= سيبك من الفائز دلوقت وركزي معايا أنا فانزتك برضو وليا حق عليك.

\_ فانزتي!! ما علينا.. خير يا فانزتي؟

= هو أنا وحشة؟!

\_ طبعا.

=ايه؟!

\_وتخينة..أمال أنت متجوزتيش ليه لحد دلوقت؟  
= يا نيرة بقااا، أنا بتكلم بجد.

\_ما أنا مش فاهمة يعني؛ السؤال مش لايق خالص ..يعني أجمل  
واحدة كانت في الجامعة هي الي بتسأل السؤال ده؟!

= أنا حاسة اني وحشة أوووي ..أنا لو جميلة زي ما بتقولي ليه  
متحبشش! ليه محدش كامل معايا؟!

\_يخررررييت الي أقنعكم إن الحب على قد الجمال؟ هو مين أصلاً  
الي حدد ده حلو وده وحش وده واو ودي شكلها عادي!..مين ده!!  
جميلة يا حبييتي ده أنت حتى اسم على مُسمى؛ جميلة وأنت جميلة ..الي  
بيحبك مش بيحبك عشان شكلك؛ لأنه بيبقا عارف ومتأكد إن الشكل  
ده هيبجي يوم عليه و هيتغير؛ تجاعيد بقا، حادثة، أيّا كان، والجسم  
المشوق السمبتيك ده كلها يومين محشي بعد الجواز وهيبقا نفس جسم  
الشعب المصري كله؛ الشكل الهرمي الجميل بتاعنا ده، بس يا ستي  
..فاللي بيعب مبيهموش شكل؛ بيعب الروح، والطباع، والشخصية،  
بيحب الي ينفع تكون أم لولاده وتشيل مسؤولية بيت وتربي وتكبر،  
وتكون سنده، بيعب الي هتكون ونس له يا جميلة.

=يعني ايه؟! يعني أنا متحبشش !!

\_ يعني ميمشيش معاك انهم أشخاص غلط ..وبيتسلوا؟!

= يعني كمان غيبة يا ربي !

\_لا مش غيبة .. أنت نقية .. ومش أي حد هيعرف يقدر نقاء قلبك ده وأمانتك في مشاعرك .. عشان كدة لازم نبقا واثقين في نفسنا جدًّا، ومفيش أجمل ولا أحلى ولا أعظم منك، ولو في تبقا امك مش حد تاني .. وتخطي رجل على رجل وإن ماكنش الشخص بيحبك وشاريك ومحسبك إنك أجمل واحدة على الكوكب ده يبقا ميستاهلكيش ومع ألف سلامة .. تمام كدة يا قمر؟

= تمام .. أنا همشي بقا عشان أنا اتأخرت.

\_اتأخرتي على إيه؟!

= هروح اعمل فيلر عشان شفافي بقا زي دينا اللي ارتبط بيها حازم بعدي.

\_صمت.

= أنت سكتي ليه؟ في حاجة؟!

\_يا ستي أنا ماشية.

سييتها ومشيت وهي صعبانة عليا، ده بجد احنا بقينا في مُجتمع ضاغط بمعنى الكلمة، كل يوم الموضي عايزانا بشكل، بقينا طول الوقت في صراع مع بعض في مين فينا هيبقا أجمل وأجد من الثاني لغاية ما بقيت البنات كلها شبه بعض حرفيًا والولاد كمان وحياتك .. وقفت ميكروباص وركبت .. ااه الميكروباص الحلو بتاعنا ده، وأنا

الحقيقة دائماً بتعامل مع الميكروباص على انه عربيتي الشخصية؛ بحب  
 اقعد جنب الشباك وأشغل أغاني واتفرج على الخلق من شباك العربية..  
 قصدي الميكروباص.

الدنيا كانت زحمة كالعادة والطريق واقف، بس لاحظت والطريق  
 واقف على الرصيف الي جنب الميكروباص اتنين ستات شوية كبار في  
 السن لكن مش أوي واحدة بتعيط والثانية واخداها بالحضن وكل ما  
 تسيبها تلاقيها لسه بتعيط تحضنها تاني، كان مشهد حلو أوي، أيقونة  
 في الجمال، أنا بحب مشاهد الأحضان؛ عشان أجمل الكلام بيكون في  
 الحضن تنهيدة... بس الحقيقة الي عكنن عليا اللحظة دي هو شخص  
 كان قاعد قدامي فضل يهمهم بكلمات مستفزه جداً الحقيقة، والي هي:  
 «ما خلاص يا اختي أنت وهي! انتوا فاكرين نفسكوا فين؟ ايه الهبل ده!  
 ايه الي بتعملوه ده وسط الشارع».

طبعاً أنا مسكت نفسي بالعافية ومردتش على عموده ولا دبيت معاه  
 خناقة رغم انه استفزني جداً..

هو ليه بنشوف التعبير عن المشاعر في الشارع حاجة غير لائقه  
 وميصحش! طب ليه مش بنضايق أوي كدة لو لقينا ناس بتتخناق، ولا  
 واحد بيضرب مراته وبنقول عادي مالناش دعوة!

لكن نلاقي واحد مثلاً بيحضن مراته ولا ماسك إديها ولا بيحب  
 فيها، لا عيب ميصحش، وتبقا قلة حياء! لكن أقول ايه! احنا شعب  
 متدين بطبعه.. ربنا يهدينا.



المهم أخيراً رَوّحت ووصلت بيت العز الي هو بيتنا يعني، وبالمناسبة هو بيت عادي جداً وبسيط جداً جداً، بيت مصري من الدرجة الأولى، الدور طالع على شقتين، وعندنا جارة كل ما بتشوفني بتقولي ربنا بيعتلك ابن الحلال الي يستتك بدل بهدلة الشغل دي، ولو مزاجها رايق شوية بتقولي أنا مش عاوزاكِ تقلقي أوحش منك واتجوزوا، وطنط دي بقا موجودة في كل عمارة في مصر.

عندنا صالة مش ريسبشن، والأوضة بتاعتي أنا وإخواتي مش كل واحد له أوضة لواحدة، وطبعاً ماما بتدخل طنط سُهير علينا عادي عشان توريتها المفارش الي جابتها جديدة وتوريها الخامة عاملة ازاي.. والمراية في التسريحة مش باللمض زي بتاعة الانستجرام.. بنعمل الكفتة أم رز في الأعياد، وبتخانق على ريموت التلفزيون، وبابا كل شهر بيزعق عشان فاتورة النت ويقول مش دافع وبرضو بيدفع عادي.. والأهم من كل ده اننا لازم كلنا نتجمع على الغدا على سفرة واحدة، وأعتقد أجهل حاجة في الدنيا إن بيتك يكون كامل مش ناقص ولا واحد من عيلتك.

العيلة دفا وأمان.. الضحكة معاهم بالدنيا، ووجود بابا في وسطينا وضحكته بينور حياتنا كُلنا.. دايمًا أقول البيت الي من غير أب زي البيت من غير باب.. أنت تعرف تنام وأنت متطمّن وبيتك من غير باب؟؟!!

ربنا يخليك لنا يا رب ويبارك لنا في عُمرِكَ يا بابتي!

دخلت بيتنا وغيرت هدومي وساعدت ماما في تحضير الغداء، وبعد ما أكلنا اتجمعنا نتفرج على فيلم جديد، وبعدها دخلت عشان أنام.. وأنا بشكر ربنا على اليوم كله بتفاصيله الحلوة والوحشة؛ عشان كل تفصيلة فيه محصلتش كدة وخلاص، كل حاجة كانت بسبب.. الحمد لله على نعمة اليوم اللي عايشينه حتى واحنا شايفينه مفهوش جديد ومُجرد روتين؛ يكفي إنه مَر بسلام عليك وعلى حبايك.

نمت وأنا عارفة إن لو ليا عُمر هصحى على يوم جديد بنهار جديد، ومعنى إنه نهار جديد يعني بداية جديدة وفرصة جديدة لينا ربنا مقدمالنا مجاناً.. محتاجين نعرف قيمتها كويس.

تصبحوا على خير.